

# CBETA電子佛典集成

---

CBETA Chinese Electronic Tripitaka Collection  
ebook

X67n1308

## 徑石滴乳集

清真在編 機雲重續

中華電子佛典協會



# 目次

- [編輯說明](#)
- [章節目次](#)
  - [No. \\_1308-A\\_序](#)
  - [徑山滴乳集凡例](#)
  - [徑石滴乳集目錄](#)
  - [大鑑下第二十世\(臨濟第十六世\)](#)
  - [徑山下第一世\(臨濟下十七世\)](#)
    - [徑山範禪師法嗣](#)
  - [徑山下第二世](#)
    - [天台倫禪師法嗣](#)
  - [徑山下第三世](#)
    - [瑞巖寶禪師法嗣](#)
  - [徑山下第四世](#)
    - [天台觀禪師法嗣](#)
    - [鏡堂古禪師法嗣](#)
  - [徑山下第五世](#)
    - [白雲度禪師法嗣](#)
  - [徑山下第六世](#)
    - [天界俊禪師法嗣](#)
    - [何密菴居士法嗣](#)
  - [徑山下第七世](#)
    - [東林悟禪師法嗣](#)
    - [素菴田大士法嗣](#)
  - [徑山下第八世](#)
    - [太岡澄禪師法嗣](#)
    - [壞空成禪師法嗣](#)
    - [妙峰玄禪師法嗣](#)
    - [天池一禪師法嗣](#)
    - [伏牛鑿禪師法嗣](#)
    - [古庭堅禪師法嗣](#)
    - [東山琦禪師法嗣](#)
    - [西禪瑞禪師法嗣](#)
    - [潔空通禪師法嗣](#)
    - [八峯潭禪師法嗣](#)

- [天寧忠禪師法嗣](#)
- [佛跡直禪師法嗣](#)
- [徑山下第九世](#)
  - [太崗寧禪師法嗣](#)
  - [天淵源禪師法嗣](#)
  - [德山安禪師法嗣](#)
  - [天真善禪師法嗣](#)
  - [洞山惠禪師法嗣](#)
  - [仰山道禪師法嗣](#)
  - [八峰聞禪師法嗣](#)
  - [古溪澄禪師法嗣](#)
  - [龍門悟禪師法嗣](#)
  - [性空悅禪師法嗣](#)
  - [太雲興禪師法嗣](#)
  - [石徑裕禪師法嗣](#)
  - [無相直禪師法嗣](#)
  - [淨慈休休禪師法嗣](#)
  - [性空覺禪師法嗣](#)
  - [南竺橋禪師法嗣](#)
  - [太初忍禪師法嗣](#)
  - [天日秀禪師法嗣](#)
  - [印空海禪師法嗣](#)
  - [方湖本禪師法嗣](#)
  - [默堂照禪師法嗣](#)
  - [荊山理禪師法嗣](#)
  - [了禪能禪師法嗣](#)
  - [天寧宣禪師法嗣](#)
  - [東方裕禪師法嗣](#)
  - [洞庭潛禪師法嗣](#)
  - [寶峯柔禪師法嗣](#)
- [徑山下第十世](#)
  - [天日淮禪師法嗣](#)
  - [巫山松禪師法嗣](#)
  - [薦福澄禪師法嗣](#)
  - [石門澹禪師法嗣](#)
  - [萬峯方禪師法嗣](#)
  - [金臺覺禪師法嗣](#)
  - [牛頭祚禪師法嗣](#)

- [伏牛斌禪師法嗣](#)
- [碧峯顯禪師法嗣](#)
- [廣惠連禪師法嗣](#)
- [育王\[課/心\]禪師法嗣](#)
- [徑山下第十一世](#)
  - [東塢曉禪師法嗣](#)
  - [石門海禪師法嗣](#)
  - [斗峯琴禪師法嗣](#)
  - [三角喜禪師法嗣](#)
  - [西林頂禪師法嗣](#)
  - [天寧濟禪師法嗣](#)
  - [薦福\[巾\\*\(亓-十+山\)\]禪師法嗣](#)
  - [松竹寬禪師法嗣](#)
- [徑山下第十二世](#)
  - [敬畏空禪師法嗣](#)
  - [雲谷會禪師法嗣](#)
  - [龍池聞禪師法嗣](#)
  - [伏牛理禪師法嗣](#)
- [徑山下第十三世](#)
  - [徑山冲禪師法嗣](#)
  - [天目定禪師法嗣](#)
  - [不二際國師法嗣](#)
- [徑山下第十四世](#)
  - [徑山廣禪師法嗣](#)
  - [浮山智禪師法嗣](#)
  - [白馬彖禪師法嗣](#)
- [徑山下第十五世](#)
  - [普明用禪師法嗣](#)
- [徑山下第十六世](#)
  - [金明進禪師法嗣](#)
  - [永正元禪師法嗣](#)
- [卷目次](#)
  - 1.
  - 2.
  - 3.
  - 4.
  - 5.
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

## No. 1308-A 序

徑石滴乳者。山鐸在公所編。道脈淵源之書也。書垂成而在公脫去。其得法門人石源雲公。取而錄成之。以彰先人之用。以述宗統之全。其編始自徑山。採於曹石倉譚埽菴及錢牧齋三君子。當萬曆啟禎之際。天下皆知讀佛書。而能溯派尋源。惟三君子為最悉。三君子蓋親覩臨濟所書源流於徑山者也。是時鼓獅絃者如林。而袁了凡身受雲谷之祕。憨大師自謂親得谷公鉗鎚。博綜教典。橫豎妙用。如夢遊影響。諸書未嘗不全提也。故於雲居顓公。有特祝焉。或律以淑身。或教以演義。奚必人人豎拳。而曰如來真實妙義。遂如此發明哉。不知祕密真機。蚤已託之傳人。藏之雪谷。無事宣洩。真傍觀斯世之仰止矣。余因讀雲公徑石滴乳。而慨然有得於古人也。楊岐踞臨濟之正宗。應菴登金輪之正脈。其始蓋寥寥其人。而懸絲之繫。惟超宗者得之。何嘗板震而千人鉢鳴。鐘動而食指雲下。族鄧林之木。不足供其杖材。殲牝麋之種。不能充其拂塵耶。是編亦未必汁雪山之牛。鏤刻亦未必盈雲藻之棟。而讀其一語。恍若霹靂之震天關。識其德履。捷若六馬之臨平坂。直心顯然。真諦宛在。大鑑之霧。臨濟之祕。非賴是書。以發光哉。誠宜貯之香囊。書之樺皮。直如親見斷橋。面受徑山。而無所疑貳矣。非嫡承師乳。而何能若是耶。吾因有會於賢劫千佛之故也。昔毗舍離城。有千小兒。執弓杖以亂其國。王憂之。小夫人知之。於東樓上。呼千小兒。仰食其乳。左乳放五百道。右乳亦放五百道。千小兒各各滿足。皆知其母。夫小夫人。非真兒母。則千道之乳。何能悉出。惟千小兒。各知其母。各足其乳。而千道之乳。始為真滴也。天下之闡揚法席者。豈止千小兒哉。要皆未得其母者也。未得真乳。有左五百道。右五百道。在東樓間也。時東城固有樓矣。夫人懸兩乳。以待千小兒矣。或能於鏡交光處。一承摩頂。以入三摩地。則徑石滴乳之刻。吾知與正法眼藏羅湖野錄。現無見頂相於真丹世界矣。山鐸在公之為法門正統也。石源雲公之為師乳真滴也。惟具眼者自識之。

岿

康熙二十一年十月初六日楚廣濟學人舒逢吉康伯氏題於東衝之黃牛院

## 徑山滴乳集凡例

- 是書乃東林先師所彙集者。緣諸方燈錄。於臨濟正宗。斷橋下諸祖。或隱或現。多有僅存傳法偈而法語機緣闕如者。因是博攷祖錄。參以傳記。合成全書。集未竣。而先師辭世。存藁散失過半。(雲)遵先志。遍歷窮蒐。凡遇一言半句宗眼圓明者。靡不亟為採入。以完先師未了之願。抑亦少盡小子繼述之職云。
- 燈以傳道。統以繼脈。道之不明。統之不正。先聖之所憂也。先師之見法門之有壟斷。憂深而慮遠。故輯此書。真得憲章祖述之旨。今刪繁取要。詳略會同。俾後之學者開卷而有得焉。
- 滴乳集。單錄倫祖一派。因諸方燈錄。不以佛祖嫡傳慧命為重。專以我人私淑去取為乖。致令諸祖語錄行世者不多。壽梓者亦鮮。今詳採補入。以補諸燈之闕略。
- 是書本為流通宗眼。第真機兩輩。各闡一方一時。難以彙齊。惟先得者先書。後得者後紀。未得者俟補。
- 諸錄載無盡燈伏牛理儀峯象幻寄庭愍山清等。於未詳者。總未得其真也。今按諸公源流。收彼本師之下。俾知師承有在。弗至湮沒。
- 性空聞下出月潭澄。澄出薦福愷。愷出華山聞。聞出天目定。定出浮山智。智出妙峯理。其嗣裔久闡雲貴。不及採集。俟補。
- 黃檗有諸書。收在未詳。惟弘覺綴於大休隆下。(雲)閱大休錄。見有公敘。曰師於嘉靖二十一年示寂。越二年而余始生。又越十八年。方始行脚。至四十五歲。方得打開夢眼云云。據此有公。雖得大休心印。實未謀面。是書亦復收於未詳。不敢編入正宗。以紊統系也。
- 鷲湖心燈錄。載之未詳。其載機緣。與蘭風華山錄內。機緣相符。據此則師承昭著。何得云為未詳。但鷲湖示寂後。遙嗣者不收。

### 黃州石門後學機雲識

#### 徑石滴乳集目錄

##### 第一卷

徑山無準師範禪師(大鑿下第二十世臨濟下第十五世)

徑山下第一世

徑山範禪師法嗣

天台斷橋妙倫禪師

徑山下第二世

天台倫禪師法嗣

瑞巖方山文寶禪師 南華永宗達本禪師  
雪山法曇禪師 絕象鑒禪師  
竹屋簡禪師 藏室會珍禪師  
竹山如圭禪師 古田屋禪師(語別見)  
徑山下第三世  
瑞巖寶禪師法嗣  
天台無見先覩禪師 鳳山一源靈禪師  
松巖秋江元湛禪師 天台無盡祖燈禪師  
鏡堂古禪師(不列章次) 丁生居士  
古田屋禪師法嗣  
東澗珣禪師(語別見)  
徑山下第四世  
天台覩禪師法嗣  
福林無聞智度禪師  
鏡堂古禪師法嗣  
則中度禪師  
徑山下第五世  
白雲度禪師法嗣  
天界古拙俊禪師 太守密菴何居士(不列章次)  
第二卷  
徑山下第六世  
天界俊禪師法嗣  
道林無際明悟禪師 虎跑性天如皎禪師  
密菴何太守法嗣  
素菴田大士  
徑山下第七世  
東林悟禪師法嗣  
太岡月溪惟澂禪師 壞空成禪師  
妙峰玄禪師 廬山無為一禪師  
伏牛無礙鑒禪師 古庭善堅禪師  
東山楚山紹琦禪師 大定太虛冲禪師  
西禪雪峰瑞禪師 伏牛物外圓信禪師  
潔空圓通禪師 八峰寶月潭禪師  
不二圓禪師 德翁淳禪師(二人語別見)  
素菴田大士法嗣  
天寧和菴忠禪師 四明法中正堪禪師  
建寧佛跡頤菴真禪師  
徑山下第八世

太岡激禪師法嗣

太岡夷峯方寧禪師 牛頭古心寶禪師

東永福自秀禪師 靈隱性天宗杲禪師

天淵道堪一源禪師 德山古心安禪師

南陽峻中嶸禪師 天真毒峰本善禪師

五臺孤月淨澄禪師

壞空成禪師法嗣

光澤道惠禪師 斗峯德章淨滿禪師

妙峰玄禪師法嗣

風穴福緣廣禪師

廬山一禪師法嗣

神鼎寶藏淨玉禪師

伏牛鑒禪師法嗣

仰山無隱正道禪師 無邊古道通禪師(不列章次)

大瀉獨潭海昌禪師 西山古巖從定禪師

天竺行一秀禪師 龍牙鐵牛勤禪師

古庭堅禪師法嗣

波羅禪師 五臺顯淨倫禪師

洱水道菴居士

東山琦禪師法嗣

八峯性空聞禪師 金山僧寶禪師

中溪隱山昌雲禪師 海雲深禪師

湛淵齋禪師 濟川洪禪師

大雲興禪師 石經海珠祖意禪師

長松大心真源禪師 大悲一天智中國師

石經豁堂祖裕禪師 月光常慧禪師

翠微悟空真空禪師 玉峰如琳禪師

天成古音韶禪師 香巖古溪覺澄禪師

珪菴祖玠侍者 天溪凝禪師(語別見)

西禪瑞禪師法嗣

性空覺禪師 東明曉菴昇禪師

寶文洪印禪師 無相真禪師

大初性圓禪師 南竺橘禪師

太初忍禪師 天目秀禪師(三人不列章次)

潔空通禪師法嗣

黔中正法雪光通禪師 方湖德巖本禪師

印空海禪師 默堂照禪師(不列章次)

八峯潭禪師法嗣

護國無用文全禪師 東方古裕禪師(語別見)  
崇福大慧華禪師 天寧默堂宣禪師  
伏牛月天禪師 荊山理禪師  
了禪能禪師 翠峰山禪師(三人不列章次)  
天寧忠禪師法嗣  
徑山寂菴潛禪師 用剛宗軟禪師  
佛跡真禪師法嗣  
廣福天然浩禪師 別峰寶芳藏禪師  
白雲無量滄禪師 寶峰行菴柔禪師(不列章次)  
第三卷  
徑山下第九世  
太岡寧禪師法嗣  
天日寶芳進禪師  
天淵源禪師法嗣  
祖堂興禪師 棲霞突空昇禪師  
德山安禪師法嗣  
南嶽春山景禪師 西竺中天表禪師  
天真善禪師法嗣  
法華鏡堂明禪師  
洞山惠禪師法嗣  
巫山壽堂松禪師(語別見) 嵩山別傳宗禪師  
仰山道禪師法嗣  
能仁秋月以澄禪師  
古道通禪師法嗣  
西宗慶禪師(不列章次)  
八峯聞禪師法嗣  
薦福月潭寂澄禪師 三祖天淵銳禪師  
石門濟舟濱禪師 昭覺無礙通禪師  
香巖澄禪師法嗣  
成都西宗祐禪師 金山寂菴湛禪師  
龍門悟禪師法嗣  
司空碧天朗禪師  
性空悅禪師法嗣  
金山東巖亮禪師  
大雲興禪師法嗣  
玉峯鐵牛堅禪師  
石經裕禪師法嗣  
萬松曉堂滿禪師

無相真禪師法嗣  
少室南宗勝禪師  
淨慈休休禪師法嗣  
昭慶雪庭禪師  
性空覺禪師法嗣  
圓通夢菴覺禪師 玉泉能關主  
黃龍徹空通禪師  
南竺橋禪師法嗣  
寶鑑無聞明聰禪師  
太初忍禪師法嗣  
華亭無涯順禪師  
天目秀禪師法嗣  
雪巖祖清禪師  
印空海禪師法嗣  
萬峰普覺明方禪師(不列章次)東滄證果如福禪師  
方湖本禪師法嗣  
斗方隱峰禪師  
默堂照禪師法嗣  
太虛圓禪師  
荊山理禪師法嗣  
瀋山方溪清禪師  
伏牛天禪師法嗣  
金臺空幻大覺禪師(不列章次)  
了禪能禪師法嗣  
法幢金禪師 昭覺寶藏通禪師  
天寧宣禪師法嗣  
牛頭吉菴祚禪師 徑山天才英禪師  
翠峰山禪師法嗣  
伏牛文若斌禪師(不列章次)  
東方裕禪師法嗣  
碧峰天通顯禪師  
徑山潛禪師法嗣  
碧峰道瑩瑛禪師 異巖登禪師  
寶峰柔禪師法嗣  
育王傑峰[課/心]禪師  
徑山下第十世  
天目進禪師法嗣  
東塔野翁曉禪師

棲霞昇禪師法嗣  
石門無盡海禪師  
巫山松禪師法嗣  
斗峰古音琴禪師 白雲寶明鑑禪師  
西宗慶禪師法嗣  
大千照禪師(不列章次)  
薦福澄禪師法嗣  
天成無聞性愷禪師  
石門濱禪師法嗣  
石門佛勤宗紹禪師  
萬峰方禪師法嗣  
靈鷲中峰素禪師  
斗峰高禪師法嗣  
三角東巖喜禪師(不列章次) 西林無相頂禪師(不列章次)  
金臺覺禪師法嗣  
太平璉振宗禪師 徑山萬松林禪師  
牛頭祚禪師法嗣  
天寧法舟道濟禪師  
伏牛斌禪師法嗣  
白虎妙中玄禪師  
碧峰顯禪師法嗣  
天池月泉法聚禪師  
薦福傑禪師法嗣  
三祖天然慧禪師  
廣慧連禪師法嗣  
龍門無礙辨禪師  
育王[課/心]禪師法嗣  
松竹大方寬禪師  
徑山下第十一世  
東塔曉禪師法嗣  
敬畏無趣如空禪師  
石門海禪師法嗣  
七尖大休隆禪師  
斗峰琴禪師法嗣  
斗峰天真道覺禪師  
大千照禪師法嗣  
雙峰輝天興昶禪師  
天成愷禪師法嗣

龍池默菴慧聞禪師  
三角喜禪師法嗣  
南宗法印禪師  
西林頂禪師法嗣  
能仁濟舟法洪禪師  
天寧濟禪師法嗣  
胥山雲谷法會禪師 精巖冬溪方澤禪師  
天池聚禪師法嗣  
浮峰普恩上座(語別見)  
薦福愷禪師法嗣  
默菴慧聞禪師  
開福寬禪師法嗣  
伏牛無礙明理禪師  
第四卷  
徑山下第十二世  
敬畏空禪師法嗣  
徑山無幻性冲禪師 祇園性曙和尚(語別見)  
駱懶翁居士(有言志隻行世)  
雲谷會禪師法嗣  
曹溪憨山德清禪師  
龍池聞禪師法嗣  
天目蘭風真定禪師 鵝湖□□禪師  
伏牛理禪師法嗣  
佛巖不二真際禪師  
徑山下第十三世  
徑山冲禪師法嗣  
徑山南明慧廣禪師  
天目定禪師法嗣  
浮山朗目智禪師  
佛巖際禪師法嗣  
妙峰登禪師 白虎如幻禪師  
白馬儀峯方象禪師  
徑山下第十四世  
徑山廣禪師法嗣  
普明鴛湖妙用禪師  
浮山智禪師法嗣  
妙峰徹庸周理禪師  
白馬象禪師法嗣

天臺聞谷廣印禪師

第五卷

徑山下第十五世

普明用禪師法嗣

雲峰衡石悟鈞禪師 金明介菴悟進禪師

永正一初悟元禪師

徑山下第十六世

金明進禪師法嗣

栢山素弘真理禪師 萬年夢堂真倪禪師

安化世高本則禪師 金明東巖璨禪師

妙峰素穎鑿禪師 三角古壁文禪師

三塢主峯法禪師 金明晦巖炯禪師

三角天峰性禪師 金明別傳化禪師

海月天巖啟禪師 繡雪宦陳修禪師

衡山範禪師 雲門既白旭禪師

承天時現曇禪師 高峰雪子淨禪師

東林山鐸在禪師 藕菴竹菴衍禪師

三塢妙雲雄禪師 友可鐵容玄禪師

甘露逾祖覺禪師 牧園企賢清禪師

竺山吼菴證禪師 祖巖豐上座

夢菴書記 報恩松岫源禪師

太平素巖智禪師 翠峯斐公琦禪師

玉芝玄暉性禪師 普明雲菴量禪師

蓮花尼可度瑛 明心尼佛音戒

空諸羅居士 約菴施居士

牧公謙大士 道耕田居士

真和陸居士 真慧陸居士

汝諧卜居士 真毅朱居士

振聲許居士 真寄李居士

永正元禪師法嗣

報本冲默開禪師 東溪斷愚智禪師

淨土通濟行禪師 一莖證禪師

徑山下第十七世

栢山理禪師法嗣

隱崧忝生機璇禪師 寶如玉禪師

身雲編禪師

No. 1308

徑石滴乳集卷之一

大鑑下第二十世(臨濟第十六世)

杭州徑山無準師範禪師。劍州梓潼雍氏子。九歲依陰平山道欽出家。經書過日成誦。紹熙五年冬登具。明年次成都。坐夏正法。遇瞎堂高弟名堯者。請益坐禪之法。堯曰。禪是何物。坐底阿誰。師晝夜體究。一日於廁提前話。有省。

石門雲曰。首座善舞太阿。使百尺竿頭。做伎倆底。一見便能。死盡偷心。乾坤別構。所謂心不負人。面無慚色。

師謁育王佛照。照問。何處人。師曰。劍州。照曰。帶得劍來麼。師隨聲便喝。照笑曰。者烏頭子也亂作。

破菴。住秀峰日。有僧入室。菴打。逐至法堂。時師解曰。禪和家爭禪。亦常事耳。菴曰。豈不聞道我肚饑。聞板聲要喫飯去。師聞不覺。汗流夾背。

破菴。為靈隱第一座。師復從。一日同遊石筍菴。有道者請益曰。猢猻子捉不住。乞師方便。菴曰。用捉作麼。如風吹水自然成紋。師在傍大徹。

東林在曰。城門失火。殃及池魚。

牧雲門頌曰。城門失火臭烟薰。殃及池魚尾盡焚。無處更求三尺水。好看振鬣上青雲。

南澗問頌曰。氣飲長虹已食牛。血漫漫地照人愁。因風吹火無多力。春滿皇都四百州。

南嶽際頌曰。眉間霜劍倚天寒。試展鋒鋌海樣寬。石筍路逢沽酒店。三杯兩盞破愁顏。

石門雲頌曰。霜飛六月禍私門。殃及平民已覆盆。南北東西無處去。一拳打破鐵崑崙。

破菴付師法偈曰。我若不見時。汝應不見見。見見非自心。自心常顯現。未幾破菴過天童掃塔。師偕往。復拉月石溪。同遊台雁。至瑞巖雲巢。留師分座。夜夢。偉衣冠者。持把茆見授。翌日明州清涼專使至。師受請入院。見所伽藍神茅其姓。衣冠與疇昔所夢無異。陞座開法一香供破菴。三年遷焦山。期年遷雪竇。又三年被敕移育王。又三年嵩少林散席徑山。朝命以師補處。明年寺燬。師逆知其數。不動容經意。是年冬十月有旨。召入內廷。上御修政殿引見。師奏對詳明。上為色動。賜金襴僧伽衣。又宣入慈明殿。陞座說法。帝垂簾而聽大悅。賜號佛鑑禪師。三年寺成。閱六年復燬。

而多助雲至。不數年復還舊觀。去寺四十里。築室百楹。接待雲水。額曰萬年正續。正續西數百步。結菴一區。為歸藏所。上建重閣。祕藏先後所賜御翰。敞室東西。偏奉祖師與先世香火。遇始生日。為飯僧佛事。以贊冥福。蓋蜀乳師之。先祀遂絕。祠奉以旌孝慕。上聞嘉歎。

上堂。名不得。狀不得。取不得。捨不得。只麼得。且道。得箇甚麼。三人證龜成鼈。

問石乘頌云。滾滾紅珠非眼血。紙灰染作花蝴蝶。自從夢斷識莊周。亂撒金錢飄黃葉。

上堂。若論箇事。直是省要易會。多是諸人自作艱難。自作障礙。所以尋常東廊西廊。見諸人和南問訊。山僧便乃低頭相接。其實無他。只要諸人識得長老是西川隆慶府人氏。若識得。便與諸人打些鄉談。說些鄉話。如今且未說你識得長老。且各自知得自己鄉貫。還知麼。明州六縣。奉化八鄉。

上堂。五峰門下。百種全無。禪床迫窄。堂供蕭疎。脚下踏著底。破磚頭碎瓦片。面前撞見底。王獗獠李麻胡。恁麼薄福住山。真箇孤負先哲。良久。雖然如是。更點分明。

上堂。一夏已滿。無事不辦。遂府盃盂。功州磁碗。

淳祐戊申秋。師築室明月池上。榜曰退耕。乞老于朝。而舊疾適作。己酉三月旦日。陞座謂眾曰。山僧既老且病。無力與諸人東語西話。今勉強出來。將從前說不到的。盡情向諸人抖擻去也。遂起身抖衣曰。是多少。便歸方丈。

十五日集眾。區畫後事。親書遺表及遺書十數。言笑如常。其徒以遺偈為請。師執筆書曰。來時空索索。去也赤條條。更要問端的。天台有石橋。偈畢移頃而逝。

東林在頌曰。戰罷雄風笑倚樓。虎頭虎尾一齊收。時人不諳風雲色。腦後遭槌孰解羞。

停龕二七日。上遣中使。降香賜幣。奉全身塋於正續之側。塔曰圓照。

## 徑山下第一世(臨濟下十七世)

### 徑山範禪師法嗣

台州天台國清寺斷橋妙倫禪師。姓徐。台之黃巖人。母劉氏夢月而孕。年十八。於永嘉廣慈院落髮。見谷源於瑞巖。聞麻三斤話有疑。一日謁雲居。見山堂偶閱楞伽。至蚊蟲螻蟻無有言說。而能辯事處。頓省。

師往雪竇參佛鑑。鑑以狗子因何有業識。令師下語。凡三十轉。不契。師曰。可無方便乎。鑑舉真淨頌曰。言有業識在。誰云意不深。海枯終見底。人死不知心。師竦然良久。忽聞口聲。通身汗下。於是脫然契證。

徑山進頌曰。漏屋恰逢連夜雨。更多愁霧鎖柴門。忽然雲盡孤輪湧。疊青山插遠層。

一初元頌曰。頂門一擊汗如油。捉敗當年老趙州。自是黃河連底竭。一番驟雨一番愁。

天巖啟頌曰。用盡機關欲斷窮。板聲一擊頂門通。推開碧落松千尺。放出金烏子夜紅。

藕菴衍頌曰。三春鶯囀綠蔭叢。渙父從容渭水東。畢竟有貪香餌者。比來喜不浪施功。

龍門性頌曰。陣雲角曉怒風號。蟻穴珠穿戰愈高。欲遁賊身無處去。一回躍馬便衝霄。

護國鐸頌曰。錦衣公子醉田家。倚檻披襟看落霞。忽爾風翻荷葉動。池心獨露一枝花。

石門雲頌曰。相逢把手御街遊。歷亂春光四百州。電尾電頭通一線。黑風翻轉釣魚舟。

佛鑑付師法偈曰。真理直如絃。何言復何默。我今善付囑。表心本無得。鑑移育王。師皆分座。祇園遷瑞岩。後住淨慈。室中嘗學萬法歸一。以驗學者。凡下語不契。即趁出高峰。於此打失眼睛。

徑山進曰。斷橋老漢。固是婆心。不免教壞人家男女。高峰雖然打失眼睛。要且恩大難酬。金明要問。大眾。如何是萬法歸一。一歸何處。月似彎弓。少雨多風。

東林在曰。古佛垂慈。血心片片。如慈明置劍。秘魔擎叉。臨濟入門便喝。德山入門便棒。種種施設。要人死盡偷心。不落透路。瑞岩慣設虎奔。牢籠天下。高峰如此打失眼睛。大似平地撞彩。要且不識萬法歸一。

徑山廣頌曰。侵晨出去晚頭歸。赤脚鬢頭滿面灰。無底鍋燒無米飯。臭烟烽焯背尖吹。

上堂。德山低頭。夾山點頭。俱抵豎起手指頭。玄沙築破脚指頭。拈拄杖曰。都來不出山僧拄杖頭。何以見得。卓拄杖曰。一葉落天下秋。

希覺銳曰。德山低頭。刻舟求劍。夾山點頭。剝肉作瘡。俱抵豎起手指頭。栽角呼牛。玄沙築破脚指頭。因誰致得。大眾要會教忠拄杖頭麼。孤月照臨山嶽淨。幾多人□此中休。

牧公謙頌曰。□奇與百怪。只在一毫端。拈却毫端看霜花六月寒。

讚夫峻頌曰。幾座畫閣瓊樓。數條花街柳巷。從頭說與遊人。總在長安市上。

濟北弘頌曰。西風昨夜到梧桐。零落名園思未工。婦婿直教歸未得。幕簾斜對蓼莪紅。

龍門淵頌曰。細雨斜風一葉舟。渠儂遲俊不知休。一聲牧笛傳幽谷。紅蓼汀前起白鷗。

上堂。舉雲門示眾。乾坤之內。宇宙之間。中有一寶。祕在形山因緣。頌曰。隱隱烟村聞犬吠。欲尋尋不見人家。忽逢橋斷溪迴處。流出碧桃三四花。

上堂。舉慈明室中。插劍一口。草鞋一雙。水一盆因緣。頌曰。百花叢裏[韋\*登]鞭過。俊逸風流有許多。未第儒生偷眼覷。滿懷無奈舊愁何。

上堂。荊山有玉。獲得者不在荊山。赤水有珠。拾得者不在赤水。衲僧有無位真人。證得者出人在面門。驀拈拄杖曰。會麼。幽州江口石人蹲。

上堂。舉達觀穎示眾。七佛是性隸。萬法是心奴。且道。主人翁在甚處。自喝曰。七佛以下出頭。又自諾曰。各自祇候。師曰。喚七佛為性隸。指萬法為心奴。達觀自謂有出身路。及平自喝自諾。又是奴隸邊事。主人翁何曾夢見在。大眾要見麼。以拂子拂一拂曰。曉來一陳春風動。開遍園林百樣花。

悅堂閻參。師問。臨濟遭黃檗三頓痛棒是否。曰是。師曰。因甚大愚肋下築三拳。曰得人一牛。還人一馬。師頷之。閻禮拜。

師一日入堂。見閻危坐屹然。師向耳邊。吹一吹。閻張眸視師欲言。師震聲一喝。閻後謂眾曰。佛法不是小可。昔被淨慈一喝。只得魂飛魄散。

臨終集眾入室。作書辭諸山及魏國公。公饋藥不受。又遣人問曰。和尚生在天台。因甚死在淨慈。師曰。日出東方夜落西。書偈而化。

金明旭曰。淨慈恁麼答話。未免俗官看破。

宜林能別曰。不恁麼答。亦被俗官看破。

## 徑山下第二世

### 天台倫禪師法嗣

台州瑞巖方山寶禪師。潭陽葛氏子。隨父宦遊。一日于杭之淨慈飯僧。偶閱六祖壇經。恍如舊習。乃舉黃梅衣鉢因緣。問鞏禪師。既

不會佛法。為甚又紹祖位。鞏曰。不但祖師。大有人不會佛法。亦紹祖位。師曰。和尚還紹祖位否。鞏曰。若紹祖位。即會佛法。

黃龍無上禪和尚曰。大小淨慈。答話不了。

劍叟是曰。淨慈大似富嫌千口少。貧恨一身多。

佛鑑。奉詔住徑山。師與天界日等。結侶往參。盡得旨要。一日忽疑興化四方八面來話。遂請益佛鑑。鑑曰。老僧不能為汝說。汝但自看。師請益至再。終不為說。指參石橋。師稟命至彼。罄其機用。橋皆不諾。師猛力參究。請益至十一度。一晚危坐。忽覩燈光面前豁然。次早入方丈。橋曰。子捉賊也。師禮拜曰。賊已收下。請和尚驗贓。橋舉萬法歸一。師答。橋亦不肯。齋後普請。師手忘所舉。橋驀拈菟根示曰。是什麼。師乃大悟。

圓通究止參和尚落堂。舉石橋拈菟根方山大悟因緣。問復且。你道得力在甚麼處。且曰。方山在佛鑑得體。石橋得用。如風吹水自然成紋。若謂悟在菟根。則埋沒先代。參深肯。

徑山進頌曰。菟根拈起骨毛寒。好肉無端索灸瘢。悟得單傳真祕訣。風前總是活人丹。

東林在頌曰。抵死攀鞍不肯休。平原奪鼓覓封侯。路傍藥餌纔拈起。化作神仙上酒樓。

石門雲頌曰。洗清凡骨躍龍門。振鬣揚鬐鼓要津。那畔不棲無影象。從教寶藏自甘貧。

橋付師法偈曰。本無迷悟人。迷悟自家討。記得少壯時。而今不覺老。即繼橋席。凡僧入室。概豎拂子曰。是甚麼。僧擬議。直打出。二十年。少有契其機者。

黃尖穎戟易禪師曰。古人門庭。恁麼施設。近時搖尾乞憐。惟恐蟻不解腥。蠅不來臭。

石門雲曰。祇如師僧家。識得拂子。又作麼生。良久彈指一下。

金明旭。拈石門語。識得拂子。買草鞋行脚。

無盡燈參。師豎拂子曰。是甚麼。燈亦曰。是甚麼。師曰。與我除却四大。別道一句。燈從東過西。師垂左足。燈從西過東。師垂右足。燈近前叉手而立。師以拂子便打。燈禮拜。

金明旭曰。禮拜即得。要且不識拂子。

無盡問。達磨西來。未審傳箇甚麼。師曰。你道。東土人曾少甚麼。盡曰。既不少。神光為甚立雪斷臂。師曰。止圖破家蕩產。盡於言下大悟。

僧問。曹溪水派派朝東。瑞巖水為甚流向西。師曰。上座好惡不識。曰比來問水。答好惡不識那。師曰。瞎漢果然不識便打。問如何是佛。師曰。逃人犯夜。問如何是祖師西來意。師曰。正抓

著我癢處。問如何是般若體。師曰。八角磨盤。曰如何是般若用。師曰。八角磨盤空裏走。

結制上堂。煽烈燄于大千界內。直下片雪飛舞。舉鉗錘于妙密場中。就裏點鐵成金。赤沙灘上。杖林山中。箇箇淪砒霜飲鳩毒。冰稜上走。劍刃上行。所謂鑊湯無冷處。汝等抱定枯桐。守住死灰。何日豆爆。西菴今日為汝爐內添炭。好著精彩。

上堂。橫按拄杖。顧視大眾曰。彼此彼此。便下座。

上堂。諸聖情存。見網難透。不立階級。曠劫無門。般若之智常明。真如之體獨露。諸方學者。心地不明。皆因邪師雜糅。如蠶作繭。似蛇戀窟。自謂到家。不肯見人。間有聰明意識卜度。儻侗真如。瞞頂佛性。誠可愍哉。

師住瑞巖。常設三問。以驗學者。曰真正出格高流。如良馬見鞭影而行。中下之士。何堪□冀□□□□□。撐鐵船過海底人。為甚麼向針孔裏叫屈。

髻珠嘯月恒和尚頌曰。黃河遠上白雲間。一片孤城萬仞山。羌笛何須怨楊柳。春風不度玉門關。

既是臨濟大師。為甚入拔舌犁耕。

石門雲頌曰。澄潭無水月無緣。滿載嬋娥醉碧天。蔽垢偶趨金殿過。橫身帶惹御爐烟。

玉峰乾頌曰。邊霜昨夜墮關榆。吹角當城片月孤。無限塞鴻飛不度。秋風吹入小單于。

那邊不立。者邊不行。截斷中流。為甚不住。

黃尖欽頌曰。半夜回舟入楚鄉。月明山水共蒼蒼。孤猿更叫秋風裏。不是愁人亦斷腸。

護國鐸頌曰。直下全提殺活該。聲前無路出塵埃。海門迸出金星子。萬象森羅吼似雷。

師一日。為眾挂牌。入室垂語曰。南泉斬却猫兒時如何。眾下語不契。適有一僕。在傍曰。老鼠做大。師笑曰好一轉語。只是不合從你口裏出。

全真請上堂。千斤石碓水上浮。四兩葫蘆沉到底。火燒狗尾猪頭焦。南辰竄入北斗裏。

至元元年正月初七日。書偈曰。來無一物。去無一物。盡却今時。虛空鐵櫬。擲筆而逝。

南華永宗本禪師。頌船子公案。笑中棄却竹林寺。將謂華亭有許多。窮性命於橈下喪。看來成敗自蕭何。

雪山法曇禪師。臨終謂眾曰。老僧有一件事天來大。諸人還識麼。維那曰不識。師推出枕头曰。者箇聲。便化。室中異香。經時不散。

絕象鑑禪師。頌洞山不安。洞山有路透雲巖。絕處教通到者難。拄杖頭邊開活路。方知不隔一毫端。  
竹屋簡禪師。頌鼓山聖箭。青童雙勒玉驄嘶。淡白春衫綠帶圍。半夜歸來花底月。金鞭敲落亂紅飛。  
藏室會珍禪師。頌洞山辭雲巖。掘起藍田一坐墳。珊瑚瑪瑙合粧成。驢駝馬載休云寶。禍及兒孫盡滅門。  
僧問。臘月火燒山意旨如何。師曰。徧尋無莖草。  
竹山如圭禪師。脫略異常。一日遊佛巖。聞風吹殿角鈴聲。倚杖脫去。茶毗得舍利無數。塔於佛巖之陰。

### 徑山下第三世

#### 瑞巖寶禪師法嗣

台州天台無見先覩禪師。台之僊居葉氏子也。宋咸淳乙丑五月六日誕。師少而資性穎秀。嗜讀書。過日成誦。父一日會沙門善公。過而識之曰。此法器也。宜毋滯鄉里。率敬信。善許諾。逮冠。從古田屋和尚薙染。於郡之天寧登具。俾歸侍司。旦夕以此道策進。參方山於西菴。師問。如何是佛法大義。山張口吐舌示之。師罔措。山以拄杖趨出。往參天封珍。理前話未竟。珍亦打。復返西菴。途中把滑有省。及見山。山問。汝返何速。師曰。和尚此時打某甲不得。山曰。天封與你道甚麼。師述途中因緣。山又打。

惟範琪曰。方山與麼提持。可謂烜赫古今。華頂若非臨濟兒孫。幾乎打破蔡州。

石門雲頌曰。一箭西沉勢已危。更加一箭破重圍。幾多撥刺生擒者。猶把弓梢伴酒卮。

師築室華頂。精苦自勵。因作務次。渙然頓釋所疑。往西菴呈解。山一見契之。乃付偈曰。此心極廣大。虛空比不得。此道只如是。受持休外覓。

調實和頌曰。九轉靈丹仍化丹。紫霞籠壁眾星攢。擘開金鼎火光噴。傾出直教天地寒。

萬峰蔚。久侍座下。師問。萬法歸一。一歸何處。蔚進前問訊叉手而立。師曰。如何是道。蔚曰。道無可道。師曰。不道有。不道箇甚麼。蔚曰。正要和尚疑著。師曰。疑著即錯。蔚曰。不疑亦錯。師便喝。蔚亦喝。師曰。言無再響。蔚拂袖而出。

示眾。風冷冷。日杲杲。簷蔔花開滿路香。池塘一夜生春草。堪悲堪笑老瞿曇。四十九年說不到。阿呵呵。拍禪床一下。

上堂。若論此事。三世諸佛。一大藏教。詮註不及。天下老和尚。拈提不起。直饒有傾湫之辯。倒嶽之機。一點也用不著。諸仁者。饑則喫飯。困則打眠。熱則乘涼。寒則向火。一一天真。一一明妙。倘得踏步向前。論禪論道。誤將魚目為珠。錯認橘皮為火。不見道。大機須透徹。大用須直截。不識東家孔丘翁。却向他邦尋禮樂。卓拄杖曰。錯。復舉龐居士問馬大師。不與萬法為侶者。是甚麼人。馬祖曰。待汝一口吸盡西江水。即向汝道。士有省。師頌曰。一口吸盡西江水。鷓鴣啼在深花裏。縱饒直下便承當。何啻白雲千萬里。

小參。過去諸如來。斯門已成就。夢裏求形。水中捉月。現在諸菩薩。今各入圓明。捕得老鼠。打破油甕。未來修學人。當依如是法。彼自無瘡。勿傷之也。無計較中。翻成計較。無途轍中。翻成途轍。殊不知。屠房酒肆。全彰古佛家風。鬧市紅塵。顯出祖師巴鼻。若也舉。一明三。目機銖兩。何啻白雲萬里。嘎。花開花落任風吹。自有清香滿天地。

示徐直翁。長夏獲以同居。巖間松下。一語一默。喜不自勝。且道。與古人夏中不聞正因兩字。是同是別。請直翁下一轉語。機先著眼。未是俊流。昔汾陽參七十餘員善知識。後見首山。問百丈卷席意旨如何。山曰。龍袖拂開全體現。汾又問。師意如何。山曰。象王行處絕狐踪。汾陽於此大悟。禮拜起曰。萬古碧潭空界月。再三撈攬始應知。傍有僧曰。汝見什麼道理。便乃自肯。汾曰。正是我放身捨命處。看他古人。終不肯自小結果。參禪縱有所省。若不見人。謂之癡禪。悟迹不除。翻成籠檻。一切處為之禁制。坐在勝妙界中。前輩謂之鶻臭布衫。最難卸却。更宜審諦。第一不得向黑山下鬼窟裏作活計。第二不得向急水上打毬子。四威儀內。急切用工。驀然拶破面門。元來只是舊時人。更無絲毫為障為礙。言多道遠。勉之。

元統甲戌五月一日遺誡。汝等出家。當行出家之行。當念四恩難報。信施難消。努力以道為重。不可虛度時光。常住十方僧物。為老病故。毋得競爭人我。增長無明。鬪搆是非。戒之慎之。來日煩大眾。早為焚化。不須剃頭。不用洗浴。一爐猛火。千足萬足。初二日辭世偈云。現成句子。不妨舉似。處空撲落。須彌起舞。奄然而逝。壽七十。臘五十。即以卒之九日茶毗。收舍利。建塔於寺西。諡妙明真覺禪師之號。塔曰寂光。

杭州鳳山一源靈禪師。參方山於瑞巖。充堂司。一日入室。請益趙州勘婆子話有省。後住鳳山。上堂。舉世尊陞座文殊白椎公案。師曰。世尊已是錯說。文殊已是錯傳。新鳳山今日已是錯舉。會麼。字經三寫。烏焉成馬。

明州松巖秋江元湛禪師。久從絕象遊。後參方山得旨。偶遊明之松巖。愛其清勝。不忍去。遂趺坐石上。俄有二虎。踞坐其側。若護衛狀。師命之伏。枕其背熟睡。山民異之。即其處剏精藍以居之。師不涉世事。法施之外澹如也。將化別眾。就龕說偈曰。洗浴著衣生祭了。跏趺晏坐入龕藏。花開鐵樹泥牛吼。一月長輝天地光。復為眾曰。十五年後寺當火。啟龕則火可止。至期果然。眾丞開龕。師神色如生。爪髮俱長。

天台上雲峰無盡祖燈禪師。四明王氏子。參日溪詠公於天寧。問生死事大。無常迅速。乞賜指示。溪曰。十二時中。密密參究。忽然觸著。却來再問。師抗聲曰。無常迅速。生死事大。語未終。溪便喝。師遽禮拜。溪曰。見何道理便爾作禮。師曰。開口即錯。溪頷之。尋參方山得法。卓錫上雲峰。影不出山五十年。

洪武二年二月八日示微疾。夜將半。顧左右曰。天向明乎。曰未也。或曰。和尚正當此際何如。師破顏笑曰。昔德山坐疾。僧問。還有不病者麼。德曰有。曰如何是不病者。德曰。阿啍阿啍。師良久曰。如此喚作病得否。眾無語。師曰。色身無常。早求證悟。時至。吾將去矣。侍者執紙求偈。師曰。終不無偈便未可死耶。侍者請益堅。乃書偈曰。生滅與去來。本是如來藏。撈倒五須彌。廓然無背向。投筆端坐而逝。

丁居士。素以針工。在方山座下久之。冀明本分。山惟東敲西擊。間毀罵諸方。凡有言說。皆流俗鄙士。老僧不欲以惡毒中汝。丁一日。剔琉璃有省。書偈呈山。提起提起。放下放下。者點光明。照天照地。山喜其行業淳素。乃印可之。

## 徑山下第四世

### 天台觀禪師法嗣

處州福林白雲智度禪師。姓吳。郡之麗水人。年十五從假禪師剃髮。深習禪定。徧參無有可其意者。復還里之白雲。就澄禪師故基。築室居之。後訪淨慈西峰。俱不契。晚侍無見。問西來密意未審如何。見曰。待娑羅峯點頭。即向汝道。師以手搖拽擬答。見便喝。師曰。娑羅峰頂。白浪滔天。花開芒種後。葉落立秋前。見曰我家無殘羹剩飯也。師曰。此非殘羹剩飯而何。見頷之。師禮拜。

宜林能曰。當日無見祖翁。推倒華山。壓殺赤縣神州。三百八十四家人。直教巨靈擡手不及。而今舉揚臨濟宗旨。石橋綱要。教他百千萬億娑羅峯。一齊點頭。猶未許他。何故。換骨洗腸重整頓。通身是眼更須參。

石門雲頌曰。張騫踏碎崑崙頂。雲鎖懸河凍鎖津。劫外長風幸有在。一時吹綻上林春。

金明旭頌曰。泣發窮途逢驟雨。攀鞍抵死到長安。隴頭凱奏神明府。萬國山河一統看。

見付師偈曰。至大是此心。至聖是此法。燈燈光不差。了此心者達。師辭。見囑曰。昔南嶽受大鑑記莛。後得馬祖授以心法。針芥相契。不在言多。勿掉三寸舌誑人。須真正見解。著于行履。方為報佛深恩耳。師佩服久之。復往長沙。見方普雲居。謁小隱大。至正甲午。還福林。尋主龍泉普慈。遷武峰。太守何密菴參。師舉。白雲謂五祖曰。有數禪客。自廬山來。皆有悟入。教伊說。亦說得有來由。舉因緣問伊。亦明得。教伊下悟亦下得。祇是未在。既有悟入。因甚未在。菴微笑。師曰。五祖道。吾因茲出一身白汗。便明得下載清風。你作麼生。菴拂袖便行。師曰。居士且仔細。菴更不迴首。

復且問圓通。白雲舉下載清風。密菴拂袖便行。意作麼生。通曰。你如何會。且曰。莫是他放捨身命處麼。通曰。如是如是。栢山理頌曰。尋得桃源好避秦。無端却被賊來侵而今匹馬溪前過。敗國亡家恨轉深。

東林在頌曰。一曲平沙鋪落雁。陽春白雪卒難和。子期去後無知己。消得枯桐恨幾多。

洪武己酉。詔徵天下高僧。建法會於蔣山。師應詔會。事解。嚴由京口。過虎丘。禮隆祖塔。轉至杭州。州人奉居虎跑。秋趨華頂。庚戌春示微疾。仍還福林。沐浴更衣。索筆書偈曰。無世可辭。有眾可別。大虛空中。何必釘橛。擲筆而逝。茶毗舍利五色。塔于院西。世壽六十七。臘五十三。

### 鏡堂古禪師法嗣

平湖則中度禪師。上堂。結制來。天陰四十日。今朝晴明好曬眼。雖然。臂肘不向外曲。諸人分上。也要檢點分明。上堂。秋水潔秋雲白。秋到梧桐風瑟瑟。江上芙蓉落彩紅。幾人夢斷識莊蝶。

### 徑山下第五世

### 白雲度禪師法嗣

金陵天界古拙俊禪師。松陵人。少有神聰。日記千言。蒐窮羣典。則曰。吾儒風規之儀。老莊幻化之術。惟佛性義理智海淵深。吾實不欺。若欲窮諸玄辯妙悟真宗。無如禪道。年二十。往越州日鑄寺祝髮。遍扣諸方。不能灑脫。遂結伴歸里。立限壁觀九年。每三年。然一指。歷然三指。一日忽然瞥地。聞白雲門風孤峻。學者罕入其室。師欣然往謁。雲一見器之。即留首眾。

師一日請益從上宗旨。雲上堂舉。世尊拈花。平地骨堆。迦葉微笑。忍俊不禁。二俱翻成特地。師豁然大悟。以手搖曰。止止。雲擲拂子下座。師隨入方丈。雲詰之曰。你適纔見箇甚麼便與麼。師曰。若有見可見。則辜負和尚了也。雲深肯。

東林在曰。當門按劍。魔佛形消。毒鼓一搥。人天膽喪。其聞聲不死者。原不在數。如風穴上堂。舉世尊以青蓮目。顧視大眾。乃曰。正當恁麼時因緣。首山瞥爾自肯。又瀉山撥火。洞山覩影。俱皆聞聲即喪。古拙纔問從上宗旨。逮白雲輕輕搥動毒鼓。便解分身塵刹。得非靈丹九轉乎。

石門雲頌曰。水晶宮出水晶水。太液池翻太液波。一夜好風吹不足。天明無奈雪深何。

穎戟易頌曰。多年故。舊忽相逢。逞興登樓話熱眾。最是一般難訴處。垂垂珠淚透心紅。

白雲付師法偈曰。心中有自心。法中有至法。我今可付囑。心法無心法。眾欲推出世。師遁跡出山。留偈曰。半載相依唱祖機。幾番談道奉嚴威。出山便說歸時路。又是重添眼上眉。韜光巖壑三十餘年。有平生最愛隈巖壑。三十餘年懶送迎之句。

師住南極日。單舉無字勘驗來學。諸方時號南無字。洪武間。奉旨剃度千僧。至繁昌八峰山。眾請東婁山開堂。普說示眾。禪之一字。亦是強名。云何曰參。在信而已。擬議即乖。開口即錯。若是發心不真。志不猛利。者邊經冬。那邊過夏。今日進前。明日退後。久久摸索不著。便道。佛法無靈驗。却向外邊記。一肚抄部。如臭糟甕。相似是者般野狐精。直饒到彌勒下生。有甚交涉。真正道流。若要脫生死。須透祖師關。祖關透。生死脫。不是說了便休。要將從上諸祖。做箇樣子。趙州老人。四十餘年不雜用心。為甚麼事。長慶稜公。坐破蒲團七箇。為甚麼事。香巖老師。四十年方成一片。為甚麼事。乃至歷代真實履踐。克苦勵志。為甚麼事。山僧今日口喃喃地。引古驗今。為甚麼事。諸禪德。既有從上不惜身命。積功累德。妙悟親證的樣子。何不發大勇猛。起大精進。對三寶前。深發重願。若生死不明。祖關不透。誓不下山。如是發願之後。截斷千差路頭。不與萬法為侶。向長連床上。七尺單前。高

挂鉢囊。壁立千仞。寬立限期。急下手脚。盡此一生。做教徹去。若辦此心。決不相賺。我今為汝保任此事。終不虛也。

上堂。八峰今日。披毛戴角。銜鐵撻鞍。負五須彌。遊四大海。無處藏竄。性命總在諸人手裏。幸是可憐生。若是箇平分風月。把守封疆底。自不走作。直須者裏一搗粉碎。

上堂。魚躍於淵。不能躍於階級之上。太末蟲到處能緣。不能緣於火燄之上。衲僧家。超佛越祖。腰包天地。鼻孔一缺。不能補滿。良久曰。又爭怪得。

上堂。龍興海底。浪湧山頭。不疾一刻。不遲一刻。石火電光捫不及。卒風暴雨避不及。有般漢。向者裏橫拖倒拽。未免犯手傷鋒。殊不知。一聲霹靂青霄外。雨霽雲收片月孤。

上堂。南方火爐頭。有箇無賓主話。至今三十年。無人舉著。趙州恁麼道。已作屎臭氣。諸人還撩起便行。劍刃上走麼。徧地橫屍。直下免得麼。八峰今日為汝等揭示去也。汝等也須自救一半。永樂丁亥。復奉旨天界。一日示疾。書偈曰。兀兀突突。運運騰騰。都來打碎。徧剎徧塵。擲筆瞑目而逝。塔全身塔於八峰山。

## 徑山下第六世

### 天界俊禪師法嗣

普州道林月幻無際明悟禪師。別號蚕骨。蜀之安岳通賢鎮莫氏子。年二十出家。請益老宿坐禪之要。後往樓山。訪清菩薩。清誨以趙州無字話。師乃縛竹為菴。研勵無懈。四指大書。帖亦不顧。只是拍盲做鈍工夫。西江悟首座。指參天界。客無念。過松隱。咸皆稱賞其志。及見白雲。雲舉萬法歸一問師。師答。雲乃喝出。一晚經行廊下。雲入堂遂擒住曰。大眾快將火來。老僧擒下一箇賊。師曰。是家內人。雲以手掩師口曰。如何是家內事。速道速道。如是有省。

宜林能頌曰。大冶紅爐烹佛祖。規模鎔盡片時間。歸來古路橫秋色。拄杖消飛日月斑。

石門雲頌曰。風來赤水珠含碧。月到藍田玉吐光。策馬巫山十二峽。一聲猿斷九回腸。

白雲一日。謂師曰。八峯汝師也。毋宜滯此。師返八峰。峰曰。還我照用來。師曰。若有照用。即成障礙。峰曰。者廝著空。佛也救不得。師曰。有無俱寂滅。空佛悉皆非。峰謂侍者曰。者僧有福德相。拈拄杖靠椅坐。命師供說行脚。師為直敘。峰曰。你且去。我不知你者搵工夫。師一日。復上方丈。峰震聲一喝。拈拄杖。作打

勢。師呈身就棒。峰曰。我棒頭有眼。不打你者般死漢。拽拄杖便出。師拱立不動。峰復還坐。驀筍問曰。大地平沉。你在甚麼處。師曰。全露法王身。峰曰。萬法歸一。一歸何處。速道速道。師曰。不道。峰曰。因甚不道。師曰。亘古亘今。峰曰。亘古亘今且置。你在西川。什麼物恁麼來。師良久。峰曰。啞子得夢向誰說。一日峰。為師更號無際。師曰。恁麼則無際亦未在。天下老和尚。盡向者裏成道。歷代祖師。盡向者裏成佛。即今有說佛說祖底出來。盡教遣出門去。不如某甲者裏齣齣打睡。峰笑曰。者漢此後。不受人瞞去也。乃付偈曰。一道不心光。三際十方明。何如明白中。有明有不明。

師辭。峰曰。路逢達道者。不將語默對。將甚麼對。師曰。劈面攔腮掌。擬議喪却渠。峰曰。子深得大機之用。師出世道林。

古庭參。師曰。子將從前做工夫處。親似一遍。庭實供說。至見諦處。叉手默然。師曰。子見諦處。如何與我不同。庭以兩手大展曰。者箇非別。師曰。者箇還著言句也無。庭曰。實無一字。師曰。只此無一字處。吾為汝證明已竟。

楚山參。師曰。數年來。住在何處。山曰。我所住廓然無定在。師曰。汝有何所得。山曰。本自無失。何得之有。師曰。莫不是學得來者。山曰。一法不有。學自何來。師曰。汝落空也。山曰。我向非我。誰落誰空。師曰。畢竟若何。山曰。水淺石出。雨霽雲收。師曰。莫亂道。只如佛祖來也不計。縱你橫吞藏教。現百千神通。到者裏。更自不許。山曰。和尚雖見把斷要津。其奈勞神不易。師拍膝一下曰。會麼。山便喝。師笑曰。克家須是破家兒。恁麼幹蠱也省力。山掩耳而出。

師至晚復召山詰曰。汝將平昔次第發明處說來。山從實具對。師曰。還我無字意來。山曰。者僧問處偏多事。趙老何曾涉所思。信口一言都吐露。翻成特地使人疑。師曰。如何是汝不疑處。山曰。青山綠水。燕詩鶯啼。歷歷分明。更疑何事。師曰。未在更道。山曰。頭頂虛空。腳踏實地。師曰。亦未在。更道。山乃禮拜。師曰。如是如是。

興龍在曰。道林門墻千尺。得其堂奧者或鮮矣。宗廟之美。百官之富。深固幽遠。無人能到。偶披胸襟。從卍字中。湧出百寶光明雲。與楚山相見。楚山道。頭頂虛空。腳踏實地。將謂有多少奇特。

僧問。透水透沙時如何。師曰。硬不破軟。

玉峰乾頌曰。透透何曾透那邊。秋光萬頃碧連天。一聲漁笛千門曉。釣罷歸來月滿船。

正統九年。應詔說法。上大悅賜紫。加妙心普濟禪師之號。

上堂。堯風清宇宙。舜日耀乾坤。紫閣傳丹詔。靈山一會新。復舉。憲宗迎佛舍利入大內。現五色光。百僚皆賀。惟韓愈端立。帝問。百僚皆賀。卿為甚不賀。愈曰。臣曾看佛經來。佛光非青黃赤白相。此是龍神阿助之光。帝曰。如何是佛光。愈無對。師代曰。陛下聖明。難逃智照。

石門雲。聖節上堂。舉公案畢曰。隆恩法門龍象。憲宗一朝天子。雖然。賓主互叶。道合君臣。舉見千載一時。未免撿點。石門遇此太平盛世。皇上聖節。有問如何是佛光敢道日月光天德。山河壯帝居。

上堂。踞虎頭。把虎尾。未是衲僧極則。拈拄杖。喝一喝。下座。上堂。隆恩一冬。百種俱全。祇少箇推筭的。所以屬牛人。撞著露柱。

上堂。德山托鉢。饑虐逼人。普化搖鈴。大似眼熱。雲門餅趙州茶。從頭勘過。何異推門落臼。將錯就錯。若是七彎八彎。三曲四曲。一任銀山鐵壁。空出衲僧爪牙。不然。饒伊向佛肚裏過來。也只是箇能行的矢橛。

上堂。荒草渡頭開正眼。如披雲霧見青天。平地上撞彩去。獅子兒頓增勇猛。把手拽向百尺竿頭。一錐一筍。尿急尿急。一總放過。三十年後破草鞋。蓋得龜殼。住。隆恩替你道箇轉身句子。

杭州虎跑性天如皎禪師。四明周氏子。從正菴中芟染。謁古拙和尚。領鉗錘。一夕推簾見月有省。乃曰。元來恁麼。翌旦趨見拙。便震聲一喝。拙曰。如貧得寶耶。師曰。寶即不得。得即非寶。拙曰。憑何如是。師近前問訊。叉手而立拙曰。還我向上一句來。師便掩耳而出。復呈偈曰。午夜推簾月一彎。輕輕踏破上頭關。不須向外從他覓。只麼怡怡展笑顏。拙為助喜。後住武林虎跑。臨終示眾。文章佛法空中色。名相身心柳上烟。唯有死生真大事。殷勤了辦莫遷延。大眾且道。如何了辦。良久。吾今無暇為君說。聽取松風澗底聲。語畢而逝。龕停七日。顏色如生。

### 何密菴居士法嗣

楊州田素菴大士。示眾。近來篤志參禪者少。纔提箇話頭。便被昏散二魔纏縛。殊不知。昏散與疑情。正相對治。信心重則疑情必重。疑情重則昏散俱無。

徑石滴乳集卷之一

徑石滴乳集第二卷。永遠流通。伏願共明般若。道果恒新。

徑山下第七世

東林悟禪師法嗣

金陵太岡月溪澗禪師。禮圓照寺無著出家。精究天台止觀。有方僧謂師曰。你向後為法門甘露。毋久滯此。師乃請益佛法大意。僧令自看。一日偶閱傳燈。見地藏舉肇論曰。天地與我同根。萬物與我一體。始知山河大地。草木昆蟲。都善法要。自此一錫徧參。最後至東普道林。呈所見。林不諾。師以林強抑。出不遜語辭。林知是法器。遂負囊送至山門。忽指黃犬曰。者畜生。為甚有業識無佛性。師於言下大悟。

太陽聞禪師曰。道林垂鈎四海。月溪曳裙龍門。雖然通身偏身。未免龍頭蛇尾。還有為月溪攬鎗奪鼓者麼。出來。與拄杖子相見。

道林一日。舉無字示徒。師在傍深得奧旨。付偈曰。我無法可付。汝無心可受。無付無受心。何人不成就。

石門雲曰。牛喫禾馬腹脹。復頌曰。拈出當陽鬼見愁。撩天索價許誰酬。一聲布穀千林曉。春滿皇都四百州。

毒峯善參。師問。如何是無字。曰本善一向。隨人道是箇無字。今日看來。是口金剛王寶劍。師曰。如何是金剛王寶劍。曰寒霜皎皎。輝古騰今。師曰。還我劍來。曰擬動即犯他鋒鋌。師曰。橫按當軒時如何。曰佛來也殺。祖來也殺。師曰。老僧來擗。曰亦不相饒。師曰。殺敗後如何。曰且喜天下太平。

師住太岡。上堂。揚眉瞬目也不得。不揚眉瞬目也不得。揚眉瞬目不揚眉瞬目總不得。太岡與你。二便二。一便一。還得麼。一僧出。師便打。僧喝。師又打。僧連喝兩喝。師曰。你說好喝那。僧擬議。師便喝。

景泰初。應詔住廣恩寺。上日臨聽法甚悅。賜號為慈普禪師。三年勅歸。一日室中。出祖衣示徒曰。此衣是唐朝宮主所置。今八百餘年矣。祖祖相傳。至東普先師。先師付與老僧。若是克家種子。方堪紹荷。狐假虎威。焉敢希冀。又曰。如百丈侍馬祖。祖侍南嶽。

嶽侍曹溪六祖。皆久久親炙。磨光剝銳。乃能豁徹重關。羈鎖埽盡。微見窠臼。深得大機大用。可為人天眼目。

上堂。高提祖印。朗慧日於中天。再振頹網。扇淳風於末運。旋機陷虎。轉令屠龍。但恁麼去。二乘膽落。十地魂消。放開一線。妙契心宗。坐却三叉。相逢狹路。拽在萬仞。了無向背。密移一步。地潤天空。所以風搏妙翅。雷送遊龍。不即不離。續四七二三祖之慧命。不離不即。弘石橋雙徑祖之微猷。直下洞徹玄微。就中披見肝膽。兒孫匝地。誰不丈夫。隨行踏斷流水。縱觀寫出禽跡。針鋒上。不許衲僧蹲身。諸人脚跟下。為甚黑漆漆。問木馬吸乾滄海水。魚龍蝦蟇以何為命。問無邊剎境。自他不隔於毫端。龍王為甚失却定海珠。問鯤化鵬眼在。蚯蚓化百合何在。問為甚鐵牛。眠少室。問向上一路。羅籠不住。呼喚不回。大力量人。為甚坐在百尺竿頭。

師一日謂眾曰。老僧明日遊天台。常住宜速備辦。監院曰。和尚去甚麼時回。師屈指示曰。二五。至五鼓坐脫。時大風震起。白光燭地。塔全身於本山。

壞空成禪師。僧問。如何是六不收。師曰。石敢當。

金陵妙峰玄禪師。僧問。如何是異類。師曰。角邊腮搭背。眉底赤雙睛。

廬山天池無為一禪師。僧問。祖意教意。是同是別。師曰。牛拖犁。馬拽犁。馬拽磨。

伏牛無礙鑿禪師。僧參。師喝曰。看劍。僧曰。幸是某甲。若是別人。一場禍事。師曰。那箇是別人。試指出看。僧掀倒禪床。師曰。幸是老僧。若是別人。打折你驢腰。

金臺大容山古庭善堅禪師。滇之昆明人。參一歸何處話。一日定中聞僧曰。見無所見即真見。師於此頓然脫落。

正統乙丑。參無際得法。就止大容山。雲水不絕。無際恐出世早。命為首座。問曰。子別在甚處。師曰。佛祖行不到處。際曰。還計人來否。師曰。坦然無礙。際曰。從上古人。阿誰有超祖之智。師曰黃檗。際曰。子見黃檗麼。師曰。縱是黃檗。也須見擯。際曰。敢在我者裏說大話。師曰。正眼無私。際曰。觀子之見。吾非子之師也。師曰。無有過量。豈免貶剝。際曰。如是如是。師後歸昆明古庭示寂。古庭與盤山并峙。至今二大士肉身存焉。

舒州投子楚山幻叟荆璧紹琦禪師。蜀之唐安雷氏子。九歲從玄極通受業。首參道林。一日聞板聲有省。復徧叩海舟月溪諸老。咸稱賞之。正統六年。再參道林得法。後出世天柱。僧問。如何是天柱境。師曰。澗澗雲歸晚。山高日出遲。曰如何是境中人。師曰。額下眉遮眼。腮邊耳搭肩。曰如何是天柱家風。師曰。雲甑炊松粉。

冰鑑煮月圓。曰如何是祖師西來意。師曰。海神撒出夜明珠。曰學人不會。師曰。文殊失却玻璃盞。

景泰五年。遷投子。上堂。僧問。遠離皖山。來據投子。海眾臨筵。請師祝聖。師曰。鼎內長生篆。峰頭不老松。曰祝聖已蒙師的旨。投子家風事若何。師曰。提瓶穿市過。不是賣油翁。曰只如祖師道。不許夜行。投明須到。還端的也無。師曰。雖然眼裏有筋。爭柰舌頭無骨。曰趙州道。我早猴白。你早猴黑。意作麼生。師曰。不因弓矢盡。未肯豎降旗。問和尚今日陞座說法。未審有何祥瑞。師曰。麒麟步驟丹霄外。優鉢花開烈火中。曰如何是祖師西來意。師曰。雪消山頂露。風過樹頭搖。問寶劍未出匣時如何。師曰。神號鬼哭。曰出匣後時如何。師曰。佛祖吞聲。曰出與未出時如何。師曰。無鬚鎖子兩頭搖。僧提起坐具。師便喝。僧擬議。師便打。乃曰。毒蛇頭上揩癢。猛虎口裏橫身。也須是恁般人始得。適來者僧。大似一員戰將。敢來者裏。口鼓攬旗。惜乎龍頭蛇尾。死在棒下。若解轉身活路。自然不犯鋒鋌。所以道。弄蛇須是弄蛇手。不會弄蛇咬殺。復舉。法燈示眾。山僧本欲深藏岩穴。隱遁過時。蓋為清涼老人。有未了公案。不免出來為渠了却。時有僧問。未審清涼老人。有甚未了公案。燈拈拄杖便打曰。祖禰不了。殃及兒孫。曰過在甚處。燈曰。過在我。殃及你。師曰。大凡宗師出世。先要拈出己見。然後方可定斷古今。看他法燈。如此作略。美則美矣。了則未了。幻叟今日。亦為蚕骨老人。有未了公案。出來為渠了却。若有問。蚕骨老人有甚不了公案。應聲便喝。眼目定動。連棒打出。大眾。山僧怎麼提持。且道。與法燈用處。還有優劣也無。若緇素得出。許他是箇同參。

上堂。眾集。師斂衣就座。良久曰。分明記取。便下座。示修淨土。上堂。誰心無佛。誰佛無心。心佛殊名。體無二致。是故念佛念心。念心念佛。無念無心。無心無佛。心佛兩忘。念不可得。只者不可得處。脫體分明。纖塵不間。是以真機觸目。徧界難藏。山色溪聲。頭頭顯露。性相平等。理事混融。箇裏覓一毫自他淨穢之相。了不可得。何凡聖迷悟之有也。於此果能豁開智眼。頓悟其真。直下知歸。不勝慶快。還識心佛麼。直須揣見虛空骨。看取優曇火裏開。

上堂。顧視大眾曰。只者些子譎訛古今。多少師僧。到者裏。開口不得。思量不及。舉揚不出。驀拈拄杖曰。今日為甚却落在山僧手中。以拄杖橫按曰。橫也由我。豎起拄杖曰。豎也由我。放下拄杖曰。放下也由我。以致卷舒殺活總由我。又以拄杖。向空中點一下曰。正當恁麼時。從上佛祖。以至天下老和尚。到者裏。只得乞命

有分。眾中莫有為佛祖出氣底麼。良久卓拄杖一下曰。[翟\*支]瞎金剛正眼。靠倒空王寶殿。汝等諸人。討甚麼碗。示眾。選佛場開定祖機。辨明邪正在鉗鎚。禹門浪暖風雷動。正是魚龍變化時。眾中莫有衝波激浪者麼。良久以拂子打○曰。機先一著。覲面全提。擊禪床一下。句外一言。和聲揭露。不許**停**思顧**佇**。那容擬議分疎。眨得眼來。劍去久矣。縱饒佛祖到來。也只攢眉有分。何故。蓋為非言路可通。非心識可測。若是英俊衲僧。向未舉已前。便當點首一笑。猶較些子。近世人心不古。學者不務真參實悟。惟是接響承虛。以學識依通為悟明。穿鑿機緣為參究。破壞律儀為解脫。夤緣據位為出世。以致祖風凋弊。魔說熾然。塞佛祖之坦途。瞽人天之正眼。使吾祖教外別傳之道。於斯委地。大覺世尊。於二千年外早已識得眾生心病。預設多方。曲垂規則。故曰末世眾生。希望成道。無令求悟。惟益多聞。增長我見。又曰眾生未悟作何方便普令開悟。所以結制安居。剋□□□之。則隨往無礙。故知解結之有時也。諸大德。於九十日中還。曾證悟也無已悟者。且置勿論。如或未悟。則此一期。又是虛喪了也。若是真正道流。以十方法界。為圓覺期場。無論百日千日。結制解制。但以舉起話頭為始。一年不悟參一年。十年不悟參十年。及至二十年三十年。盡平生不悟。決定不移此志。只要見箇徹頭徹尾真實究竟處。方一放參之日。所謂一念萬年。豈虛語哉。豎起拂子。諸大德。還知落處麼。幻叟今日不辭饒舌。更為諸人。下箇註脚。猛火鑄成金彈子。當機捏碎又渾圓。等閒得失俱拈却。風送潮音出海門。天順改元。由匡廬歸蜀。韓都候。於方山建雲峰寺。迎師住持。成化九年三月望日。示微疾。眾請末後句。師展兩手曰。會麼。復曰。今年今日。推車撞壁。撞破虛空。青天霹靂。阿呵呵。泥牛吞却老龍珠。澄澄性海漚花息。泊然而逝。壽七十。僧臘六十一。普州大定太虛冲禪師。問無際。德山用棒。臨濟行喝。還當得□。際曰。臨濟德山且止。親切還我話頭來。師曰。若論親切處。和尚也須迴避。際拈拄杖。師便喝。重慶府西禪雪峰瑞禪師。天奇瑞參。師問。無字意作麼生。奇乃移時方覺。答曰。澗底頑冰吞宇宙。性湖明月匝天寒。師大喝曰。汝還有嫌凡愛聖底心。掃妄求真底見。奇曰。是。師曰。你若嫌凡愛聖。斷般若之善根。你若掃妄求真。絕諸佛之命脉。震聲又喝曰。真又是誰。妄又是誰。凡又是誰。聖又是誰。奇豁然便禮拜。伏牛物外無念圓信禪師。金臺高氏子。生於宣德己酉。九歲出家。受具後。首見無際於隆恩有省。入天順己卯。歸牛山結茆。辛巳詣繁昌參月幻。幻問。何處來。師曰。牛山。幻曰。人在者裏。牛擗。師曰。覲面不相識。全體露堂堂。幻曰。雖然如是。頭角不全

在。師曰。某甲今日山行困。幻復拈起竹篋曰。喚作竹篋則觸。不喚作竹篋則背。上座作麼生。師曰。有勞神用。幻曰。未在更道。師便進前。奪竹篋。擲於地。幻軒渠大笑。師曰。某甲罪過。便禮拜。幻乃撫而印之。師菴居三十載。開法伏牛。僧問。龐居士道。一種沒絃琴。惟師彈得妙。某甲今日。請和尚彈看。師歎[口\*敕]一聲。僧曰不會。師曰。鐘作鐘聲。鼓作鼓響。曰意旨如何。師曰。馬祖去世久矣。問如何是即心即佛。師曰。富兒易驕。曰非心非佛。又作麼生。師曰。窮坑難滿。曰某甲不會。師曰。若道即心即佛。大似好肉剜瘡。若言非心非佛。何異灸[病-丙+念]如艾。直饒道不是心。不是佛。不是物。也是平地乞交。且道。畢竟如何。坐來拭几添香火。粥罷呼童洗鉢盂。

黃州石門山黃荊潔空圓通禪師。上堂。拂子未拈已前。針錐徧地。及向諸人面門一拂。便覺有生有殺。有權有實。雕文喪德。伊誰之咎。你有拄杖子。我與你拄杖子。你無拄杖子。我奪你拄杖子。石門不是痛處著艾。要與古人。抖筋抖骨。所謂珠簾半捲剛羞面。彩袖餘霞拂石苔。

太平府八峰山廣善寶月潭禪師。大慧參。師問。如何是祖師西來意。慧曰。東嶺上有雲。師曰。有雨雲無雨雲。慧曰。雨淋淋地。師曰。下後如何。慧曰。白浪滔天。師曰。盡大地是箇火坑。得何三昧。不被燒却。慧曰。東海鯉魚吞却日。

成化間。一日搥鼓上堂。化緣已畢。大地山河絕消息。黃金殿上無知音。免教諸人空狼藉。便化。

### 素菴田大士法嗣

楊州天寧寺和菴忠禪師。僧參。師曰。甚處來。曰嵩山。師曰。曾到五乳峯麼。曰在彼過夏。師曰。聽月岩畔石。為甚麼。大底大。小底小。僧無對。師打曰。何曾到彼來。

大雲入曰。要到五乳峯麼。豎拂子曰。盡大地人。向者裏相見。四明法中正堪禪師。僧參。師豎拂子曰。你道喚作甚麼。曰寧可永劫沉淪。不向諸聖求解脫。師擲下拂子。復豎拳曰。你道者箇喚作甚麼。曰學人終不作鬼窟裏活計。師笑曰。龍蛇易辨。衲子難瞞。僧禮拜。

佛跡頭菴真禪師。示眾。青山疊疊。綠水滔滔。於斯會得。獨步高超。雖然如此。也是尋常茶飯。古德云。欲窮千里目。更上一層樓。承古有言。機不離位。墮在毒海。語不驚人。陷於流俗。若擊石火裏別緇素。閃電光中辨殺活。可以坐斷千差。壁立萬仞。還知有恁麼時節也無。錯。勘破了也。如今談禪者。脚跟點地。鼻孔擦

天。具正眼者。落落罕聞。所以偏正不一。各立異端。堅執已解。勿通實理。所謂正法難扶。邪法競興。古云。信有十分。則疑有十分。疑有十分。則悟有十分。可將眼裏所見。耳裏所聞。惡知惡見。奇言妙句。禪道佛法。貢高我慢等心。徹底傾瀉。莫存毫末。只就向未明未了公案上。距定脚跟。豎起脊梁。無分晝夜。無參處參。無疑處疑。直得東西不辨。南北不分。呆樁樁地。却如箇有氣的死人相似。心隨境化。觸著還知。打破觸體不從他得。豈不慶快平生。

## 徑山下第八世

### 太岡澄禪師法嗣

南京太岡夷峰寧禪師。杭州錢氏子。生而岐嶷。舉止不凡。年十二。博通經史。無濟世意。禮雪峰善和尚披剃。親靈隱。扣雪骨。侍妙峰有年。凡師所到。無有拆其機者。後侍月溪。因僧請益。溪曰。佛法不是鮮魚。怕爛却那。即打出。師在傍大悟。

石門雲頌曰。丹奏宸衷隔翠微。珪璋屏列尚依依。徹簾忽聽金鐘曉。五鳳樓前各自歸。

月溪付師法偈曰。心即能知心。法即可知法。今所付法心。非心亦非法。師繼澄席。

上堂。心王自在。法性無偏。一切佛事。水月空花。本來寂靜。釋迦老子。全身在汝眉毛罅裏。諸人會麼。若不會。太岡替你。下涅槃堂。

上堂。大凡提唱宗綱。須具三要。第一要。明宗曉旨。勘辨邪正。第二要。識大道真體。不屬有無。第三要。解作大師子吼。威鎮一切。具此三要。如車有輪。如鳥有翼。翼折不能高舉。輪折不能轉運。宗師家為後學眼目。若不具此三要。安能奮鎮一切。然雖如是。要在第一句下領取。

上堂。一句子不作一句子會。天無四壁。萬里雲消。佛祖攢眉。人天膽喪。累我迦葉。頭白齒黑。一句子若作一句子會。誤他千聖萬賢。頭出頭沒。戴角披毛。眼裏沙。耳裏水。驀卓拄杖曰。權且放過。

上堂。臨濟大師道。第一句薦得。堪與佛祖為師。第二句薦得。堪與人天為師。第三句薦得。自救不了。慈明道。第一句薦得。和泥合水。第二句薦得。無繩自縛。第三句薦得。四稜著地。師曰。慈明只解潑油救然。不解藥裏去病。太岡即不然。第一句薦得。山門頭與你商量。第二句薦得。僧堂前與你商量。第三句薦得。寮舍裏

與你商量。太岡雖恁麼舉。諸人須向一念未舉以前會得。略較些子。

成化二十一年。奉 旨重修山門。褒寵甚渥。於弘治四年九月三日示疾。時羣鶴遶殿而逝。奏賜圓明普覺大師之號。塔曰寂照。

南京牛頭古心寶禪師。楚湘郭氏子。世業儒。師讀中庸。至喜怒哀樂之未發。渙然見諦。禮南嶽瞿白為師。造大瀉圓具。聞月溪應詔歸太岡。乃折節參叩。溪一日舉無字。始得徹悟。景泰七年。歸寂。

黃梅東永福自秀禪師。因僧問。真空不空。如何是空。師曰。劫外無奇。絲毫絕相。僧曰。妙有不有。如何是有。師曰。隨緣施設。豈混尋常。僧曰。空有雙絕。如何不絕。師曰。七長八短。

靈隱性天宗杲禪師。參月溪。看無字公案。一日失手。打破淨瓶有省。景泰二年示寂。偈曰。幻軀五十七。日用事祕密。打破祖師關。晴空轟霹靂。

天淵道湛一源禪師。參月溪請益。溪曰。佛法不是鮮魚。怕爛却那。遭痛打一頓。一日見流水有省。

德山古心安禪師。僧問。盡大地。是沙門一隻眼。為甚有樓臺殿閣。師曰。藏盡楚天月。猶存漢地星。

南陽峻中嶸禪師。上堂。月溪老人。胸藏北斗。眼蓋乾坤。嶸上座。平生不幸。觸他毒氣。今日對眾剖露。依然弄巧成拙。卓拄杖曰。咩咩泮吒娑訶。

杭州天真毒峰善禪師。鳳陽吳氏子。父宦遊廣東。雷陽而生。年十七出家。初遇源明和尚。示無字話。師當下便能領解。舉似明。明曰。我二十年。看箇無字。如蚊子上鐵牛。纔學做工夫。便有許多知見。復曰。觀子根器。有異於人。切莫途中被人哄去。作長老悞汝大事。師蒙誨。即發願。一味拍盲做工夫。自誓此生以悟為期。慕無際道風。入川參叩。會際蒙詔赴京。遂掩關。不設臥具。惟置小凳。昏重去凳。一日聞鐘聲有省。說偈曰。沉沉寂寂絕施為。觸著無端吼似雷。動地一聲消息盡。觸體粉碎夢初回。再往謁際。適際遷化。遂求證於月溪。溪曰。佛法不是鮮魚。怕爛却那。日為東敲西擊。暗垂勘驗。一日侍溪。園中坐次。溪曰。畢竟如何是無字意。師曰。賊賊分明。溪曰。賊即且置。還我賊來。師曰。六六三十六。溪曰。未在更道。師曰。夜短睡不足。日長饑有餘。溪曰。牛過牕櫺。頭體四足都過了。因甚尾巴過不得。師曰。了無一法當情。瞥爾通身露地。溪曰。你即今在甚處。安身立命。師曰。何處不稱尊。後辭溪。遊浙中。掩關天目之萬峰菴。月溪亦蒙旨欽錫歸金陵太岡。遣書詔師付囑。師適因事他出。溪臨委息。命送衣拂[田/升]之。師住山凡四十餘年。天順間。建西湖之三塔。泊天目

之招明。吳山之寶蓮。南山之甘露。成化初。掩關石屋。後住天真。僧問。如何是和尚家風。師曰。前江潮急魚行澀。後嶺風高鳥泊難。壬寅示寂。塔於本山。

代州五臺孤月淨澄禪師。天順改元。返清涼。代王請詣內掖問道。感光明庭煥。王心大悅。以師禮為。遂斥俸金建寺華嚴谷。額曰普濟。山居偈曰。寰中獨許五臺高。無位真人伴寂寥。一任諸方風浩浩。常空兩眼視雲霄。

### 壞空成禪師法嗣

光澤道惠禪師。僧問。浩浩靈源。如何證得。師乃叉手當胸。僧參。師曰。道得轉身句。與你烏藤三十。道不得。籬裏飯。桶裏羹。一任受用。其僧無對。

建寧斗峰德章淨滿禪師。作務次。見朗禪人有喜色。呼近前曰。公案作麼生。朗曰。不會。師大笑歸方丈。

### 妙峰玄禪師法嗣

汝州風穴福緣廣禪師。上堂。一毛現神變。一切佛同說。卓拄杖。喝一喝。下座。

### 天池一禪師法嗣

神鼎寶藏淨玉禪師。上堂。古德道。毫釐有差。天地懸隔。師曰。晒。又曰。青蘿夤緣。直上寒松之頂。白雲淡佇。出沒太虛之中。以拄杖。卓一卓。下座。

### 伏牛鑿禪師法嗣

仰山無隱正道禪師。上堂。者著子混沌已前。現現成成。惡辣捺諸人。隱隱地似覺有箇物。舌尖有利劍。吐得却。自然蕩蕩地。與麼省事。諸人自作艱難。

大瀉獨潭海昌禪師。在伏牛。受以鬼神覩不破。參究累日。聞僧舉眉間挂劍有省。後住瀉山。凡見僧參。乃曰。看劍。

洪州西山古岩從定禪師。上堂。道不用修。但莫染汙。如寡敵眾。念念在生死上著脚。自然河清海晏。

杭州天竺行一秀禪師。參伏牛。看龐居士參馬祖機緣有省。住後雲水不絕。一日謂侍僧曰。風稍不禁。便坐化。

龍牙鐵牛勒禪師。僧問。如何是諸佛出身處。師曰。水向石邊流出冷。風從花裏過來香。問作麼生是玄之又玄。師曰。死猫頭。

### 古庭堅禪師法嗣

五臺山顯通大巍淨倫禪師。雲南康氏子。生於宣德丁未。正統間。從無極泰芟染。古庭住浮山。師往叩。室中機契。後住顯通。上堂。無孔鐵鎚當面擲。黑漆崑崙攔路坐。莫有挨拶得人拈弄得出底。出來道看。僧問。如何是臺山境。師曰。不是天晴。便是下雨。曰如何是境中人。師曰。金剛窟裏萬菩薩。曰未審尋常所說何法。師曰。清風吹幽松。近聽聲愈好。問如何是佛法的的大意。師曰。今年調雨水。農家好春麥。問如何是祖師西來意。師曰。待飯僊山轉身。即向汝道。乃曰。拈砒霜作醜醜。亦曾有也。撒珍珠於瓦礫。誰箇不然。開眼上樹。特地喪全身。夢昇兜率。也是揚家醜。未動情思。轉魔女盡成菩提寶器。不勞腕力。指娑婆便為妙喜淨邦。長水濬岳積而來。瑯琊覺冰消而去。信腳踏翻琉璃甃。等閒擊碎珊瑚枝。

上堂。三聖震威一喝。正法眼裏撒沙。南泉白刃高揮。古佛家風埽土。何必不必探竿。豈在人手。湘南潭北塔搵。脫體持來。不萌枝上放春回。烈燄堆中飛片雪。有斯作略。可謂其人。誰家井底無天。到處波心有月。

上堂。體相用三大齊彰。塵塵攝入。因果智五周頓證。法法圓融。百城烟水。不出一毫。十世古今。非移當念。紅藕花開。水香觸著蟪蛄蟲半邊鼻。青山低處闊。展開瘦蚊子一莖眉。百川競注。而水體不流。萬竅共號。而風本自寂。金獅子不勞踞地。水牯牛隨分納些。動容滿目家山。依然青天白日。

冬至示眾。五頂瓊瑤堆千松珠玉枝。盡臺山泉石烟雲。飛樓擁殿。總是文殊一隻智眼真光。是汝諸人。常在于其中。經行及坐臥。還知從不曾動著他一莖眉毛麼。若也與麼見得。便爾攝大千於毫端。廣塵沙於法界。其或未然。切忌東卜西卜。老僧為汝諸人。真實告報。今朝冬至一陽生。珍重。

示眾。山高水濶。月朗風清。松蒼石白。夏暑冬寒。如是歷歷分明。一一成現。且道。衲僧分上。成得箇甚麼邊事。莫有道得者麼。不妨出來道看。若無。老僧自道去也。拈拄杖。便下座。

示眾。演祖道。有則奇特因緣。舉似諸人。欲說又被說礙。不說又被不說礙。大小演祖。大似靈龜曳尾。一言既落人耳。如何諱得。老僧也有一則奇特因緣。索性舉似大方。令你倚門傍戶者。一箇箇壁立千仞。便下座。

示眾。老僧者裏。也不說東村李大郎太儉。也不說西社王二姊太奢。也不會安角呼兔。也不會添足畫蛇。早起一盂白粥。午後一盃清茶。誰管他陳年爛葛藤。冷地開花。展兩手曰。汝等諸人。來者裏討其麼乾木查。師有山居吟。無事山房門不開。土堦春雨綠生苔。此心將謂無人委。幽鳥一聲何處來。後示寂。塔於本山。

### 東山琦禪師法嗣

太平府八峯山性空聞禪師。問楚山。如何是佛。山曰生鐵秤錘。師曰。如何是法。山曰。石頭土塊。師曰。如何是僧。山曰。黑漆拄杖。師於此信入。後請益茅山三問。始得脫然。山命師首眾。

涿州金山寶禪師。參楚山。山問。具得正眼。當明向上一機。如何是向上一機。師曰。青山曰卓午。山曰。猶未夢見在。師曰。木人拈玉線。石女度金針。山曰。從上佛祖不傳之妙。子作麼生領會。師近前禮一拜。山曰。轉身一句。速道將來。師拂袖便出。山曰。放子三十棒。師回身曰。謝和尚垂慈。山曰。子雖有滔天之浪。且無湛水之波。師叉手默然。山曰。如是如是。

中溪隱山昌雲禪師。參楚山。山問。法諱甚麼。師曰。昌雲。曰道號。師曰隱山。曰雲在山中隱。如何又出。師曰。只因夜來鶴。帶過上頭關。曰忽被狂風吹散時如何。師曰。依舊青天白晝。山笑之。

太原府海雲深禪師。楚山聞鐘聲。問曰。子還聞否。師曰聞。山曰。你道說箇什麼。師乃作鐘聲。山曰。只如鐘聲未發已前。響在什麼處。師曰。未發已前。山曰。鐘聲絕後。響歸何處。師曰。鐘聲絕後。山曰。耳是根。響是塵。知響者是什麼。師曰。非心不響。非響不心。山曰。心豈有響乎。師曰。心雖非響。響處分明。山曰。無響之時。心在何處。師曰。心體湛然。不逐響生。不隨響滅。蓋由兩耳處通。是以應用無礙。

師出世。辯慧接人。臨終沐浴。說偈而逝。

唐安湛淵齋禪師。上堂。楚山大似逆鱗徑尺。不可觸犯。唐安偏向毒蛇頭上抓。會他絕響無音還有說。直至而今拄杖談。眾中有聞得的當者麼。若的當。且道他說箇甚麼。良久卓拄杖曰。蒼天蒼天。古渝濟川洪禪師。問楚山。水母飛上色究竟天。入摩醯眼裏作舞。因什不見。山曰。多少人向者不見處。打失鼻孔。師曰。如何是摩醯正眼。山曰。面門兩眼渾無事。頂中一點耀乾坤。

襄陽府大雲興禪師。與楚山外歸。因有機緣。師曰。大眾久立。請和尚回寺。山曰。那裏是寺。師曰。鐘聲響得好。山笑曰。頭角彷彿。鼻孔一般。

安慶府石經山海珠祖意禪師。楚山問。趙州道。無字意作麼生。師曰。只為婆心切。肝膽向人傾。山曰。不涉有無。如何體會。師曰。到者裏無用心處。山曰。早是用心了也。師曰不知。山曰。誰道不知。師曰。道者亦非。山曰如是。師禮拜。

長松大心真源禪師。楚山問。父母未生前。試道一句看。師曰。道不得。山曰。因什道不得。師曰。他無口。山曰。又道無口。師曰。謝師答話。山曰。未在。師叉手默然而立。山曰。如是如是。師出世。常舉末後句。勘驗學者。

松藩大慈寺崇善一天智中國師。彭縣人。住松藩時。番夷叛服不常。師撫化莫不投服。天順間。累封國師。楚山過訪。師呈悟繇。山曰。趙州因甚道特事也無。師曰。秋夜家家月。春來處處花。一雙青白眼。何處撒塵汝。山曰善哉。

石經豁堂祖裕禪師。成都巨氏子。從楚山。學出世法因山閱般若經。師詣前窮詰領旨。山曰。般若智用。子今得矣。師禮拜。

三池月光常慧禪師。簡州李氏子。謁楚山契悟。山曰。佛祖本無言說。凡有言說。即非真理。離四句。絕百非。試道一句看。師良久。進前禮三拜。依位而立。山曰。此是諸佛諸祖之所得。二十三代之所授。言語不可及處。覲面相承。點首默契。子善護持。珍重。

翠薇悟空真空禪師。楚山問。徹底窮源。作麼生會。師曰。有星皆拱北。無水不朝東。山曰。還假功用也無。師曰。功用即不得。山曰。只此不可得處。又作麼生。師擬開口。山震聲一喝。師曰。恩大難酬。山曰。善自保任。

陝府玉峰如琳禪師。參楚山。默契。山曰。子到不疑地耶。師曰。某甲亦不向者裏住著。山曰。甚處住。師曰。有無俱不滯。脫體絕思量。山曰。只者絕思量處。正好思量。師乃諾諾。

天成古音韶禪師。掩關次。楚山問。關中主在麼。師曰。他不曾出入。師遂呈偈曰。只此寂默非寂默。非寂默中亦非絕。渠儂面目已呈師。動靜何曾有區別。山可之。

南京香巖古溪覺澄禪師。高陽張氏子。受業於默菴。每於禪寂中。覺白水從鼻流出徧滿堂宇。自意身心輕安。後參楚山。針芥相契。天順五年。住高座寺。結制小參。三根椽下坐堆堆。把定身心若死灰。撥出爐中些子火。驚天動地一聲雷。眾中有不惜眉毛底。出來道看。良久曰。眉間拶出金剛燄。露柱燈籠盡放光。

成化癸巳八月初九日。盥沐端坐而化。眾淒然。師隨開目曰。不須如是。復瞑目。

珪菴祖玠侍者。侍楚山。了明大事。一日病作。有痛苦聲。山曰。主人公在甚麼。師曰。秋風不扇。桂藥飄香。山曰。恁麼則徧界絕

遮藏也。師曰。有眼覷不見。山曰。從今別後。再得相見否。師曰。曠劫不違。今何有見。山曰。然則子不曾病耶。師曰。病與不病。總不相干。山執其手曰。是甚麼。師曰。是祖玠之手。山曰。祖玠是誰。師曰。玠故非我。亦不離我。山歎曰。善哉只箇不即不離。可謂妙契無生。徹證圓常之道。今子見理既明。雖則年茂。死亦何憾。師振身端坐而逝。

## 西禪瑞禪師法嗣

性空覺禪師。嘗作顯宗歌曰。達此宗無今古。拶破虛空還自補。聲色堆頭妙覺場。放去收來無間阻。體中妙。夜半木人臨鏡照。波斯南岸嚼寒冰。塞北胡兒街市鬧。用中玄。石女吹笙碧樹巔。趙州葫蘆挂東壁。村中王老夜燒錢。玄中玄。妙中妙。寶絲網裏鬪明珠。須向暗中通一竅。海潮音熾然說。師子筋琴彈白雪。兩岸青山笑點頭。百年狐兔形摧滅。

湖州東明曉菴昇禪師。關東人。年十九祝髮。參德翁淳領旨。扣雪峰得法。師出世。僧問。如何是無相道場。師豎拂子曰。會麼。曰不會。師曰。奈汝不會。僧住思。師便打。

棠城寶文洪印禪師。古渝棠城張氏子。禮雪峰。蓄養有年。因峰遷化。未獲印可。遠扣楚山。值定王薨世三周除禫。請山陞座。師出問。雷音動地。選佛場開。一會靈山。儼然未散。未審皇恩佛恩。如何補報。山曰。蕩蕩堯風清六合。明明佛日照三千。師曰。玉梅破雪。紅葉凋霜。定王金容。即今何在。山豎拂子曰。在山僧拂子頭上。成等正覺。放大光明。師曰。與麼徧界絕遮藏也。山曰。有眼覷不見。師曰。覷不見處。不隔纖毫。山曰。末是妙。師曰。如何是妙。山曰。二邊俱抹過。始見劫前人。師曰。蒙師點出金剛眼。死去生來更不疑。山曰。俊哉衲子。出語標宗。不添為西禪之嗣。師曰。人天證明。謝師印可。

出世。僧問。如何是祖師西來意。師曰。百不及一。曰如何是相承底事。師曰。箇裏難容話。機前一笑傳。

無相真禪師。在東山。作園頭。楚山入園。見師縛冬瓜架。指瓜曰。者箇無口。因甚長如許大。師曰。某甲不曾怠□一時。山曰。主人公還替你出力麼。師曰。全靠他。山曰。□出與老僧相見。師禮拜。山曰。猶是奴兒婢子在。師拈篋縛架。山顧侍僧曰。菜園有虫。師後得法雪峰。

太初性圓禪師。頌何物最苦曰。風前一曲動離愁。惹得三塗苦未休。回首寒潭空漾碧。夕陽西去水東流。

## 潔空通禪師法嗣

黔中正法雪光禪師。族趙氏。歷諸方。至靈峰度夏。聞舉嚴陽尊者問趙州公案有省。舉似寂照。照曰。無功用處。正好用功。莫認些子光影。有悞平生。復結冬於景德。一日定中。聞岩瀑聲觸發。默舉從上佛祖機緣。一一透得。遂往參潔空。從頭舉似。空曰。不見道。莫謂無心云是道。無心猶隔一重關。道了便入寢室。師自是茫無意緒。懷疑不決。一日見寒山詩吾心似秋月之句。疑滯頓釋。後菴居古山。臨終書偈而逝。

方湖德巖悟本禪師。參楚山。道業純一。乃白山曰。不涉寒暑。是什麼人。山曰。適來為汝道什麼。師擬對。山喝曰。擬心即乖。師曰。元來恁麼那。山曰。汝見箇甚麼道理。師曰。面目分明。當機不露。後參潔空得法。

齊安石門山黃荊印空海禪師。參潔空。空舉無字。令師下語。四十轉不契。師曰。可無方便耶。空舉怒中頌。師於言下大悟。

## 八峯潭禪師法嗣

鳳陽府槎山護國無用文全禪師。濟南商河劉氏子。年十九。投靈岩祝髮。初見月天。蒙示法要。次參別傳有省入。傳問。虛空粉碎。大地平沉。汝在什麼處。安身立命。師曰。昨夜泥牛吞皓月。今朝木馬吐清風。曰一歸何處。師曰。一自白牛歸雪嶺。直至如今不見踪。傳頷之。復往金山。謁無極。囑師見寶月。月問。有草鞋錢麼。師曰。青山不露頂。曰如何是應物現形。師曰。孤光明月普天輝。萬象森羅全體現。一日月入室。坐次叫曰。寒寒。師便搬火爐向前。月曰。如何是火爐邊事。師敲火爐三下。月微笑而出。入室次。月拈拄杖曰。者是拄杖子。且道。主在甚麼處。師奪拄杖。擲於地。叉手而立。月曰。看者漢撞著拄杖子了也。師拂袖便出。後蒙印可。出世槎山。上堂。法不孤起。仗境方生。道本無言。因言而顯。今來龍象交參。諸山共處。此非小緣。感皇上之洪恩。賢士大夫之佑護。檀那喜捨。僧眾清修。安立禪期。助斯聖化。命山僧光揚宗眼。令末運得種福田。然雖如是。猶未是衲衣下事在。且道。作麼生是衲衣下事。僧問。三乘即不問。直指事如何。師曰。雙峰頂上鶴栖樹。九龍山下鳥啼花。曰西來祖意蒙師指。東土相傳事若何。師曰。嶺上有風千古秀。澗邊流水萬年清。問如何是白水境。師曰。一片荒田堆四野。三間茆屋壯諸山。曰如何是境中人。師曰。白虎頭邊天子廟。黑龍潭底帝王基。曰人境兩忘時如何。師曰。蘇武不知青羝意。七郎常恨白鴉歸。僧禮拜。師拍案一下。下

座 僧參。師問。如何是高峯宗旨。曰石馬嘶風居物外。金鷄高唱御樓前。師曰。有何奇特。曰不遇知音者。徒勞話歲寒。師曰。祖祖相傳。相傳甚麼。曰海底泥牛翻巨浪。林中石女播清風。師曰。大地全彰。是甚麼人受用。曰東村李二哥。師曰。那山如何高。曰只為強出頭。師曰。者山如何低。曰說那不唧[口\*留]底。師顧左右曰。草裏有蛇。曰照顧狗腿。師曰。阿哪阿哪。

南京崇福寺大慧覺華禪師。上堂。舉拂子曰。威音那畔。原只是者箇。今日目前。也只是者箇。以拂子上下拂曰。若喚作拂子。瞎却人天眼目。不喚作拂子。亦瞎却人天眼目。大眾且道。喚作什麼。者裏會得。便知迦葉微笑。二祖覓心了不可得處。紹如來之傳燈。續祖庭之正脉。聯二十八世之英華。接三十四代之骨髓。眾皆默然。師以拂子擊曰。千聖不識。

嘉興府天寧寺默堂宣禪師。初謁楚山。頓契微旨。後參八峰。峰舉雲門放洞山三頓棒。師語屬意路。峰叱之。師頓忘寢食。一日偶聞隣單僧舉五百羅漢降毒龍。師踴躍下單。僧曰。者漢顛耶。師便與一掌。及見峰。峯曰。開口即錯。你露箇消息看。師珍重禮三拜。峰深肯。一日付師偈曰。竺國拈花旨。嵩山斷臂宗。人天展付汝。無始亦無終。

出世天寧。禪法一味。不許學者看文書。并作偈頌。或有私作。查實擯出。臨終眾請遺偈。師曰。老僧平常無一言半句。何蛇足為也。端坐而逝。

伏牛月天禪師。因袒公參。師曰。甚處來。袒曰少室。師曰。達磨隻履西歸。如何見底。袒曰。天接白雲過。水和明月齊。師曰。何不與我傳得境來。袒近前展兩手曰。請師看看。師謂傍侍曰。此子向後。豎臨濟之柱石。挺□山之門庭有日在。袒乃禮謝。

### 天寧忠禪師法嗣

杭州徑山寂菴潛禪師。頌夏末秋初曰。寶殿瓊樓鎖玉虛。堦除清碧影蒙糊。頂門瞎却摩醯眼。肘後空懸奪命符 僧問。如何是本來人。師曰。驢前馬後。曰學人不會。師曰。者田厰奴。好惡也不識。

明州用剛宗軟禪師。參孤舟。受三不是話。天順初。參和菴。菴一曰上堂。祖師心印。狀似鐵牛之機。去即印住。住即印破。不去不住。汝等作麼生。師在傍得大休歇。住後示眾。大凡做工夫。只要起大疑情。不失正念。千疑萬疑。祇是一疑。纔有間斷。即落也見。汝等做工夫。未曾半月一月。打成一片。焉得不走作。果若真疑現前。撼搖不動。自然不怕惑亂。又不得起一念歡喜心。纔有絲

毫異念。即打作兩槩。只管勇猛忿將去。終日如箇死漢相似。到者般時節。那怕甕中走却鼈。

### 佛跡真禪師法嗣

黃梅廣福天然宗浩禪師。因僧問。如何是道。師曰。擎茶過盞。曰如何是道中人。師曰。奴顏婢膝。

別峰寶芳藏禪師。辭佛跡住後。荷衣松食。二十餘年。致有傍巖縛箇尖頭屋。折脚床頽就石支之句。僧參。師拈棒作舞曰。你賊我也。僧長噓一聲而去。

處州白雲無量滄禪師。示眾。二六時中。隨話頭而行。隨話頭而住。隨話頭而坐。隨話頭而臥。心如栗棘蓬相似。不破一切人我無明五欲三毒之所吞噉。施為動靜。通身是箇疑團。疑來疑玄。終日猷椿椿地。聞聲見色。管取因地一聲去在。

徑石滴乳集卷之二

徑山下第九世

太崗寧禪師法嗣

杭州天目寶芳進禪師。幼習儒。因與同學會文。覩芍藥花有省。從坦然披剃。坦誨以栢樹子話。徧扣禪宗。自謂。諸方無出格鉗錘。一晚在天界佛殿經行。聞燈花爆。如雷震相似。尋謁太崗。便問。如何是西來密密意。崗下禪床擒住曰。西來無意。你道此間是什麼意。師無對。如是寢食俱忘。一日登廁。聞隣僧敲籌作聲。忽然大悟。乃懷香入室。崗一見器之。付偈曰。祖祖無法付。人人本自有。汝受無付法。急著傳於後。

金明旭。舉因緣畢乃曰。夷峯鉗錘嚴密。門墻固不通風。非天目老人。亦不能破家蕩產。大眾還有知此消息者麼。良久卓拄杖。下座。

徑山進頌曰。大地山河驀入官。松風水月不相瞞。滔滔只要源頭活。何慮人間滄海乾。

石門雲頌曰。層巖傑閣襯仙遊。襯得飛仙到上頭。一脚踏翻生鐵甕。春山花放酒盈樓。

上堂。拈花微笑。節外生枝。面壁安心。畫蛇添足。山僧這裏。無禪可參。無道可學。直教一箇箇。成佛作祖去。汝等還信得及麼。良久拍膝云。劍號巨闕。玉出崑岡。

上堂。截瓊枝寸寸是寶。窮秘藏點點是金。自出洞來。踞虎頭。把虎尾。千個萬個。只知陣後說兵書。若龍是門躍過底。天目有三十拄杖。自領出去。

上堂。舉天目禮和尚曰。季冬極寒。萬木短殘。惟有梅花。十分清韻。野橋流水外。茅舍催籬傍。山僧不會東皇意。三嗅寒香立晚陽。師曰。若作佛法會。大眾將火把來照。照者漢面皮厚多少。若作蝸蟲小技會。又道。野橋流水外。茅舍短籬傍。新天目。未免狗尾續貂。今冬極寒。柴炭俱難。凍得泥牛脚縮。石虎眉攢。翻身北斗。面南看。出頭乾外。誰是我般般。

示眾。舉月溪垂問。為甚鐵牛眠少室。師頌曰。高名不借。金玉宣同。子輿懷寶遊諸國。其賴安仁君子風。

僧參。師云。你道。山僧眉毛。落却幾莖。僧云。總不見得。師云。參學高流。眼在甚麼處。僧云。乾坤大地。全在裡許。師乃喝出。

示眾。舉古庭堅。因無際問。子別我在甚處。堅曰。佛祖行不到處。際曰。還許人來否。堅曰。坦然無礙因緣。師頌曰。水邊林下舊生涯。土凳柴床意味佳。歸興忽然動昨夜。謾將客思寄烟霞。正德十四年仲冬廿四日。說偈別眾。茶毗得五色舍利無數。塋於本山。

### 天淵源禪師法嗣

金陵祖堂興禪師。上堂。僧問。如何是佛。師云。靈龜曳尾。曰莫便是麼。師曰。杜撰禪和。

住長塋。示眾。長塋既老且病。不能傾心吐膽。長篇闊論謙悞汝等。亦不要汝等廣知解透公案。如本參疑情。便要和你身拶入。直向那邊更那邊立地回觀。始知世間產業資生。皆從自性流出。此猶是合頭語。古人謂之繫驢橛。亦謂之貼肉汗衫。在今諸方。往往坐在個裡。佛法垂秋。此其兆也。在我長塔門下。參要真參。悟要實悟。唐喪光陰。殊為可痛。珍重。

金陵棲霞空昇禪師。參天成不契。謁太崗。崗曰。甚處來。曰天成。曰天成鼻孔多少長。曰與和尚一般。

上堂。法華道。我為法王。於法自在。又道。是法住法位。世間相常住。釋迦老子。大似淹耳偷鈴。棲霞前是山門。後是佛殿。左是厨庫。右是僧堂。且道。阿那個是常住底相。試出通個消息看。良久云。萬里片雲飛始盡。一輪明月挂烟蘿。

### 德山安禪師法嗣

南嶽春山崇景禪師。上堂。舉臨濟示眾曰。汝等諸人。赤肉團上。有一無位真人。常向諸人面門出入。汝若不識。但問老僧。時有僧問。如何は無位真人。濟便打曰。無位真人。是什麼乾屎橛。師曰。臨濟大似一頭驢。要見麼。咄。良久曰。一頭燒火兩頭烟。兀兀難藏個白拈。樓碎窮年山鬼窟。依然華藏水連天。

西竺中天表禪師。鳳翔人。本儒家子。幼歸釋氏。後禮水晶菴無著為師。謁古心機契。

上堂。個如露地白牛白。頭角崢嶸赤日赫。走向雪山深處眠。幾回入草尋不獲。忽尋獲。鼻孔依然欠扭捏。

## 天真善禪師法嗣

太湖法華鏡堂明禪師。示眾。舉高沙彌看藥山。山曰。你來也。曰是。山曰。可煞濕。曰不打者鼓笛。雲岩曰。皮也無。打什麼鼓。道吾曰。鼓也無。打什麼皮。彌曰。大好一場曲調。師曰。藥山父子。大似丹鳳冲霄。翔翱六口雲巖鼓上作活。道吾皮上作活。正眼看來。二俱口口在。若是生機之手。別有道理。

## 洞山惠禪師法嗣

嵩山別傳宗禪師。示眾。巖栖澗飲日雲霄。只有松風伴寂寥。醒眼滄桑多劫夢。看來天地一秋毫。

## 仰山道禪師法嗣

蘄水華桂山能仁秋月澄禪師。僧問。如何是華桂境。師曰。五葉千燈秀。曰如何是境中人。師曰。雙眉聳半空。僧問。盡大地是箇火坑。得何三昧不被燒却。師曰。此去尤河將八里。

## 八峰聞禪師法嗣

月潭澄禪師。天順初。住蘇之西禪。晚遷薦福。興陽澤問。不落古人窠臼。請師速道。師隨聲便喝。澤曰。此是古人機用。更乞曲施誘迪。師連喝兩喝。澤曰。祖師玄言。忘功絕調。出格人來。如何提携。師曰。木奴雙叉髻。出語不慚惶。澤曰。與麼則相逢不抵揖。各自逞家風。師曰。叱退文殊消息盡。松風韻罷欲誰彈。師付無聞鎧偈曰。蒙山三關。八峰漏逗。吾展付汝。永光橋後。復囑曰。宜飽研憨飲接續吾宗。

末後示眾。大機現前。來風自辨。扣鑰衝關。垛生招箭。七佛以前消息。諸禪德作麼生體取。良久奄化。

三祖天然銳禪師。因性空。舉乳源上堂。西來的的意。不妨難道。眾中莫有道得者麼。出來試道看。時有僧出禮拜。乳便打曰。是甚麼時節出頭來。便歸方丈。你作麼生。師曰。和尚曾問甚麼人來。空曰不會。師作掀禪床勢。空曰。西來的的意響。師曰。濱兄若進方丈。和尚莫說某甲答不得此話。空曰。這僧有喫棒分。無喫棒分。師拂袖便出。

齊安石門黃荊濟舟濱禪師。上堂。回頭轉位。直須戴角披毛。喚作水牯牛。千聖萬賢。無出頭處。以拄杖畫一畫云。出得者個。不妨

顯些子作略。

石門雲曰。直饒出得。更參三十載。  
昭覺無礙通禪師。初參通無極。白古巖。激月溪。俱不契。後謁八峯。  
峰誨以有句無句話參究。旬日有省。住後雲水四至。  
上堂。魯祖常年面壁。秘魔終日擎杈。臨機不解通變。驢年未許到家。  
上堂。大道無向背。至理絕言詮。要識安身處。泥牛海底眠。

### 古溪澄禪師法嗣

成都西宗祐禪師。上堂。橫按拄杖曰。父母未生前。也只明者箇。父母既生後。也只明者箇。豎起拄杖云。大眾看看。箇是甚麼熟碗鳴聲。遂擲下。歸方丈。  
涿州金山寂菴湛禪師。示眾。昔靈源謂圓悟曰。衲子雖有見道之資。若不深蓄厚養。發用必峻暴。非特無補教門。將恐有招禍辱。山僧最初。在月溪會裡。一十三載。方與個事。打作一團。始無間斷得。非深蓄厚養發用。安有今日也。汝等晚學。若不深蓄厚養。得少許自足。欲廓神機。終難極妙。又安有補於叢林哉。

### 龍門悟禪師法嗣

司空碧天朗禪師。僧問。如何是祖師西來意。師曰。月穿潭底靜。風過樹頭搖。  
示眾。祇箇事不是容易底。昔在大方。參見數知識。問他禪道宗旨。儘有說底衲子。舉公案徵詰差別。亦口巴巴底。山僧將謂佛法止此。反到龍門。遭渠一拶。好像布袋盛菱角。一齊敗露。道流。要續佛祖命脉。要明道眼。能識邪正。其餘殺人活人機要。非平日之溫研。一旦對機對境。自然過去不得。  
玉峰乾曰。近日學者。多恃聰明。不知者般工夫。又不明教理。惜哉。

### 性空悅禪師法嗣

金山東巖亮禪師。一日定中。聞鷄鳴有省。述偈呈空曰。狗子佛性無有。赤脚鬢頭亂走。社散扶歸鄭三。原是李二醉酒。空笑而肯可。  
上堂。一切法不有。一切法不無。會得轉身處。東壁挂葫蘆。

## 大雲興禪師法嗣

黃州師子巖玉峰鐵牛堅禪師。在大雲處。得其洒脫。隱於桐山。辟穀。止食蒼朮。一日別峯過訪。密囑同行。焚其菴。請師南巖。未幾至白雲。訪鑑和尚。乃就齊安禪師舊基結茅。一時衲子雲至。遂成伽藍。師潛機密用。人無知者。後無疾坐化。塋於寺左。

## 石徑裕禪師法嗣

萬松曉堂滿禪師。久依石經。一日偶閱演祖。謂郭功輔曰。人之性情。固無常守。隨化日遷。自古佛法。雖隆替有數。而興衰之理。未有不由教化而成。昔江西南嶽諸祖之利物也。扇以淳風。節以清淨。被道德。教以禮義。使學者收視聽。塞邪僻。絕嗜欲。忘利養。所以日遷善遠過。道成德備而不知。今之人。不如古之人遠矣。必欲參究此道。適石經至。師問。如何是此道。石以拳驀口築之。師良久。石曰會麼。師曰不會。石曰。好箇不會。語未卒。又築一拳。師乃大悟。

## 無相真禪師法嗣

金谷巖大華嚴寺南宗勝禪師。初依廣恩。次謁浮山。執瓶中久之。一晚禮佛次。山問誰。師曰某甲。山曰作麼。師曰禮佛來。山曰。佛向你道甚麼。師曰。不曾道。山曰。你頭不曾點地那。師曰。下下點地。山曰。又謂不曾道。師於言下。豁然開解。曰某甲會也。山曰。你會箇甚麼。師曰。吐露太分明。山便喝。師擬進語。山曰。拄杖不在手。放汝二十棒。師便出。

上堂。若見諸相非相。即見如來。釋迦老子。從兜率天。拖泥帶水。下降皇宮。脫珍御服。著弊垢衣。苦行成道。地搖六震。天雨四花。將謂是箇人。若是諸相非相。即見如來太遠生。以拂子上下指曰。天是天。地是地。山是山。水是水。且道。如來在甚麼處。豈不見。五天一隻蓬蒿箭。攬動支那百萬兵。不是雲門行正令。幾乎錯認定盤星。

天順甲申間。纂佛祖宗派圖。立碑於嵩山。會善戒壇大殿前。正續明教大師傳法正宗記。為天下禪宗萬世祖龍。

## 淨慈休休禪師法嗣

杭州昭慶寺雪庭禪師。字幻寄。仁和桂氏子。生於景泰丙子。患痘風雙目短視。夢中感金神。使令出家。母兄不允。成化間。參休休翁於仙林寺。一見契合。遂出家。受無字話。十七剃染。二十九登具。三十五受休休翁印記。又四年侍休於淨慈。四十七開法昭慶。上堂。舉僧問雲門。不起一念。還有過也無。門云。須彌山幸遇此僧。當機不薦蹉過。雲門直至於今。欄街塞巷。無存放處。此僧若也下得一語。道某甲者裏。安放不得。且請和尚。掇過一邊。非唯自己。千古之下。作箇自在。快活間人。抑且拶得。雲門忙手忙脚。撒了收不得。收了撒不得。豈不丈夫。然雖幻寄與麼也。是勞人不少。且道。還有安放處也無。自代云。看取雲門道底。

### 性空覺禪師法嗣

荊州玉泉能關主。初參祖源海。後依投子。一日問。有佛處不得。住時如何。子豎起拂子。師曰。無佛處急走過。又作麼生。子放下拂子云會麼。師曰不會。子曰。兩頭不著。千聖難窺。這箇且住。古人道。藏身處沒踪跡。沒踪跡處莫藏身。意旨如何。師曰。不即不離。子曰。不即即箇甚麼。不離離箇甚麼。師擬對。子便打。一日因鷄飛。徹見投子用處。

示眾。昨夜兔角起佛見。今日龜毛起法見。一齊貶向。二鐵圍山。眉稜與太虛相扭。大海與須彌鬪額。其餘王風主水者。忍氣吞聲。且道。能上座。還有罪過也無。吐舌云拔。

廬山黃龍寺徹空通禪師。示眾。拄杖子穿却。釋迦彌勒鼻孔。文殊普賢。運神變現。覷也不敢覷著。黃龍門下。莫有腦後拔楔者麼。咄屙屎送尿漢。是你錯用心。萬曆間。為慈聖。皇太后祝遐。詔至奉天門。賜大藏。供奉至今存焉。

### 南竺橘禪師法嗣

三河寶鑑無聞明聰禪師。上堂。十五日巳前。麻纏紙裏。十五日巳後。拋頭露面。正當十五日。夜半庭前屈膝坐。毛頭星現恰臨門。撞頭磕額底。悄悄看。

示眾。盡大地是沙門一隻眼。汝等諸人。向甚麼處屙。示眾。望州亭與汝相見了也。烏石嶺與汝相見了也。僧堂前與汝相見了也。山僧今日亦然。有相見的出來麼。一僧出。師靠拄杖下座。正德壬申七月朔二日入寂。世壽六十有三。

### 太初忍禪師法嗣

華亭無涯順禪師。上堂。龍吟枯木。鐵笛無聲。踏翻船舷。將謂別有。順上座。只好捕風捉影。還信麼二十年後。有人證明。師後二十年果示寂。

### 天目秀禪師法嗣

南嶽雪巖清禪師。依荆壁。扣心法。不敢容易。入室。一日同澄禪師。禮拜次。師問。三不是復擬開口壁。以手掩之。師忽然省入。次謁天目秀夾山覺。師知法無二印。後結茅于古頭菴側。示眾。舉斷橋倫和尚上堂云。叢林冷冷無甚。今時諸方老宿。雖則煨幾塊死柴頭。各自煖熱門戶。其奈東挑西撥。橫抗豎吹。和自家底一齊。烏了山僧者裡。不問大箇小箇。乾箇濕箇。收拾堆在爐中。火種星兒深與埋著。待伊時節自到。大眾時節到也。以拂作撥火勢云。嘎烟燄逼人。師曰。用盡自己心。笑破他人口。又曰。好箇話端。只是國清。拈弄不出。清上座。今日與他拈出也。拈拄杖云。大眾還見麼。一僧出。師曰。不是龍門客。切忌遭點額。以杖約退下座。

### 印空海禪師法嗣

東滄證果如福禪師。參寶月途中。述偈曰。古徑迢迢任縱橫。擡眸跌足可憐生。只知雲傍杖頭起。不覺懸泉到頂[寧\*頁]。

### 方湖本禪師法嗣

斗方隱峰高禪師。東巖參。令看無字。一日問曰。汝還記得活頭麼。巖擬對。師將拳驀[祝/土]巖口。巖如此有省。

### 默堂照禪師法嗣

太虛圓禪師。示眾。如未了悟。須向蒲團上。冷坐十年二十年三十年。看箇父母未生前面目。

### 荆山理禪師法嗣

瀋山古溪清禪師。上堂眾集。師拈拄杖曰。丹鳳擬飛。鳧鶴驚群。便曳杖下座。

龍門淵曰。謝公亭子偶登眺。無限幽懷望裡生。

## 了禪能禪師法嗣

黃梅法幢金禪師。頌沙彌傳語因緣曰。萬里家山一條鐵。機深密固不容泄。者僧赤面犯鋒鏑。拄杖至今流鮮血。  
成都昭覺寶藏通禪師。示眾。舉月圓缺因緣。頌曰。圓缺持來問作家。秋光醉得眼眯[(序-予+林)/目]。白蘋江上紅波湧。錯認蘆花作雪花。

## 天寧宣禪師法嗣

牛頭吉菴祚禪師。聞東林悟道。冠南北宗席。師與古溪松菴。同志參扣。因門風孤峻難得。入室後至天寧。師資道契。寧付偈曰。心同虛空量。法亦徧虛空。不住虛空理。授受繼吾宗。  
法舟參。受以無字。舟一日偶行廊廡間。聞佛殿磬聲。豁然即趨方丈。師見而笑曰。子著賊也。師曰。賊已收下請驗贓。師曰。贓漚舟振坐具。曰狼籍狼籍。師曰。者掠虛漢。狼籍箇甚麼。舟一喝歸眾。  
杭州徑山天才英禪師。上堂。默堂和尚。平地上湧起波濤。虛空裡敲出木楔。中人毒氣。回來剛道。親見寶月。不知瞎却多少。人眼啞泊合饒舌。

## 東方裕禪師法嗣

南京碧峰寺天通顯禪師。玉芝參。師上堂。徧舉古德公案。芝曰。如何得不落人圈績。師掌曰。是落不落。芝平日所蘊。泮然冰釋。禮謝歸眾。  
師遊西湖。宗鏡堂。陞座曰。此處正好說法。芝從傍唱曰。說法已竟。師便下座。

## 洞庭潛禪師法嗣

南京碧峯道瑩瑛禪師。參洞庭。見湖光瀲灩有省。謂同舟曰。佛性天真。不生不滅。佛性即自性。自性即佛性。有無不計。獨露真如。  
異巖登禪師。僧問。學人參求知識。或令提箇話頭。或令疑箇話頭。同也別也。師曰。纔舉話頭。當下便疑。豈有二理。一念提起。疑情即現。覆去翻來。精研推究。功深力極。自得了悟。師有釋疑集行世。

雲棲祿曰。此數語最為精。當今人頗有滯。此二端而不決者。蓋未曾實做工夫故也。

### 寶峯柔禪師法嗣

育王傑峰定[課/心]禪師。上堂。舉世尊初生頌曰。瞿曇生下便驚羣。爭似雲門一棒親。盡道五更侵早起。誰知更有夜行人。藪菴參師曰。祖師西來意。你作麼生菴。曰靜夜燒栢子。清香到月邊。師然之。

不二際曰。育王好個問端。可惜發不著。所以虎頭蛇尾。反令者僧認個。拈香擇火。不知別有奇特。佛巖當日。若作育王。待他與麼。祇對便好把住云。未在。更道。若是伶俐衲僧。如龍得水。變化莫測。倘若站定脚跟。不妨徹底掀倒。要他至今起身不得。

洪濟幻頌曰。慈母心同稚子心。愛憐終是困羣陰。當初若解衝關去。掣電驅雷也陸沉。

上堂眾集。師曰。且散去老僧。今日困靠。拄杖下座。上堂。古德道。我有一機。覲面提持。如擊金石。如奏篋箎。不是知音。誰其知古人提侍箇事。如古帝王。書雲物歌大風。一等語相似。不特英風逼人。而意在言外。即覲面相逢。不錯過者鮮矣。

### 徑山下第十世

#### 天目進禪師法嗣

嘉興東墟野翁曉禪師。參天目。目曰。汝本是佛。堂堂大度。著甚來由。師曰。生死不明。乞師指示。目曰。本自無瘡。剜肉作麼。師曰。望和尚慈悲。目低頭師方丈。師愕然曰。莫教人斷絕去麼。遂袖香入室。目曰。子已到不疑之地。何生死之懼哉。師於言下豁然。

石門雲頌曰。不識黃金殿是家。洛陽徒自覓生涯。翻身擊碎蒼龍窟。贏得一番風雨賒。

天目上堂。箭鋒相拄。徒勞話會。啐啄同時。全憑作者。啐啄同時。且置。如何是箭鋒相拄底事。師出禮拜。起便喝。目亦喝。師又喝兩喝歸眾。目卓拄杖下座。

一日師。從外歸。目問。甚處去來。師云。佛祖行不到處。目云。適有一人。往彼處去。子會麼。師云不會。目云。為甚不會。師

云。若會則佛祖行到也。目云。如是如是。即付師偈曰。真性本無性。真法本無法。了知無法性。何處不通達。

龍珍胤頌曰。撥動冰盤珠轉轉。掣開金鎖寂寥寥。相逢謾說威音話。玉笛橫拈調自高。

### 巫山松禪師法嗣

建寧府斗峰古音淨琴禪師。禮赤石山主出家。與石論覺知緣我心起處。石叱之。師曰。我無心也。石曰。是汝知無所知覺無所覺者。師於言下頓脫身心。後遇靜晃禪師。重加闢掃。入蜀過南陽。鷄鳴河有省。

示眾。縱遇開示。一時難悟。要假話頭。遍開心慧。工夫日久。百磨千煉。如鷄抱卵。煖氣久蒸。忽然一日。時節到來。或遇因緣。觸發心目。方得開悟。古云。是花各有開時節。春蘭秋菊不同途。凡作工夫。當離喧鬧。截斷眾緣。屏息雜念。單提本參話頭。至於行住坐臥。苦樂逆順。一切時中。不得忘失念茲在茲。專心正意。切切思思。念念自究。返觀自己。這個能追能問底。是箇甚麼。人若能如是。下疑疑來。疑去疑到。水窮山盡處。樹倒藤枯處。擬議不到處。心忘境絕處。忽然疑。團迸散。心花朗發。大悟現前。頓見自己。本來佛性。一段風光非從外得。若得真有此見處。更要求覓。高見宗匠。決擇邪正。不可以此便休。如此纔名入門。纔名得地。

古雪喆禮拜。塢偈曰。青山常獨步。緣水不曾流。欲會西來意。嬰兒盡白頭。

齊安白雲寶明鑑禪師。蜀人。參壽堂得法。出峽徧遊湘湖。於正德間。卓錫黃岡白雲山。巖處澗飲。四方學者叢集。遂成伽藍。僧問。如何是學人自己。師曰。有佛處不得住。無佛處急走過。曰。學人不會。師曰。一箇巴掌。五箇指頭。問如何是白雲山中人。師曰。納結三條篋。縱橫一字關。

指月明。舉公案了乃曰。如此答話者僧。未免在有無處著脚。明上座則不然。待云學人不會。向他道。汝不會。我更不會。這僧若仍舊。死墩墩地。劈脊便棒。何故為人須為徹。

嘉靖二年。遊大崎龜峯諸刹。十一月至苑機。訪道弘老宿甚契。一日敘別曰。來不上此山。去亦不下此山。畢竟作麼生。言訖而逝。全身塢於殿後。

### 薦福澄禪師法嗣

天成無聞愷禪師鳳。陽冷氏子初。謁薦福福。示以鳥窠吹布毛公案有省。徧叩寶方。進無學才慧堂智。皆喜其工夫綿密。後返薦福。福詰問。鼓山聖箭話。始得脫然。正德初。住天成晚。住道林。師每接機。拈拂子。向學者面前問。是甚麼。學者擬對。師便打。默菴同古溪參。菴欲問話。先奪拂子。然後致問。師撫掌大笑。歸方丈。

示默菴偈曰。語是默。默是說。語默不到處。佛祖心路絕。龜毛奪得出。高層也落。今時第二月。千斤重。担付伊荷丕。振吾宗。弘正脈。即令分座襄陽之龍池。

### 石門濱禪師法嗣

齊安石門佛勤紹禪師。僧問。如何是奇特事。師曰。螺螄吞却鴨。僧云。還別有麼。師云。有僧云如何是奇特事。師云。螺螄吞却鴨。

### 萬峯方禪師法嗣

靈鷲中峰素禪師。僧問。秋月團團。因什缺却。師曰。紫霧驚豹變。僧佇思。師便喝出。

### 金臺覺禪師法嗣

舒州太平璉宗振禪師。參金臺。臺問。丹霞燒木佛院主。為甚墜落鬚眉。師曰。覓火和烟得擔泉。帶月歸臺乃印可。師一初終身。三伏不浴。嚴冬不爐。臨終預辭檀越及諸山。端坐而逝。

杭州徑山萬松慧林禪師。郡之仁和沈氏子。禮天目。平舒老人。獲聞心要。入京師宿通堂。聞僧謂丹霞上堂語大徹。時伏牛空幻。寓廣德。師詣陳解。遂得法。

住徑山。一日說偈曰。七十六年。萍跡何倚。本無去來。應緣而已。便寂。

### 牛頭祚禪師法嗣

嘉興府天寧法舟道濟禪師。秀水張氏子。參吉菴通徹。菴付偈曰。法法本無法。今付無法法。便於此承當。即此是心法。

嘉靖初。住金陵安隱。上堂。舉拂子召眾曰。見麼。又擊一下曰。聞麼既舉起便見擊著。便聞妙真如藏。非思非議。應用冷冷。汝諸

人自不丈夫。乃傍人門戶。求知求解。韜晦家珍甘為寒。乞將謂諸聖。別有奇特。

龍珍胤曰。安隱透過銀山鐵壁。從大解脫場出來。直與諸人覲面。相呈諸人。總被情封識鎖。出頭不得。將謂聖遠乎哉。及被拂子吞却。空王寶座。向諸人。頂[寧\*頁]一拶。諸人還覺痛麼。

因羣鴉鳴有俗士。問那一聲好。那一聲不好。師曰。總是觀音入理之門。

陸五臺問。畫前原有易否。師曰。若無將甚麼。畫曰。畫後如何。師曰。原無一。畫曰。現有六十四卦。何得言無。師曰。居士莫著文字好。曰請師離文字。發一爻看。師召五臺。臺應諾。師曰。者一爻從何處起。

普明用曰。畫前畫後。論有論無。總與大易。無涉直饒。一喚一諾。爻相分明也。未是衲僧。極則畫前。元有易否。天寧老漢。何不當頭。便喚五臺。待地應諾却好云。元有易否。陸公口裡必然。別有所入。且免後來。許多週遮。

龍興在曰。諸人不得作恠。龍興與你。平實商量。陸公祇問。畫前有無消息。你若畫前薦得許。你參見伏羲。畫後薦得許。你參見法舟。一爻未發處。薦得許。你參見陸公。一總薦得。畫前畫後。皆是一卷大易。自天子以至於庶人。日用不離還薦麼。

玉林琇頌曰。倒垣破屋住幽林。徹後通前不掩門。轉北回南接影響。可憐咫尺隔千層。

一初元頌曰。羲皇殿上話庖氏。夫子庭前[謹-西+日]仲尼。共住都因不相識。却教腦後擊金槌。

熊南沙問。設有人。將劍來。取師頭。師還躲避否。師曰。若有一不眨眼的。將軍便有一不怕死的。和尚沙作揮劍勢。師放身便倒。沙曰。好箇阿師死在劍下。師起來呵呵大笑曰。作麼作麼。

施靜齋問。一切法從這裏流出是否。師喝曰。一切法且置。如何是這裏。齋以扇擊椅。師曰。居士曾到這裏麼。齋拂袖便出(即無趣禪師)精嚴佛開光。上堂。南寺佛點眼。北寺佛放光。若作奇特商量。大似白日著鬼。咄且置是事。只如教中道。佛真法身。猶若虛空。應物現形。如水中月。又云。佛身充滿於法界。且道。這光明向甚麼處點。即是以拄杖作點勢云。今佛放光明。助發實相義。

郭平川指壁間佛問曰。此佛何不放光。師曰。光遍十方。未曾間斷。公曰。我何不見。師曰。又放光也。

石門雲曰。法舟被鐘聲。塞破耳門頓覺。通身靈活。出世拈提脫略。對機生氣逼人。

庚申秋。寢疾且革。或勸起坐。或請說偈。師曰。此皆文飭非吾事也。以手搖曳而逝。年七十有四。坐五十二夏。受教蓋千餘人。入室弟子。如淵大芹輩。茶毗後。塋其骨於別室中南嚮別室。今廣為禪悅堂。而塋如故。

### 伏牛斌禪師法嗣

齊安白虎山興善寺妙中玄禪師。成化初重興虎山。上堂。僧問。最初威音王。末後樓至佛。未審參見何人。師豎拄杖曰。會麼。僧擬議。師便打。

### 碧峯顯禪師法嗣

湖州天池月泉法聚禪師。嘉興富氏子。讀壇經有省。浴佛上堂。欲知佛性義。當觀時節因緣。只如孟夏漸熱。自釋迦老子降生。以至今日。無纖毫變異之相。時節既無變異。當知巍巍相好。亦無絲毫變異。無端向四十九年。說心說性。說頓說漸。致令後代兒孫。啐啄不丈夫者。總被惡水澆却。即今狹路相逢。不妨眾等也。各各與他一杓。不見道。得人一牛。還人一馬。捨身與受身。誰是報恩者。擊拂子下座。

元旦上堂。撇眼流光如箭急。今朝又是正月。一家家門上貼桃符。大鬼小鬼都竄匿。猶有一箇不順陰陽的漢。古貌堂堂。無朕迹明。逾日黑逾漆鬱壘。眼睛覷不及今日。被山僧捉敗了也。特與諸人報消息。咄佛殿裏祝讚。僧堂前雲集。

陸五臺問。東土千七百善知識。即今向甚處去了。師指庭樹鳴蟬曰。者裡也有一箇。曰聲響口口。師曰。喚作聲響。即錯過也。

徑山進曰。玉芝與麼為人。不獨貴客看破。亦將千七百知識。埋在庭樹下。至今起身不得。若問新天池向道棒。如雨點喝似雷奔。陸公須是。文章貴客。知我衲僧。別有長處。

東林在曰。二老扶豎箇賓主句。塞海排山。奔龍走象總出。陸公問。頭不得。東林則不然待。問即今在什處。高聲呼曰。陸公。公應諾。向道公。若閒暇。與老僧同遊徑山一回。公若透聲透色。便識席帽下。原是舊時人。

多雲天然慧禪師。俗士問。如何是道。師曰。即今從什處來。曰山後。師曰。什處去。曰山後。師曰。且喜來去分明。士禮謝。師嘗應機。皆曰善。或曰善逝。

### 廣惠連禪師法嗣

靖安龍門無礙辯禪師。參廣慧。受以萬法歸一話。疑甚。一日聞僧曰。透過三汲浪。專聽一聲雷。又僧曰。何不道騎驢。踏破洞庭波。師忽有省。

### 育王[課/心]禪師法嗣

松竹大方寬禪師。無礙理參。師曰。伏牛打七。即不問終南靜室意如何。理曰。伏牛打七。泥團土塊。終南靜室。放大光明。師震威一喝曰。即今光明。在甚麼處。理口口口口。師呵呵笑曰。如是如是。

### 徑山下第十一世

#### 東塢曉禪師法嗣

嘉興敬畏無趣如空禪師。秀水施氏子。性仁慈。留心內典。同法舟。盤桓八年。參野翁於東塢。每呈見解。翁與掃却。一日謂師曰。達磨西來。直指人心。見性成佛。唯在直下體取。子若信得。及可放下萬緣參。個一歸何處。師領旨。後聞鷄鳴有省。即薙染。石門雲頌曰。夢乘口鶴登金闕。一簇仙風生兩脇。邸店寒鷄纔唱曉。金烏啄破琉璃國。

金明旭頌曰。淺碧漸流春日暖。仙舸泛徧又乘騎。道途不盡經華眼。勒馬歸來月轉西。

微塵盛頌曰。三番擬透禹門浪。身在洪波隔迢遙。纔得春風通一線。擎頭戴角直中霄。

野翁付師法偈曰。非法非非法。非性非非性。非心非非心。付汝心法竟。

掩關示眾。三十餘年參請。宗匠問。法皆云無說問。佛皆云無相。幸得無相無說不覺頓。空伎倆拗折。主杖拍雙空手。入玄關。坐看陰陽消長偈曰。窮子還歸長者宅。善財參遍雜華林。大千收拾毫端內。推出口空掩上門。

啟關。自結玄關自活埋。自吾閉也自吾開。一拳打破玄關竅。放出從前這漢來。

上堂眾集。師良久喝一喝曰。禍出私門。便歸方丈。

上堂。今日佳節七月七。通身收拾巧來吃。絕妙奇能一併吞。盡盡勿留些影跡。向來弄巧喪天真。從今抱拙守愚直。騰雲駕霧總成空。百巧不如一老實。如何是老實一句。二便二一便一。

新晴。久雨初晴。人皆喜悅。綠柳舞薰風。黃鶯啼不輟。萬古祖師機。一時都漏泄。直下會得來。依舊沒交涉何故一朝樹倒鶯不來。莫把烏龜喚做鰲。

梅雨。梅風拂拂。梅雨霏霏。須彌山頭。爛額香水。海面皺眉。池塘蛙鼓響如雷。諸人會取西來意。於斯薦得。方知人人是五祖。處處是黃梅大解脫門原無關鑰實際理地本是平夷。若也未明。任爾百鍊薰修。徒自辛苦。何也祇為他。眼邊耳畔覓黃梅。依然拋却。祖翁田地。

示眾。言前薦得已天涯。句下承當路轉賒。一擊鐵圍如粉碎。海天空闊雁行斜。

除夜。時窮何似日窮好。月若窮來歲亦然。三十六句口過了。東村王老夜燒錢。老漢並無一物。應個時節因緣。拈拄杖曰。祇有這個。無窮無盡。歷劫經年。今夜隨時送去。免教涉蔓口牽。擲下曰。歷劫得來今斷送。拍雙空手接新年。

元宵。畫角聲中。薦得觀音。未是作家。彩燈影裏。知歸室利。謾誇好手。恁麼告報。與諸人也。須笑破虛空。口禪流若也未瞥。然再看鰲山顛倒走參。

示眾。鴻蒙未判。天地未分。先有一物。時人呼為正法眼藏。亦名涅槃妙心。今在諸人六根門頭。顯現四威儀內昭彰。拈拂子曰。見麼若見通個消息。

講師參。師問。經前一句。逼塞虛空。經後一句。充滿天地。包括一句。函蓋乾坤。正恁處時。向什麼處下口。講師無對。

無幻補帳次。師掃地至。問曰。做什麼。幻曰補帳。師曰誰帳要汝補。幻曰。和尚得恁麼惱亂人。師便打。幻作掃地勢。師持帚而去。

俞居真參。師曰。聞居士在天心書院。悟得些子氣息是否。俞曰是。師曰。氣息響。曰在和尚開口處。師曰。非干汝事。俞向前拱手。師曰。這個是書院裏學來底。俞退身就位。師曰。乃見一斑。俞曰。某甲日用不忘者個。師曰。且得途中受用。俞作滿空雲水。有生涯句呈。師曰。雲散水枯時。生涯在什麼。俞擬議。師彈指一下曰。在者裡。俞於此有省。

石門雲曰。一座天心書院。多少文章秀士在裡面。光風霽月。弘讚嘉猷。無端遭滿空雲雨致。令昧心者。戀金馬步長安。大似咫尺望帝鄉。千里若是。石門纔問。伊雲散水枯他。若擬議驀面。好掌管取。天心書院底。一齊洒脫。

湖邊步月次。無幻至。師曰。明月與清風。水天同一色。人人在個中。祇是出不得。幻曰。打草驚蛇作甚麼。師曰。汝又作麼生。幻曰。看脚下。師大笑便歸。

師與無幻經行次。聞風[打-丁+感]槎槌樹聲。師曰。此樹風來獅子吼。風寂便涅槃。幻曰。樹倒風息時。獅子在什處吼。師良久。幻曰。大好吼即不是獅子。師便掌。

鐵容玄頌曰。公子邀遊月滿樓。佳人更調唱伊州。便將席上春風起。直到瀟湘水盡頭。

陸五臺。舉僧問。夾山承和尚有言。二千年住此山。未嘗舉著宗門事。至東裝前去因緣。曰此僧前。曰掀床。後日灑去。一言無措。和尚可代。一轉語得麼。師曰。者兩個有頭無尾漢。夾山當此。僧問時。即曰。我向來不曾道著。喚侍者擯出此僧。不失乎有前無後。賊過張弓者。僧次日當夾山舉話處。即向空中。打兩拳。推一推。埋了也。亦免陣敗逃回。曰是。師曰。且道者僧埋自己。埋夾山。曰俱埋了也。師曰。仔細切莫累我。陸大笑。師曰去也。陸曰妙妙。

龍興在曰。作家宗師。天然猶在廟廊。貴客今日偶逢。同心鼓舞。扭結鴛鴦。直得席割蒼梧。樂奏鉤鐃。使當日夾山極力處有。今之陸公法道。不致寂寥敬畏。拔劍相助。却被俗官看破。萬曆己卯仲冬。付法於無幻訖。且謂曰。來歲中秋。五六日間。吾欲行。子宜來。於期幻至。師示微恙。說偈曰。生來死去空花。死去生來一夢。皮囊付於丙丁公。白骨斷橋。隨眾呵呵。明月清風吟弄。

佛曰。方曰。皮囊既付丙丁。白骨交歸斷橋。畢竟將什麼。吟風弄月。良久云。為見烟霞生背面。因知星月繞簷楹。

石門雲。別佛曰。皮囊付丙丁。白骨歸斷橋。畢竟將甚麼吟弄。良久曰。長天秋水。孤鷺落霞。

晦牧密頌曰。自從踏斷板橋霜。茆店雞聲午夜長。砧杵重敲聲轉切。行人始不費商量。

師。生於弘治辛亥年十月十八日。終於萬曆庚辰八月十六日。世壽九十。塋於本菴。

## 石門海禪師法嗣

隨州七尖峰大休宗隆禪師。青州益都賈氏子。一日挑水忘行撞壁有省。作偈曰。大地山河體性空。那分行走與西東。偶然撞著無私句。萬水千山總一同。謁無盡於河南乾明寺。機契遂蒙印可。室中嘗垂三關語。以驗學者。

僧問。如何是祖師西來意。師云。黃瓜茄子。其僧不薦。至一菴。菴主問。上座從甚處來。僧曰。七尖峯。主曰。有何言句。僧曰。

某問西來意。和尚相戲。主曰。試述看。僧舉前話。菴主設香遙拜曰。大休古佛放光也。其僧方悟。

嘉靖二十一年十一月八日。集眾書偈曰。三際握來為主杖。十方元是舊袈裟。泥牛石虎知消息。踏破虛空便到家。置筆端坐而逝。塔於本山。

### 斗峯琴禪師法嗣

建寧府斗峰天真道覺禪師。看萬法歸一有省。述偈曰。一手拍兮一手鼓。無位真人出格舞。口中唱出無腔歌。三千諸佛同一母。往呈古音。音可之。

### 三角喜禪師法嗣

義水高原山二祖南宗印禪師。參三角。請益趙州置掃帚撫掌大笑因緣。角連打二掌。師曰。莫當得麼。角又打。師曰。金鑰不辨。玉石不分。角大笑。出法堂。一日因僧誦風鈴偈曰。銅唇鐵舌太尖新。樓角懸來不計春。言外百千三昧法。因風說與箇中人。師有省。呈似角。角可之。

龍門性頌曰。不是人斑是虎斑。兩回牙爪露巒岏。而今要見趙州老。剝剝塵塵禿帚談。

護國鐸頌曰。荷葉羅裙一樣裁。芙蓉笑臉兩邊開。直入池心看不見。歌聲必定有人來。

### 西林頂禪師法嗣

浹川華桂山能仁濟舟洪禪師。九江桑落人。禮四祖解聞為師。一日送亡僧。感絕世緣。參西林。林教看三不是。領旨。

一日僧參。師曰。什處來。曰黃蘗。師曰。黃蘗有何言句。曰嘗謂眾曰。只教汝別求易。若教汝休歇最難。師曰。有幾人會得。曰常春大覺。師曰。上座響。曰某甲不會。師曰。實不會耶。曰實實不會。師曰。明日速回。伊必為上座說。僧稟命返黃蘗。果於言下契悟。

能仁在曰。兩箇黃鸝鳴翠柳。一行白鷺上青天。

萬曆辛丑年。中秋翫月次。師指月謂心安曰。晦則吾行矣。至三十日。沐浴坐脫。塋於寺西。

### 天寧濟禪師法嗣

嘉興胥山雲谷法會禪師。嘉善懷氏子。參法舟。舟令看念佛語。一日受食。碗忽墮地。猛然有省。偶閱宗鏡錄大悟。舟特著臨濟二十七世源流。付之。

僧問。如何是祖師西來意。師曰。有水皆含月。無山不帶雲。曰莫更有奇特否。師曰。不得將龜作鱉。

憨山清。北遊。師出衣偈付之囑曰。吾之大法。在汝肩頭。慎勿容易。子當珍重。山唯唯拜受。

師終有大光明。垂於後世。塋於棲真寺之西。碑銘係袁了凡作。

(按牧齋錢公。作清師塔銘。後語其略曰。然我大師之續脉於祖也。按師自述。得雲谷向上巴鼻。深參力究。以至築著旋嵐偃嶽之句。方疑團[沐]釋。時有鼻孔向下之偈。及鐵牛入水之談。蓋從是悟入。故多別參。一無曰嗣。獨於谷師。法感已深。尚敘荷法。準此。師本雲谷無惑。當自雲谷傳。法舟濟遡推至臨濟大師。則師嗣為二十八世。雖然而的法淵旨。機用施設。實圓洞五宗。任運不立。絕非死殺一家之振。何則。派發於源。莫蓋於曹溪之後。五宗過盛。則衰於盛昭代之初。劍去久矣。刻舟而覓。固克尚之。捉死蛇耳。豈能力揀斯道哉滴乳曰。世之搶行奪市。識者鄙而笑之。况宗乘筆削。慧命攸關。乃有確據者。如東林悟之八峯潭所出天寧宣。宣出吉菴祚。祚出天寧濟。濟出雲谷會。會出憨山德清。此師師授受。祖祖相傳。黃童白叟之所共曉。近見少林續燈。編入大千潤下。是欲開天皇天王之諍端於後世也。南澗續燈存稿。誠禪宗繡史。法門金鏡。亦見編入未詳。因少林書出在前。存稿流通在後。故姑存以待具正法眼者。若張無盡點出湛堂金剛眼也。其足下兒孫。罔知所自出之祖。亦學步邯鄲。直令識者鄙而笑之。予詳考清公南還。會師物化。遂建塔院。募田以永守塔計。清公立師神主。不曰明圓寂本師雲谷會禪師之神主乎。傍勒得法弟子德清立乎。又紫竹林顯愚衡公集所述淵源。錢牧齋作清公塔銘。有公嫡嗣雲谷之言。何一總抹殺。緣清公不即登祖師位。瓣香拈出。致令門外漢。妄下語耳)。

嘉興精嚴寺冬溪方澤禪師。嘉善任氏子。參法舟。一日。舟舉龍潭參天皇語。至何處不指示心要有省。天寧解制秉拂。佛法雖徧一切世間。而未嘗有絲毫透露。作麼生結。雖未嘗有絲毫透露。亦未嘗有絲毫囊藏。作麼生解。故知百丈大師。曲引初學。為此方便誑謊之辭。其實不能結不能解也。設有孟八郎漢出來道。我能向百丈大師結不得處。一結結斷。直使天下衲僧。忘前失後。求出無門。亦能向百丈大師解不得處。一解解開。直使天下衲僧。七狼八藉。竄身無地。却甚奇特。諸上座。彼既丈夫。我寧不爾。良久擊拂子一下云。吽。

薦福[巾\*(豈-土+山)]禪師法嗣

襄陽府龍池寺默菴慧聞禪師。(語具無聞章)師舉僧問雲門如何是雲門一曲。門曰。臘月二十五。師頌曰。宮商不落調還高。千古淳音法帝堯。明月清風無價買。盡情分付與漁樵。

### 松竹寬禪師法嗣

伏牛無礙明理禪師。汾州和氏子。參松竹蔓大方和尚。隨眾打七。有一聲虛空碎獨露法中王之句。後同月菴大圓入終南。一日菴舉高峰銀山鐵壁語。師頓悟。述偈曰。一覺心空疑便消。拈來放出自逍遙。運水搬柴全體現。萬象森羅一性包。又曰。妙體如如本自空。更無一物可追尋。須彌頂上波翻浪。太陽終不離乾坤。過大方求證。方付偈曰。付汝金襴廣利生。空宗一震海河清。性包萬象人天仰。佛祖門中闡化機。

徑石滴乳集卷之三

徑山下第十二世

敬畏空禪師法嗣

杭州徑山無幻性冲禪師。字古湛。秀水張氏子。母卜氏。誕師之夕。夢橋上一鷄飛冲上天。因名橋嬰。時每啼不止。唯以供具列於前即輟。卅歲率羣兒。以瓦石作殿像羅拜。既納內育子。嘗歎塵勞膠固。曷得出離。聞無趣乃本色道人。欣然往參。趣誨以教外別傳之旨。有所契入。遂薙染結菴徑山。集無趣語。及見趣。趣曰。曾做什麼來。師曰。買得一段田。收得元本契。請和尚僉押。趣展閱曰。這個是我的。你的響。師曰。莫搶奪行市。趣擲下集本。師便出。

龍興在曰。一人肘後懸符。一人頂豎摩醯。二俱作家。烜赫古今。若作臨濟兒孫。猶欠在。何故。敵勝從中出。須憑師子兒。龍門性頌曰。相逢各自展家風。祖業兒孫用不窮。大海無涯資躍鯉。長空萬里縱飛鴻。

金明旭頌曰。龍門久駐飛騰勢。纔便風雷趁晚潮。驚起泥牛穿碧海。轉身一掇直冲霄。

石門雲頌曰。借婆衫子拜婆年。體段風流出自然。更有一般純粹處。御街掩袖月明前。

拂拂春風搖地軸。沉沉夜雨洗天根。銀濤萬疊資鱗躍。鼓鬣雲端海嶽昏。

無趣問。徹骨徹髓道一句。三玄三要絕遮護。此二句中。我欲取一句為法。汝道取那一句好。師曰。和尚適來道那一句。趣瞋目叱曰。汝恁麼無記性。師曰。祇為和尚徹骨徹髓。趣笑曰。不然。為子一人即得。爭奈大眾何。師曰。取即不辭。恐辜負先代。喪我後人。趣曰。如是如是。趣付偈曰。師傳拈花宗。我示微笑法。親手展付汝。持奉徧塵刹。

金明旭曰。無幻大似一顆走盤珠。愈琢愈輝。趣祖驗得。號段分明。也是勾賊破家。

師燒火次。僧問。如何是自性天真佛。幻云。搬柴來。僧搬柴了。又理前問。師云。者奴子。好惡也不知。便打。

徑山進頌曰。大富須還長者家。天然隨處有生涯。可憐不識寰中寶。錯認真金作赤沙。

牧公謙頌曰。脚下魚行總不知。因憐[咸\*鳥][感\*鳥]亦何癡。幾多負義忘恩者。徒有雙雙兩道眉。

鐵容玄頌曰。長安年少惜花殘。爭認慈恩紫牡丹。別有冰盤承露冷。無人起就月中看。

潛夫峻頌曰。桃源洞口尋春色。野老頻呼在此中。遊徧園林猶借問。不知身在萬花叢。

兩客下棋次。僧請益。師曰。若論此事。如兩家著棋。用心鮮有不克者。何則。若也未知局面。舉必全乖。不善權宜。觸途遭喪。祇為他意馬散失。狂象無鈎。兵車不識。機關心粗。常行險地。不惟重重納敗。將見皮破血流。若是主將威嚴。士途平坦。如是而炮不虛發。發則打破重圍。兵不亂行。誰肯直前退後。天馬而追風八面。神車而竟沒遮欄。不惟致勝奏功。畢竟風行草偃。良久曰。大平本是將軍定。不許將軍見太平。

僧問。如何是提婆宗。師曰。一字不著畫。曰不問者個。師曰。圓相不著圈。

二祖雲徵曰。要會一字不著畫。圓相不著圈麼。直須倒退三千里。

師住車溪。二十餘年。日與衲子。商確大事。罔不悅服。萬曆三十八年。復住徑山。上堂。大道無向背。至理絕言詮。迴出三乘。高超十地。萬法不到處。特地光輝。生佛未分時。靈源獨耀。不落見聞。不隨聲色。直下無一絲毫頭。徧界全彰。縱饒棒頭取證。喝下承當。猶是曲為今時。倘或光景俱忘。契心平等。亦非的旨。所以道。向上一路。千聖不傳。學者勞形。如猿捉影。到者裏。絕行絕解。絕照絕用。絕理絕事。若倚天長劍。凜凜神威。如鐵牛之機。籠羅不住。今日明眼人前。不敢囊藏被蓋。八字打開。拈拂子曰。諸人還委悉麼。耀古騰今祇者是。大千世界一間身。

因病。僧問。和尚百年後。向甚麼處去。師曰。千株松下角彎彎。百草頭邊亂[跳-兆+孛]跳。

能仁在曰。車溪恁般答話。知天下後世。千燈萬燄。當從其足下出。者僧若有問殺闍黎价。逼殺首座處底手脚。待車溪纔擬對。便掩耳而出。且要老漢立地脫去。

萬曆辛亥季冬初四日。傳廣首座袈裟偈曰。塢前付囑無多子。百萬人天那個尋。未審是誰成漏泄。至今殃禍及兒孫。

滴乳曰。余攷傳燈。惟南嶽侍曹溪八載。只道個說似一物即不中。招得追風馬子。南明侍車溪八載。止換得個破袈裟。且道。與古人同也別也。參。

端坐而逝。闍維塋於徑山。壽七十二。臘三十。

### 雲谷會禪師法嗣

韶州曹溪憨山德清禪師。字澄印。全椒蔡氏子。七歲見叔母生子。又見叔死。即抱生死去來之疑。年十二。禮南京報恩寺西林寧公為師。時嘉興雲谷會。住棲霞報恩。師執侍甚勤。谷開發悟明心地。師即請西林剃落。盡燒所習外學。謁無極受具。聽講華嚴玄談有省。乙丑。谷結禪期於天界。舉師入堂。示以向上巴鼻。辛未。辭谷北遊。谷曰。吾之大法。在汝肩頭。慎勿容易。邸中閱物不遷論。至梵志出家。頓了旋嵐偃岳之句。生死去來之疑。乃作偈曰。生死晝夜。水流花謝。今日乃知。鼻孔向下。乙亥禮文殊。結茅五臺之龍門。匡山徹空雲棲蓮池。相繼入山。與師語契。辛巳仲冬。慈聖皇太后。為神廟。建祈儲道場於五臺大塋寺。百有二十二日。師與妙峯主其事。壬午八月。光廟誕生。癸未春。遁居東海牢山。恢復那羅延窟。慈聖再徵不得。甲申乃得師。輒賜內帑。師倣古矯詔賑饑事。以賑山東民。丙戌。慈聖頒藏經布金造寺。賜額海印。丁亥工竣。即開爐講。己丑。請藏至南京報恩。感寶塋放光。乙未方士流言侵攘逮赴。詔獄按驗無實。坐以私創寺院。戍雷州衛。道出江西。鄒元標。迎至鐵佛菴。與師一語投契。頓翻前案。丙申。禮六祖。抵戍寓城西坡公亭。雷州饑癘。師收埋骸骨。萬計建孟蘭會。說幽冥戒。天大雨。癘隨止。戊戌。修曹溪通志。戒靈通侍者。酒歸侵田斥僦舍。屠門酒肆。皆為寶所。大鑑之道。勃焉中興。

師舉雲門光不透脫有兩般病因緣頌曰。天街花月影珊珊。沉醉東風獨倚欄。朝罷九重人靜後。六宮猶尚整衣冠。

舉僧問雲門。不起一念。還有過也無。門曰須彌山。頌曰。天寒霜落月沉西。清夜迢迢鶴夢迷。海底日輪紅似火。行人猶聽五更鷄。

舉德山托鉢因緣頌曰。閒看師子謾調兒。顧欠[口\*((止/少)\*

頁)/((白-日+田)/卩)]呻力盡施。觸著翻身聊一擲。低頭歸去令

全提。甲寅夏。慈聖賓天詔至。師返僧服。丁巳。建法雲寺於廬山

五乳峰下。效遠公六時修淨業。天啟壬戌。復住曹溪。癸亥十月十

一日。示微疾。沐浴焚香。集眾告別。顧曰。今日截斷葛藤。端坐

而逝。世壽七十八。僧臘六十。有夢遊集經論註解二十餘種。乙丑

歲。龕歸五乳。塋而藏焉。崇禎癸未。粵人復奉龕。歸曹溪。歷年

二十。端坐如生。遂金漆塗體升座。與六祖肉身相望。就天峙岡舊

塋院地供養。名曰憨山院。去南華寺半里許。

中溪覺林居士李元陽。生而穎悟。過目成誦。初得方士。授導引之術。以為神僊必致。後因讀楞嚴經。大駭曰。世有如是書乎。遂留心內典。樂與僧遊。自號覺林居士。在翰時。常遊法席。見雲谷。遂蒙印可。與默菴定堂二師。為方外契。所著有禪源記及中溪類稿等書。流行於世。

### 龍池聞禪師法嗣

天目蘭風真定禪師。餘姚陳氏子。夙有根器。雅慕禪宗。年二十。禮天目璿公為師。未幾往五臺。一十三載後至徐州鐵佛寺。一夜因風吹殿門有省。尋參龍池。獲心印。自此遊歷諸方。三十餘秋。江淮之間。聲名大著。師嘗頌隨緣赴感。有盡微塵界菩提坐。不動秋毫轉法輪之句。師著冰壺宗鑑及維摩經註共二十七卷。行世。於萬曆壬午正月八日示微疾。至十五日。跏趺而逝。

廣信府鵝湖□□□禪師。郡之上饒朱氏子。偶遇戚屬會道者。談四生之義。師於言下。洞了物我平等大意。往洛之大平落髮。南歸焦山度臘。聞江中推船有省。偈曰。夜靜江空闊。推船因因聲。不知何所往。擔子半邊輕。謁華山聞。山拈一段生涯六不收話。猛提七日。身心脫然。尋歸里中。住靈山。畫大圓相於壁間曰內寫莫教塗黑。外寫勿使傷白。有人向圈裏圈外。下得註脚者。許你學道無疑。不然。總是懨懨。後住鵝湖。十年不立座元。博山參。以趙州無字話相契。請居厥職。贈以偈曰。鵝湖十載虛元位。一旦元何立少年。兩箇眉毛八箇緘。須知佛祖不容前。嘗置無門鎖。置方丈壁。以驗諸方。偈曰。上古流傳鎖。憑君智鑰開。若無開鎖法。相見不須來。萬曆丁□二月晦日。上堂說法。置齋作別。示偈曰。八十餘年幻夢中。鐵牛耕破太虛空。臨行一句相分付。半夜金烏帶日紅。端坐而逝。

### 伏牛理禪師法嗣

均州武當佛巖雲菴真際禪師。神宗時。為慈聖皇太后。轉大藏。詔住靈應寺。恩寵甚渥。賜號不二大師。

上堂示眾。秘魔叉。担雪填井。禾山鼓。眼裡撒沙。饑虛抑勒。托鉢法堂。驀拈拂子云。者隊守古塚底。不知曲了多少。今日落在佛巖手裏。不穿却鼻孔。定是剗却你眼睛。何故。不入洪波裏。爭見弄潮人。

### 徑山下第十三世

## 徑山冲禪師法嗣

杭州徑山南明惠廣禪師。鹽官韓氏子。禮興善芹泉剃染。志慕禪學。恨其宗風不著。徧遊講肆。復歸掩關。於無字話。凝然始覺物理一致。古湛聞有真實志。乃就關扣問。便有師資之契。遂啟關。往謁古湛於車溪。未幾。即入古湛舊隱之白雲山。禁足三載。徑山繼峰老宿。請湛開法。師每聞示誨。必垂淚刻究。一日偶拾片紙。有觀方知彼去去者不至方之句有省。呈湛。湛印可。即舉師首眾。尋付偈曰。得本無所得。傳亦無可傳。今付無傳法。東西共一天。天鐸源頌曰。八載巾瓶窮徹骨。大千攝向一毫端。可憐家破人亡處。猶把封皮當信看。

胡機郁頌曰。頓絕狐疑遠探玄。劫壺空處妙難詮。而今積聚毫端上。一鼓雷音徧大千。

金明旭頌曰。禹貢上承堯舜德。盛明猶見漢唐心。此時不必問端拱。帝業持盈已到今。

兩山越頌曰。河出圖。洛出書。藍田產美玉。赤水育玄珠。仙姿不是人間種。殼裏藏身供上廚。

石門雲頌曰。鑊湯[跳-兆+孛]跳上刀山。氣擁眉間海樣寬。回首死撾塗毒鼓。血漫漫地照人寒。

住徑山示眾。五峯頭卓朔。雙徑尾顛先。喝石巖[跳-兆+孛]跳。明月池傾天。此四句。一句中有殺人刀。無活人劍。一句中有活人劍。無殺人刀。一句中殺人刀活人劍俱有。一句中殺人刀活人劍俱無。伶俐衲僧。簡點得出。一生參學事畢。

空諸性曰。四句外尚有一句子。百味具足。不獨殺活也。然雖南明。終未能舉出在。且道。是那一句。良久云。覷著則瞎。

濟北弘曰。楚黃紙貴。一狀領過。

示眾。以拂子點  此相云。徑山最初。祇為有此一著。遂爾站定脚跟。一挨一拶。愈究愈遠。忽一日不究而究。不窮而窮。不究不窮。不覺頓空伎倆。猛地回覷。又畫一此相云。原來只是這箇。纔知者箇。復打○此相云。便是者箇。諸昆仲。且道。者箇作麼生理會。這裡具得一隻眼。方許到家。

示眾。跳出金剛圈。揣碎虛空骨。剖開秘密藏。放出塵沙佛。大方闊步。妙運囊中。細剪白雲。七片八片。密羅黃菊。一叢兩叢。古佛心祖師意。一齊漏泄。堂堂龍象。有許多眼耳。為甚不見不聞。驀豎拂子。隨擊禪床云。向者裡一舉便見。一擊便聞。赤肉團上。無物不有。無物不空。真俗二諦。於中顯現。十聖三賢。於中休息。以無身為身。將空法作法。其熾也應萬有而不窮。其寂也覓一

法而不有。者點靈明。如珠在盤。以此明心。何心不明。以此顯理。何理不顯。所以道。有意相尋偏不見。無心覷捕體全彰。諸人須向脚跟下。究取始得。

除夕示眾。前年年。鼻孔無半邊。去年年。兩眼不能全。今年年。三十精骨獻青天。我禪已說了。汝等作麼生。參。

元旦示眾。新年佛法有。趙二契村酒。醉倒李麻鬚。王三笑破口。新年佛法無。水上按葫蘆。海底蓬塵起。堂堂在半途。古人提掇不得底。徑山恁麼舉揚。者裡還有佛法商量也無。合掌問訊云。元正啟祚。萬物咸新。

燈節示眾。舉大慧上堂云。正月十四十五。雙徑槌鑼打鼓。要識祖意西來。看取村歌社舞。師曰。大慧三百六十骨節。八萬四千毛孔。抖得敬捏得聚。可謂烜赫古今。法王座上。人天眾前。為甚照應不到。徑山今日要與劈石分金。你諸人也須識得祖意西來。若認定村歌社舞。大似燈影裡行。未覩太陽在。

示眾。烏石嶺與汝相見了也。望州亭與汝相見了也。僧堂前與汝相見了也。大眾。作麼生說個相見的道理。且道。相見見個甚麼。良久云。鰲咬剎竿。狗銜燈盞。

示眾。舉月幻返八峯。峯曰。還我照用來。幻曰。若有照用。即成障隔。峯曰。著廝著空。佛也救不得。幻曰。有無俱寂滅。空佛悉皆非。師曰。月幻氣識超羣。如太阿出匣。八峯鴻門大啟。若海納英流。可謂立賓互叶。照用同施。雖然。還知八峯只解踞虎頭。不解把虎尾麼。

示眾。昔竹山圭禪師。脫略異常。一日遊佛巖。聞風吹殿角鈴聲。倚杖脫去。茶毗得舍利無數。然我衲僧。得一機半解。遯迹林泉。久久操持。掃盡廉纖。末後乃有如是作略。近時師僧。纔得一知半解。就要為人師範。靜工全無。微細未透。末後一著。未免螃蟹下鍋。何也。一回擲地作金聲。九曲黃河清徹底。

示眾。舉南院啐啄同時因緣。師頌曰。同時啐啄不同時。箭鐵飛紅打一鎚。無限周遮頭腦裂。干戈中立太平基。下座。

示眾。舉兩堂首座相見。師頌。兩岸夾流來滾滾。一泓活碧去綿綿。師兒若解反身躑。海底泥牛角指天。

住永慶寺示眾。箇般奇特妙難言。驀直鼻亭跳上天。帝釋鼻梁遭磕破。波斯痛倒海門前。

示眾。張公乍與李公友。欲進李公一盃酒。返被李公進一盃。好手手中呈好手。大眾要見好手麼。第一座抽身便出。師以拄杖打散。師方丈。

示眾。甚麼物恁麼來。石人舞袖笑盈腮。泥牛入海無消息。木馬嘶風趨不回。忽趨回。鐵壁銀山盡打開。驀拈拄杖。畫一畫云。這裡

還有一重。

示眾。將心求佛。墮在毒海。離心意識。趨向無門。諸□。弟。果能休去歇去。以須彌山作四大海。白浪滔天。以四大海作須彌山。紅塵滿地。烹虛空之髓。而滋味嘗新。挑劫壺之燈。而光明灼大。者裡鈎錐不得。那畔鞭索徒施。所以向上一路。千聖不傳。學者勞形。如猿捉影。開彌勒之樓閣。法法全彰。入普賢之行門。頭頭不捨。到此只得木童歌白雪。石女咏清泉。按指則海印發光。動絃則音聲滿耳。接拍既有伯牙。座前誰是子期。

示眾。古人喫三頓棒。如龍得水。似虎靠山。羅籠不住。呼喚不回。倒嶽傾湫。平沉大地。收來盡是馬簸箕。簸□□。若是靈機活脫。別展家聲。著著該羅。步步密運。到者裡。須知日晝雞啼。紅塵犬吠。是佛是魔。三十棒。管甚船來陸來。或饑或飽。一頓飯。論甚明頭暗頭。藏身處沒踪跡。布袋橫拖。沒踪跡處莫藏身。拄杖倒卓。大道祇在目前。要且目前難覩。不是目前法。非耳目之所到。大眾還知此消息麼。良久云。但得春風齊著力。一時吹入我門來。

示眾。舉月溪澗禪師。參東林悟和尚。呈所見。林不諾。溪以林強抑。出不遜語。一日辭林。林負囊送至山門。忽指黃犬曰。者畜生。為甚有業識無佛性。溪於此大悟。師曰。東林垂手處。大似逆鱗徑寸。大岡悟去。也是好肉剜瘡。雖然如是。者裡別有道理。諸人不得草草承當。

示眾。舉則中上堂云。結制來天陰四十日。今朝晴明好晒眼。雖然臂肘不向外曲。諸人分上。也要簡點分明。師曰。平湖結制來四十日。雨淋淋底。臯亭結制來。四十日。乾曝曝底。諸人分上。亦要檢點分明。無論乾箇溼箇。拈向一邊。以拄杖卓一卓云。諸人向者裡。試說道理看。

示眾。落日如懸鼓。峯前仔細觀。霞光交大地。一片錦山川。汝等若作境話會。辜負平生。不作境話會。亦辜負平生。畢竟作麼生。

慧頂棟曰。我最初讀夾山猿抱子歸青嶂裡。鳥銜花落碧巖前。覺意句冷冷然。及徑山霞光交大地。一片錦山川。始知者個道理。

針筭不入。水泄不通。若非打破漆桶底。不錯會也大難。

示眾。舉方山寶禪師。因僧問。如何是般若體。師云。八角磨盤。如何是般若用。師云。八角磨盤空裡走。師云。瑞巖只解隨邪逐惡。不解回櫓就岸。倘問臯亭。如何是般若體。驀與一掌。如何是般若用。更與兩掌。不特指出般若體用。亦且知我衲僧門下。別有爪牙。

示眾。舉方山和尚。未出家時。偶閱壇經。恍如舊習。乃舉黃梅衣鉢因緣。問曰。既不會佛法。為甚又紹祖位。鞏曰。不但祖師。大

有人不會佛法。亦紹祖位。山曰。和尚還紹祖位否。鞏曰。若紹祖位。即會佛法。師曰。瑞巖如蟲禦木。偶爾成文。淨慈被伊一拶。便乃平高就下。唱道門中。略較些子。黃梅衣鉢。未夢見在。大眾要識黃梅衣鉢落處麼。以拄杖卓一卓。喝一喝下座。

示眾。僧問。三世諸佛。為甚不知有。師曰。聰明反被聰明悞。進云。鬻奴白牯。為甚却知有。師曰。棒打石人頭。曝曝論實事。僧禮拜。師舉斷橋上堂云。雁山雲台嶠月。或卷或舒。或圓或缺。兩兩三三。朝遊暮往。袈裟角拄杖頭。挑底挑。裏底裏。不妨自怡自悅。若到瑞巖。定是打教棒折。何故。而今甚麼時節。師曰。古人赤心片片。只要功論蓋代。當日若有見義勇為者。待他正與麼道。從旁走出。震威一喝。看他做甚麼手脚。更喝兩喝下去。瑞巖即有定亂之謀。管取退身不及。

示眾。舉天目進禪師問夷峯寧和尚。如何是西來密密意。峯下禪床擒住曰。西來無意。你道。此間是甚麼意。目自此寢食俱忘。一日登廁。聞僧敲籌作聲。忽猛省。師曰。大岡有驅耕奪食之施。無電激雷奔之作。以致天目。沉言滯句。墮在機境。及聞籌聲。遭他恠笑。若是徑山。打開潑天門戶。一任赤驥追風。精金躍冶。何故。青山無數行人少。紅雨和烟墜綺羅。

師。在龍居首座寮。僧問。已到車溪。更不為人時如何。師曰。樓上春風時欲歇。誰能攬鏡看愁眉。僧擬進語。師喝出。

鐵容玄頌曰。真珠簾箔掩蘭房。明月沉沉客漏長。瓊佩乍生春草碧。嬌容應不復臨妝。

雲庵量頌曰。玉簫吹徹鳳凰臺。古殿深沉曉未開。滿地落花春已去。綠陰空鎖舊莓苔。

僧問。一念緣起無生。超彼三乘權學等見。阿誰緣起有生耶。師震聲一喝。僧禮拜。

晦牧密頌曰。雲收雨歇海天寬。浪激因風起禍端。識得長江波是水。沙鷗夜宿荻蘆彎。

聞谷問。了即業障本來空。為甚師子尊者。被罽賓國王斬却。師曰。本來空。曰爭奈頭何。師曰。本來空。曰為甚罽賓國王。一手墮地。師曰。本來空。

微塵盛頌曰。柳汀斜對野人牕。零落衰條伴曉江。正是霜風飄斷處。寒鷗驚起一雙雙。

因檀越飯僧。知客行覲。維那唱云。板首三分。執事二分。散眾一分。師問侍者云。汝是幾分。僧無語。師召知客曰。何不與他。僧亦無語。師顧視大眾。維那問訊出堂。

雪次。侍者推牕云。滿山都是雪。師云。隨聲逐色漢。僧云。請和尚離聲色道一句。師云。滿山都是雪。

普明用曰。者僧身挨白刃。活得命來。不妨好手。徑山費盡鹽醬。究竟不獲稱心。者裏有向聲色外。別道一句者麼。良久曰。切忌道滿山都是雪。

東林在曰。者僧與麼問。南祖與麼答。固是一等平懷。普明與麼批判。未免當途栽棘。東林要大膽道個滿山都是雪。只知龍向葛坡出。不覺風雷舌上生。揮拂子下座。

普請。師攜作具領眾到山門。適園頭洗菜。磨頭晒巾。師指二人謂眾曰。園有園頭。磨有磨頭。復指自身云。要者漢作麼。眾無語。師拋作具。歸方丈。

雲庵量頌曰。春有百花秋有月。夏有涼風冬有雪。若無閒事挂心頭。便是人間好時節。

師主法十餘年。惟清白約眾。孤潔自居。傍門依戶之徒。畏如湯火。僅鴛湖獨親法乳。師志在古道。凡片紙隻字。誠般若之腴膠也。

泰昌改元庚申仲冬念七日辰時。囑後事畢。奄然坐逝。荼毗塋於徑山普同塋。皆從師志。世壽四十五。僧臘二十三。

### 天目定禪師法嗣

浮渡山華嚴寺朗日本智禪師。曲靖李氏子。禮白齋薙染。謁佛巖不二及性天輩。後登天目。參蘭風契旨。世稱叢林白眉。一時王公大人。執弟子禮。慈聖皇太后法寶。駐錫金谷。表師主其席。

萬曆乙巳十二月念四日。以水盥掌。跏趺而逝。訃聞慈聖。震悼憫卹。遂賜金返靈骨於浮山塋妙高之南麓。以從師志也。有語錄若干卷。行世。

### 不二際國師法嗣

太原府臺山妙峯福登禪師。山西平陽徐氏子。從滿州萬固朗出家。有願行普賢行。始於讚嘆寺。立關三載。遇異僧指示曰。普賢行乃潛行密用。調一切心。非勞筋苦骨之謂也。師遂南遊金陵。參雲谷。谷拈念佛是誰話令參。同憨山清北遊。參徧融圓嘯巖寶大千潤諸公。萬曆初。再參大千於少林。隱居臺山。獲文殊摩頂授記。明神宗為慈聖皇太后祝遐。詔不二赴京。奉旨於臺。與師盤桓累日。機緣甚契。一日被不二驀地一筭。忽然大悟。如是道望隆重。至有猛虎開路菩薩送燈之事。神宗夢師像。徵赴京。賜紫衣師號。示寂。塋於臺山。勅封真佛子。

黃州白虎山興善寺一然如幻禪師。本郡朱氏子。世業儒。性仁慈。常行放生等事。因鄉試脫榜。師曰。吾出家志遂矣。特往襄之草店寺芟染。入伏牛山火堂結制。謁不二。得其穎悟。不二即可以法。萬曆間。慈聖皇太后。建首楞嚴道場。神宗詔入便殿。賜紫竝洪濟之號。表歸隱廬山黃龍。同徹空憨山數人。復白蓮社。戊午年。黃州太常官公遊山。嚮師道風。率文學何其祥等。請住志公白虎道場。不數年。還復舊規。

上堂。釋迦心血。達磨眼睛。阿誰無分。只是不許妄想。所謂得之於心。伊蘭作旃檀之樹。失之於旨。甘露乃蒺藜之園。昔安國問僧。一語具得失兩意。汝作麼生道。僧舉拳曰。不可喚作拳頭也。安國不肯。師亦舉拳別曰。祇為喚者個作拳頭。大眾向者裏下得一語恰當。始知毫釐有差。天地懸隔。

掩關二十二載。崇禎癸未二月十五日。無疾坐化。荼毗葬淋山河之乾方。世壽八十四。僧臘四十一。嗣法弟子四人。

夔州白馬寺儀峯方象禪師。達州羅氏子。參金佛山雲庵和尚。令看如何是鬼神□不破之機。三年有省。出峽遍謁知識。結茅雙溪。一日午炊。聞甑中作聲。忽大悟。作偈。有白雲青嶂點頭之句。嘗遊浙中。庵於杭之清平。真寂印公。蚤年嘗依之。一日舉青峯丙丁童子來求火話詰之曰。青峯恁麼道。法眼恁麼道。為甚麼有悟不悟。印曰。初以識心湊泊。所以不悟。後乃直下承當。故乃大悟。師遽舉拳。揮案一下。勵聲曰。恁麼汝今大悟耶。印擬議。師便痛罵趕出。印直汗流浹背。於茲憤志力參。

萬曆壬辰間。歸白馬。僧問。如何是西來意。師曰。兩頭燒火一頭烟。師手中嘗執鼗鼓。一面書蠹子。一面書犇字。凡應機多舉而搖之。示寂。塋於龍神山。

(滴乳曰。據永覺賢傳。真寂印公塔銘。受記於師。印有語錄〔乃細〕門警訓行世)。

## 徑山下第十四世

### 徑山廣禪師法嗣

建寧府普明鴛湖妙用禪師。杭州海寧鄭氏子。年□七。禮興善濟舟為師。受業於南明和尚。謁無幻。請益參禪之要。一日於徑山禪堂。偶閱思益梵天經註有省。即呈偈曰。鐵壁銀山誰敢摧。賊身驀地拶將來。相看元是舊相識。當下慚惶笑臉開。呈明。明見而呵之。自此誓不作偈頌。單提本參。而自逼拶。南明因病篤。舉香嚴偈問師。師纔開口。明便喝。師復擬開口。明又喝。師點頭。

石門雲頌曰。珊瑚盞盛靈龜血。更酌茶蘼茜翠香。因憶王喬雙羽健。鬢鬚一醉罄壺觴。

師侍南明。明問。斷頭船作麼生架。三脚驢作麼生騎。師低頭下去。明深喜。尋付偈曰。無傳無受法。無傳無受心。付與無手者。掣斷虚空筋。

石門雲頌曰。子陵灘下老漁翁。展轉拋筌力已窮。剛獲赤鱗巖上去。一聲雁落碧波中。

師雖荷大法。終不自肯。後因閱羅湖野錄。至白雲提省五祖處。始得脫然無礙。

石門雲頌曰。及盡今時踞虎頭。揭天聲價有誰酬。其中更有深秋意。海上清浮玉一鈎。

上堂。僧問。如何是古佛心。師便打。曰如何是學人心。師曰。欲攫游龍。螻蛄竟上。曰畢竟如何。師連棒打出。下座。

空諸性頌曰。桃花流水杳然去。別有天地非人間。堪笑漁翁成鈍置。扁舟何處探仙湓。提正令觸髅穿。吹毛凜凜逼人寒。

師訪湛然和尚。師問。目前無法。意在目前。其旨如何。湛云。聞令師出關是否。師曰。不是目前法。非耳目之所到。又作麼生。湛揖云。請出。我要止靜。師便出。

徑山進頌曰。狹路相逢一段奇。灼然賓主禮無虧。就中便有些訛處。不是苦心人不知。

牧公謙頌曰。大鵬搏颺。蒼龍出海。動弦別調。旁觀色改。相語相攜自縱橫。明州有個憨布袋。

無依[離/王]頌曰。鳳管鸞簫隔采霞。不知牆外是誰家。重門深鎖無尋處。徑有碧桃千樹花。

師訪密雲禪師。雲豎拳曰。見麼。師曰見。雲曰。見個甚麼。師曰。大家在這裏。雲休。師拂袖便出。

石門雲頌曰。平展家風兩不虧。翱翔九萬各稱奇。雲犀若解翻身轉。白鼻崑崙笑滿眉。

師與雪嶠大師翫月次。嶠指月曰。者半個在那裡去了。師良久云。會麼。嶠曰。也只得半個。師曰。者半個在那裡去了。嶠亦良久。師曰。也只得半個。相與大笑。

徑山進頌曰。眉端掛劍。寒光如電。互換臨時。穿楊之箭。咄。何似秦時[車\*度]轆鑽。

主峰法頌曰。夜夜蟬蜍掛碧天。清光何處不周圓。都來弄巧翻成拙。彼此瞞預見一邊。

吼山震頌曰。峩眉山月半輪秋。影入平江浸不流。此夕管絃休接拍。風情恐動玉關愁。

閻齋黃廉憲。陞任廣東。入山作別。同曰臨行一句。乞師指示。師曰。三千里外。逢人不得錯舉。

陞座。若論佛法。普明無下口處。今日偶見新山門。拏我拄杖子。浪蕩遊行。穿過東子嶺。直到火燒橋。失脚一跌。落在深溪。幸舊佛殿。出手相扶。以致到家穩坐。新山門見拄杖。浸亦不曾乾。打又不曾溼。將謂別有奇特。所以叫屈。要山僧剖斷。人天眾前。不敢囊藏。新山門三十棒。舊佛殿三十棒。何故。法令之初。償罰要明。下座。

中元。黃蘇門朱聯岳二孝廉。請上堂。云法身流轉於五道。業累繫墜於三途。苦果恒新。輪迴不息。故我大覺世尊。憫物興慈。□緣赴感。運般若智。渡迷津而登覺路。導滯魂以證無生。汝等諸人。欲乘大願。於斯領略。於斯徹證。何物不濟。何苦不離。淨土穢邦。不出臺端。慈雲忍水。總在方寸。其或未然。更須一念心清淨。一念心光明。一念心無礙。心清淨是真佛。心光明是真法。心無礙是真□。真佛無形。真法無相。真道無體。三即一。一即三。此猶屬名言。未是究竟。真正道流。須向那邊覷破。轉過身來。纖息鵬程。直到箇裡。淨裸裸。赤條條。一肩擔荷。三世諸佛。十方菩薩。乃至西天四七。東土二三。並天下老和尚。總不出此。向上全提。渾無趣向。且中元普濟一句。又作麼生。喝一喝云。頭頭盡是光明藏。處處無非解脫場。

萬如禪師請上堂。僧出。師驀豎拂子云。會麼。僧云。恁麼則直截當機舉。四眾盡知恩。師打云。獨你不知。僧便喝。師云。者喝落在□□。□又喝。師又打。乃豎拂子云。大眾會麼。者箇親從□明先師處得來。先師從車溪移下挂搭。遡自涓涓田。黃面瞿曇。在靈山會上。拈花示眾。惟迦葉破顏微笑。瞿曇曰。吾有正法眼藏。涅槃妙心。實相無相。微妙法門。不立文字。付囑與汝。汝廣流傳勿令斷絕。自是展轉。至二十八祖達磨大師。以震旦多大乘法器。航海西來。六傳曹溪。法衍二派。曰青原。曰南嶽。嶽又四傳。而至臨濟。濟十七傳。至斷橋。橋十三傳。至我南明先師。先師付託於病僧。延至今日。恰我如如長老。敦請病僧陞座。舉揚向上宗乘。雖是據款結案。也要諸人共知。且道。知箇甚麼。良久。瞎驢妄受靈山記。遞代相傳到此時。復舉芭蕉示眾云。你有拄杖子。我與你拄杖子。你無拄杖子。我奪却你拄杖子。師頌曰。從無客賜雪中炭。確有人添錦上花。損益非干□與辱。世情偏向有錢家。擊拂下座嘉興諸師同如如微禪師。送源流法衣布衲等至。請上堂。菓子嶺頭。火燒橋畔。有則莫大因緣。不是倒曳橫拖。亦非順水把篙。大眾會麼。驀拈法衣云。此是唐朝宮中所製。遞相傳遠。無端鈍置病僧。病僧撇向塹[土\*(天/韭)]堆頭。冷眼亦不相對。蓋有金粟密兄

在。今日拈來。重新光彩。正是祖禰不了。殃及兒孫。拈拂子云。指揮舊塵尾。野干多驚怕。又拈法卷云。惟有這箇無用處。惹得時人添話杷。去年有箇白拈賊。未曾見我先竊下。如今且向靜處收藏。他日有箇踏翻船子。拂袖便行底。定是鑽龜打瓦。諸大德不得覷著。覷著則瞎。復拈拄杖云。舊店斯開。眾中還有識貨者麼。僧出禮拜起。師連棒打退。復舉大通智勝佛。十劫坐道場。佛法不現前。不得成佛道。師頌云。獨坐幽篁靜理琴。林深花雨晝沉沉。不知春到時多少。祇見簷前翠靄深。

石雨禪師同眾護法。請陞座。即心即佛。猶是譎訛。非心非佛。可無趣向。不是心。不是佛。不是物。穿花蛺蝶深深見。取不得捨不得。不可得中恁麼得。點水蜻蜓款款飛。普明恁麼舉揚。抓著靈峰痒處。憶知拋家散宅。闊步大方。峭巍巍。孤迥迥。淨皜皜。赤洒洒。踏倒諸聖頂[寧\*頁]。把住凡靈要路。雖然。有時一任把住。有時一任放行。有時放行中把住。有時把住中放行。還知栴檀林裡。純是栴檀。獅子窟中。無非獅子麼。眾中或有箇伶俐漢。出來道。普明無端露布。靈峰蘊底。山僧但向伊道。祇因曾與同床睡。是故深知被底穿。

除夕天寒。作九歲殘須守。舉杯拈菓。大家知有大。眾且道。有箇甚麼者裡薦得。不妨拈尾作頭。向三條椽下。七尺單前。擦褲磨裙。忘餐廢寢。然祇個事。不在動用中。亦非眉睫上。所以趙州。凡見僧參便問。曾到此間麼。僧云曾到。州云。吃茶去。或云。不曾到。亦云吃茶去。院主問。和尚為甚曾到。不曾到。俱教吃茶去。州呼院主。主應諾。州云。吃茶去。趙州主張箇事。與衲僧平貼商量。院主不識好惡。至遭一杓臭水。普明者裡。不管他吃茶。不吃茶。只要伊單刀直入。一僧便出。師喝一喝。曳拄杖下座。元旦上堂。古道修然回鳳曆。堯歌舜頌樂無疆。雲籠丹桂金莖秀。雨冰瓊林玉葉長。

崇禎壬午十月十一日辰時。索筆書偈曰。生也錯。死也錯。鐵獅掣。斷黃金。索擲下筆云咄。遂寂。世壽五十有六。僧臘三十有九。茶毗塔靈骨於本山齒塔興善。順治間。遷骨塔於興善。與齒塔相望。

### 浮山智禪師法嗣

妙峯徹庸周理禪師。雲南人。其家世力農。幼歲出家。質鈍語蹇。因禮觀音號。豁然大悟。十八歲。見頓悟。要論維摩經。知所用心。處又以空觀習定。大有得力處。及讀大慧中峯諸書。乃知用無所用。得無所得處。而未敢足也。邂逅密藏和尚。印證四楞。始覺

貼地。丁巳謁天童悟。童一見便問。萬里到此。費却多少草鞋錢。師曰。某甲乘船而來。童曰。來此作甚麼。師曰。有事借問得否。童曰。你在甚麼處。師曰。和尚還見麼。童取杖。師便喝。童打。師接住送一送。童曰。你作甚麼。師曰。和尚要杖便送還。童大喜。師機語往往例此。而氣吞諸方。金陵諸縉紳。增城葉公。修齡楊公等輩。為方外交。陞座示眾云。大眾還會麼。釋迦老子來也。若也不會。山僧為汝諸人。饒舌去也。祇如教中道法性。徧在一切處。一切眾生及國土。三世諸佛。無有餘。亦無形相。而可得。又道。天上天下。無如佛者。既道無形相。而可得。又謂。一切無有。如佛者。汝等諸人。作麼生商量。良久云。善來世尊。安然而住。拈拄杖下座。上堂。上前一步。不如退後一步。上前一步死。退後一步亡。只如不進不退。未免死水浸殺。諸人作麼生。是出身之路。崇禎丙子年入寂。有谷響集。行世。

### 白馬象禪師法嗣

黃州西陵天臺聞谷廣印禪師。別號掌石。嘉善周氏子。父珊。母趙氏。夢禪率甲士護門。覺而生師。兒時左眼角。常有塢影。父命習儒。不願。乃送杭開元剃染。一日指法界圖。問其師曰。十法界從心生。心從何處生。師不能對。時儀峯。結廬清平山。師往參。理前問。峯曰。汝要會須從。妙悟始得。乃令看雲門露字。久之。閱七賢女遊屍陀林話。忽有省。見峯。峯舉丙丁童子來求火話。詰之曰。青峯法眼。一般恁麼道。為甚有悟不悟。師曰。初以識心湊泊。所以不悟。後以直下承當。乃大悟也。峯舉拳揮案。勵聲曰。恁麼則汝大悟耶。痛罵驅出。師直得。汗流夾背。自是益力參究。年二十四。會峯還蜀。師乃謁無幻。單丁法華山。禁足白雲峯下。於亮座主參。馬祖因緣未決。一日觀黃瑞香花。忽大悟。述偈曰。却是虛空講得經。碌磚瓦礫正堪聽。向來扭捏孃生鼻。錯認葫蘆作帝瓶。於是首眾。坐禪徑山蓮。居永慶諸處。萬曆王子。興復真寂。戊午退隱。楚之黃安天臺。次於建寧創寶善。晚歸真寂。崇禎丙子臘月十七示寂。塢全身於孔青山之陽。壽七十一。臘五十八。

徑石滴乳集卷之四

徑山下第十五世

普明用禪師法嗣

建寧府紫雲峯衡石悟鈞禪師。錢塘潘氏子。幼而穎悟。慧性不凡。總角時。矢志出塵。二十受具。即徧歷諸方。雖有所契。終不自諾。復謁佛日。方深得洞上微旨。佛日與鴛湖友善。鴛晚年多疾。以不得其嗣。為已憂。佛日效道吾與夾山故事。遂指師參鴛湖於普明。洞徹圓常。一日鴛問。化人問幻士。谷響答泉聲。欲識吾宗旨。泥牛水上行。意旨如何。師曰。夢眼見空花。鴛曰。臨濟有一句子。你又作麼生。師便喝。鴛便打。師又喝。鴛又打。師禮拜。鴛曰。元來是瞎驢。師拂袖便出。鴛命掌院事。

崇禎辛巳。鴛湖退居。四眾請師開法。上堂。僧問。昔日無趣老人。今朝衡石和尚。如何是源遠流長。古今不異。師曰。開池見明月。揮塵動清風。曰雲峯一滴水。大地盡承恩。師曰。會取未來的。乃曰。雲生寶樹。風敲翠竹。勘破鷄鳴。徧地塗毒。者是無趣老人的落處。即今還有知落處的麼。有即出來。通箇消息。良久擊拂子下座。

師住雲峯。一時縑素畢集。順治乙酉。間隆武仰師道風。詔至內掖。詳問法要。師以本色奏對。隆大悅。賜紫竝號及追諡。鴛湖廣覺大師。塏曰妙莊嚴。丙戌四月初四日示寂。世壽三十四。僧衲一十五。有演義答響等錄十五卷。行世。

空諸性。曰臨濟一宗。自斷橋無趣祖下。付授益嚴迨鴛湖。而三枝競秀。師居其長。當干戈擾攘之餘。目擊流離。悲心益切。一時文武大臣。薦拔祈禳。敦迓無虛日。夫以師法道。使天假之年。當必與金明。永正閩浙唱和。大為佛祖輝銚者。運逢草昧。曇鉢先零。嗚呼惜哉。

嘉興府金明寺介菴悟進禪師。字覺先。姓張。本郡人。母賀氏。夢日輪入懷而誕。幼不從兒嬉。喜遊寺院。見佛像則依依不忍去。及冠習舉子業。常繙內典。志慕禪宗。禮龍池微禪師祝髮。因病臥。聞匠斧斫大木聲有省。即呈微。微頷之。

師參。鴛湖纔跨門。鴛云。是甚麼。師擬對。鴛震威一喝。師豁然契悟。乃掩耳而出。

三角文曰。洪鐘在架。遇物必鳴。携劍臨鋒。方稱作者。當時普明老人。雖向毗盧頂上曲開一線。苟不遇鶻眼龍睛。亦未見有今日也。所以云。積谷堆金易。求賢得客難。今日不肖兒孫。恁麼判斷不是。妄拈祖父遺言。只貴沙盆扶起。敢問。現前大眾。還有共相證明者麼。以拄杖一卓曰。放出斷橋車溪水。一任滔滔滿五湖。

石門雲頌曰。打破鴻濛竅。掀翻碧落圖。少林梅產玉。春色滿皇都。

龍興在頌曰。敲出金鸞五色髓。撲碎驪龍明月珠。天上人間俱結舌。一段風流出鏡湖。

古林如頌。拂拂春風上苑香。游人不禁醉壺觴。等閒覷破東君面。勒馬歸來月轉廓。

天柱峻頌。萬疊銀濤漲禹門。揚鬚鼓鬣有鯨鯢。一聲霹靂驚天地。直得風雷宇宙昏。

夢堂倪頌曰。狹路相逢驀一拶。根源徹底不知窮。迅雷斷送黃昏雨。四海漫漫鼓黑風。

龍門性頌曰。纔承恩命處東宮。不與尋常體段同。石火光中明下載。江南江北動悲風。

希覺銳頌曰。醉倚花闌日未斜。却將旅館認為家。陽春一曲堪回首。處烟村噪暮鴉。

鴛湖欠安。師侍次。鴛命茶問曰。汝字覺先。喚甚麼作先。師曰。且喜今日得自在。鴛曰。如何是覺後。師曰。請和尚尊重。鴛曰。汝還分得先後麼。師良久。鴛便喝。師曰。只管吃茶。鴛曰。如何是吃茶的事。師曰。柿棗腐乾都在者裏。鴛曰。意作麼生。師曰。一口吞盡。鴛曰。是甚麼滋味。師曰。甜者甜鹹者鹹。鴛曰。未得更道。師禮拜曰。謝茶。鴛深肯。

金明旭曰。大丈夫。當鑪不避火。迸臨場。豈諱截舌機。旭是普明四世孫。敢言未在若是。金明待他道。被我一口吞盡。驀豎竹篋曰。者箇擗普明。若出得者。隻手老漢吞了底。也須吐出。

普明上堂眾集。乃舉拂子。曰世尊拈一枝花。老僧舉一枝拂。且道。是同是別。師出禮三拜歸位。明付師法偈曰。沿流一段事。竟無頭與尾。付與獅子兒。哮吼滿天地。

鐵容玄頌曰。琵琶起舞換新聲。總是關山離別情。撩亂邊愁聽不盡。高高明月照長城。

主峰法頌曰。相逢狹路難迴避。腦後一槌便見腮。不是虎鬚頻倒捋。至今那得化龍才。

金明旭頌曰。偶攜枯桐上國遊。動絃別調意悠悠。當頭驀拶悲風起。代代兒孫抱杞憂。

僧參師曰。你是高峰僧那。曰是。師曰。既是高峯。為甚在我脚下。僧無話。師打出。

僧問。如何是祖師西來意。師曰。金風吹繡水。桐葉落莓苔。

胡機郁曰。若是英俊。衲僧腦門。有蓋自知。金鷲一夜來。階砌梧桐葉。我意似秋雲。我心如皎月。

崇禎癸未冬住徑山。結制上堂。僧問堯天舜日。野老謳歌。諸護臨筵。欣聞法要。師曰。天長地久。曰一句語中含日月。片言。自此振宗風。師曰。却被上座道著。乃曰。今日諸方結制。未免攢花簇錦。巧妙尖新。縵天布網。打鳳羅龍底句。子賺誤於人。徑山別資一路。為汝諸人鉗口結舌。冷愀愀去。寒巖枯木去。一念萬年去。任他機似鐵牛句。如電閃管取崖州萬里。

住餘杭廣福。上堂。舉廣福惟尚禪師呈偈覺印。印豎拳曰。正當恁麼時作麼生。尚掀倒禪牀。印便喝。尚曰賊過後張弓便出。師曰。覺印如王秉劍當斷不斷。惟尚轅門衝擊逞俊不禁。若據令而行。各與二十拄杖。且道。新廣福具甚麼眼。

住武康天池。上堂。舉雪菴示眾曰。乍住城隍寺。無東又缺西。汝纔擡眼看。我便放頭低。鬚髮白如雪。身心爛似泥。本來無佛法。何處是全提。師曰。若論全提佛法。身心甚處得來。天池則不然。城市山林總一同。聞聲見色不曾聾。識得大蟲原是虎。玄沙恰似謝三翁。住鍾溪太平。端節上堂。今朝又是五月五。大鬼拍手小鬼舞。驀然撞著桃符神。雙手搥胸叫冤苦。大慧恁麼道。恰似官債未了被鈎人。一拶神頭鬼面。一齊現出。太平與你。些子禁方。卓拄杖曰。今朝正值五月五。不用雄黃并艾虎。理能伏豹澤藏山。雲散青天日卓午。復卓一下。

順治戊子住金明。上堂。娑婆世界。以音聲為佛事。香積世界。以香飯為佛事。金明者裏。以破院為佛事。還見麼破禪堂。灰頭土面破佛殿。馬額驢腮破山門。擎拳持杵破佛閣。待月眼雲破鐘樓。知音者少。令一隊破。衲僧居此。以破破不破。破破不破。不破不破底。運用無窮。直教七通八達。若是超宗異目。向者裏輕輕拶著。拍拍相應。呼之以牛。自能拖犁拽耙。喚之以馬。便乃銜鐵負□。山僧只得另眼相看。將破破底。相待眾中。有斫□開劈不破底麼出來。金明與作。破破去也。良久以拄杖。旋風打散。歸方丈。

上堂。問按倚天長劍奮。踞地獅威。學人上來。請師一接。師便喝。僧曰。者是方便門頭句。如何是正令全提句。師又喝。僧擬進語。師便打。乃舉白雲端曰。若端的得一回汗出。便向一莖草上。現瓊樓玉殿。若未端的得一回汗出。縱有瓊樓玉殿。被一莖草蓋

却。師曰。白雲不是好心金明者裏。向不與人枷鎖你諸人。端的得一回汗出。頭頭玉殿。處處瓊樓。端的一回汗不出。頭頭總玉殿。處處亦瓊樓。還知落處麼。甜瓜徹蒂甜。苦瓠連根苦。

示眾。東熱鬧西熱鬧。忙忙業識不知老。苦他烈燄熾炎炎。獨我陶朱靜悄悄。夏蟲若解識寒冰。鐵牛決不被蚊咬。忽被咬。驚起楊岐三脚驢。百億須彌都踏倒。師嘗垂三問。勘驗學者。一曰。既是天封室。理應絕此絕彼。為甚有迎有送。獅子窟中。因甚有狗。范蠡越國大夫。因甚居吳地。

癸丑九月二十三日。沐浴更衣。書偈辭眾而逝。世壽六十有二。僧臘三十有七。茶毗骨白如玉。牙齒不壞。骨塔於隱川大慈菴。齒塔於楚黃石門山之黃荊。

嘉興府永正寺一初悟元禪師。姓曹。郡之當湖人。生而岐嶷端敏。喜趺坐。十歲乞父教佛經。能解妙義。十五即參究宗乘。二十豁然大悟。禮興善弘遠為師。參普明。執侍久之。明一日問。我心裏不安。你還得太平也未。師曰。蒼天蒼天。又一日入室。明豎拳曰。道一句看。師便掌。明大笑。師禮拜。於是機契。返興善掩關。十有餘載。

順治辛卯住永正。上堂。花笑春風。格外真規。頓現漁歌曲水。就中消息全彰。向上拈提。不礙通人。唱和隨宜。施設何妨。達者商量。寒時添衲。熱則披襟。休云。覓火和烟。得饑來喫飯。倦即打眠。莫道。擔泉帶月歸。握一拳。大千香水海。攝盡無餘。舒一掌。百億須彌盧。拈來有據。所以道。大人得大機。大智得大用。設或情塵未脫。翳眼猶存。

示眾。以拄杖卓一下云。道得也。被他穿却鼻孔。道不得也。被他穿却鼻孔。時有僧問。道不得穿却鼻孔。即且止。道得因甚也。穿却鼻孔。師擲拄杖。便歸方丈。

示眾。問僧有一句子。未打鼓前。分付諸人了也。若也會得。方可商量。如或未然。豈堪共語。拈拄杖。一時打散。歸方丈。

舉六祖曰。我有一物。無頭無尾。無名無字。無背無面。諸人還識麼。時荷澤會出。眾曰。是諸法之本源。乃神會之佛性。頌曰。橫將玉笛遡風吹。不犯宮商調自奇。最惜能邀仙子曲。被人喚作鷓鴣辭。

僧參。舉雪峰淘米話未了。師劈頭打云。殘羹餽飯。不勞拈出。僧罔措。師云。學語之流。直打出。

僧參。纔展坐具。師便打。僧云。謝和尚慈悲。師云。山僧今日失利。

尼問。那箇是學人本來面目。師曰。一場出醜。尼禮拜。師曰。眾眼難瞞。

康熙戊午五月十九日。東通諸檀咸集畢。師合掌敘別而逝。壽六十四。臘四十二。塔于丈室。

## 徑山下第十六世

### 金明進禪師法嗣

武康栢山資壽寺素弘真理禪師。漳州海澄陳氏子。初參玉林諸宿。不能洒脫。次謁介菴於天池契旨。順治庚子。住栢山。上堂。朔風凜凜。寒威彌亘。六合慧日。明明光華。普照大千。佛祖機關。一時漏洩。金剛正眼。一齊豁開。性燥漢遑著。便行不丈夫的。有甚語話分。諸佛出世。千言萬言。與人解粘云縛。鼻祖西來。橫說豎說。只要明心達本。且道。本作麼生達心。作麼生明縛。作麼生去粘。作麼生解莫。巍巍堂堂。是明心達本耶。洒洒落落。是解粘去縛耶。若與麼解會。只成得個韓獹逐塊。□是衲僧行履處。大眾要會衲僧行履處□。驀拈拄杖。卓一卓下座。僧參。師問。三世諸佛歷代□□。為甚麼出者裡不得。僧擬議。師便打。

石門雲頌曰。飛霆激電龍翻海。偃嶽旋嵐總黑風。兩岸蘆花吹作雪。半隨流水半飄空。

師。隨眾作務。嘗為虎說戒。虎不復作崇。□是遠近緇素。尊其道德。以不及見師為恨。

康熙癸卯□□月十六。向朱君行家募柴歸。謂眾曰吾事畢矣。即歸方丈坐化。世壽五十五。臘二十八。

永嘉萬年夢堂真倪禪師。上堂。僧問。如何是清淨法身。師云。破糞箕上堂。目前無法。獨露真常。意在目前。阿誰搆取不是。目前法轉。換他一句子不得。非耳目之所到。聲色難瞞。大眾到這裡。也須透遇始得。

上堂。卓拄杖一下云。大眾會麼者裏會得。不妨歸家穩坐還會麼。復卓拄杖。

北京安化世高本則禪師。順治辛丑住湧泉。上堂。遇良工。逢妙手。端的人前謾哮吼。崑崙倒跨上須彌。直得翻身藏北斗。放出南山鱉鼻蛇。八臂那吒遭一口。咄。者段風光。誰不知有。諸昆仲。靈雲不知有。見桃花而悟道。香巖不知有。聞擊竹以明心。楊岐不知有。一燈明千古。寶壽不知有。幾片生薑辣萬年。忽猫叫。師云。猫子上座。又為□□道破了也。胡餅裏更討甚麼汁。擊如意云。頻呼小玉元無事。只要檀郎認得聲。

上堂。拈拄杖云。山僧拄杖子。昨夜忽抽條。今朝剛吐蕊。一花五葉開。香透乾坤髓。不假劫外之春風。豈應今時之律呂。卓一下

云。數聲野鶴驚天至。無限魚龍衝浪來。越恪風流從此振。大家拍手舞三台。

嘉興府金明寺東巖璨禪師。姓鮑。徽州人。嘗著樂道歌曰。君不見山中樂道。常知足三條短篋。腰間束歲久年深。百念消破瓦鐺邊。上一個也不榮也不辱。半升三斗是吾祿。每日支筇澗上遊。又見牧童驅野犢。嘆韶華如轉燭。世事奔波何了局。偷得清閒快活居。是佛是仙都莫做。又不見自古夷齊耻周粟。商山□四皓有高躅。竹林茅舍放胸懷。種菓栽蓮遠塵俗。於此樂是真福。猶勝公侯積金玉。隨緣任性且逍遙。塊石枕眠歌一曲。阿呵呵舒兩目。有誰瀟灑天地間。笑罵從他喚顛禿。僧問。如何是到家底消息。師曰。待汝站定脚跟。即自汝道。

建寧府妙峯益菴素穎鑿禪師。莆田陳氏子。寓普明。中秋示眾。中秋八月半。桂轂圓璀璨。清光何處無。石樓尤好玩。君不見江西馬簸箕。鈎賊破家良可歎。供養修行物外超。至今流落沒崖岸。昨夜三更月到窻。嘉州大象。與陝府鐵牛。索鬧爭這舊公案。却要妙峯。為他判斷。山僧向他道。有利無利。不離行市各打二十棒。趁出二俱無著漸惶。直去日本國祖欸。欸地擊鼓。唱個菩薩。蠻好快活。阿汝諸人。青天白日。向這裡討甚碗。以拄杖一齊打散。康熙癸亥季夏。無病而寂。茶毗烟燄結緣。頂骨牙齒舌頭俱不壞。塔於薰岩。

蘄州三角山龍門資教寺古壁文禪師。襄陽人。姓程氏。師卓錫廬山漢蓮院。順治丁酉。開法浣川之萬壽。己亥遷三角。

上堂。閉門造車。開門合轍。孤峯頂上。二俱不立。連朝雪散長空。千山共成一色。忽然地爐灰飛。燒殺庭前古栢。急急□下雲頭。救來一天星月。仔細檢點打刀。原是邠鐵。一道清光射斗牛。四埜寒林風瑟瑟。驀拈拄杖。得得攪羹。須趁爐烟熱。癸卯夏命灌沐。拜辭金明老人像。入室端坐。說偈而逝。塔于本山。

嘉興府三塔景德寺主峰圓法禪師。徽州人。原籍應天沐國公之後裔也。仕郎將忽心花發現。遂薙髮為僧。參金明。明豎拂子。師便喝。明曰。從上佛祖。盡向這裏流出。你還見麼。師曰。從上佛祖。盡從這裏來。

宜林能曰。者裏出天衢。跨捷驥者裏來。監車輾破官街。莫恠相逢不下馬也。曾拍拍舞三台。

宗如昇曰。金明撩頭。三塔撩尾。父子互換。足可觀光。若是從上來事。只管在語言上。卜度者多。不錯會者少。

石門雲頌曰。海客乘槎欲揆源。仙都遊遍不知尊。一朝花下親回首。始信冥泠起化鵬。

己酉秋月。作書辭秋岳曹司農。與眾護法畢。施博居士。問曰。和尚此去。還是往天堂下地獄。師展兩手示之。士禮拜。師珍重而逝。茶毗得舍利無數。塔于本寺之乾。

嘉興金明晦巖真烟禪師。嘗頌。諸可還者。自然非汝。不汝還者。非汝而誰。曰仙娥肌骨本風流。紅粉慵施下玉樓。雲珮霜環零落盡。却教無處可遮羞。

蘄州三角龍門天峰性禪師。黃梅王氏子。即仲暄公之後裔。生而淡泊。幼習青箱。喜出世。學每讀竺典。徹日忘倦。及世異。飄然四方。至浙之苕溪。禮金沙智浪雜染。服勤數載。一日思。生死事大。往叩石奇于雪竇。令參本來面目話。刻究累日有省。述偈呈奇。奇乃首肯。後參金明。入門便喝。明亦喝。師又喝。明即拈棒。師曰。老漢今日敗缺。明便打。師曰。轉見不堪。明便休。次日陞座。師出問。長年為覓知音少。今日相逢事若何。明曰。放你三十棒。師震威一喝。明顧眾曰。看取這員戰將。師拂袖歸眾。順治乙未秋。明謂師曰。此事須是。箇人方能擔荷。觀汝見地超卓。毋久滯此。是冬出世松江清涼菴丁酉遷小貞種福院。戊戌歸里。眾請重興多雲山。康熙己酉夏。三角古和尚謝世。眾請示席。甲寅黃梅紳士。請復興東永福及菩提等處。凡師到處即成伽藍。

上堂。僧問。纔離秀水。便跨雲間。未審第一義。如何舉唱。師曰。突出難辨。曰入廬垂手。舊日家風。作麼生。是斬新一句。師曰。截流透海。乃曰。道人取則原無定。向動若風行草偃水到渠成。遇物即宗圓音暢美。一句該羅。千差坐斷。汝等諸人到者裏。須知轉身一步。拈拄杖卓一卓下座。

翠峰裴公琦禪師。

嘉興府金明寺別傳真化禪師。本郡屠氏子。年十九。依介和尚。剃染受具。參三不是話有省。命掌記室。明一日以衣拂付之。出世秦溪。師性恬淡。凡上堂示眾。隨機開導。不容人錄。

廣陵海月天岩真啟禪師。如臯冒氏子。從法中出家。小參孔子不識字。達磨不會禪。人却不信。鳥大如山。魚大如海。人却不信。父少于子。弟長于兄。人却不信。明星午現。紅輪夜照。人却不信。海月與麼說。諸人不信。諸人與麼說。海月不信。諸人不信。海月不信。且道是同是別。顧左右云。畢竟作麼生。復顧左右云參。

太倉問梅院宦陳永修禪師。武林李氏子。上堂。僧問。如何是繡雪境。師曰。曲徑幾回苔蘚積。雪堂深處竹風清。僧云。如何是境中人。師云。扶筇揀點間花落。信步移看碧水澄。僧云。向上事又作麼生。師便打。上堂。山僧有一句子。久欲說向諸人。因世事太忙。不曾啟齒。今日偶間。何妨細說。汝等各宜聽取。便下座示眾。庭畔陰濃。兩久如醉。堤邊楊柳。含珠吐翠。池塘蛙鼓響如

雷。林下禪和打瞌睡。阿呵呵。會不會。卓拄杖云。日高花影重。風暖鳥聲碎。

師問舜曰。子近日作麼生。舜云。上是天。下是地。師云。大有人不肯汝。舜云。要他肯有何益。師便打。舜云。大有人不肯和尚。師云作麼。舜云。切莫教壞人家男女。師云。玄沙為甚不肯靈雲。舜云。勸君更進一杯酒。西出陽關無故人。師頷之。

癸卯春。仍歸老問梅。嘗謂眾曰。時光迅速。汝等急須照顧脚跟。孟冬二十七日示微疾。至三十晚。呼行者。取湯沐浴。趺坐脫去。時山鳥哀震林木。

南康府雲門既白仁旭禪師。參金明。明以杖畫地曰。向這裡道一句。師以具打圓相。明便打。師喝。明曰。亂喝作麼。師拂袖便出。初住廬山五老峯。每與衲子盤桓。無不悅服。後遷雲門。一日謂眾曰。道得個轉身句。又有懸崖撒手句。道得個撒手句。又有末後句。試通個消息。看眾罔措。師曰。不會那老僧自道去也。即端坐說偈。擲筆而化。

泉州承天寺懶若真曇禪師。字時現。晉江鄭氏子。因觀奕小參。碁逢敵手難藏拙。詩到重吟始見工。衲僧家竿木隨身。臨機制勝。亦如此局頗乎。相類靜時棋止。動則棋行照用。同一雙關。而並走事理兼至。一截角而斜飛。埋兵挑鬪。何妨擊此攻彼。單刀直入。貴在破疊。先登傍邊作勢。豈能侵闖門戶。靠角求活。錯過多少城池。三軍失利。為是遲了半刻。突圍而出。終是賊後張弓。隨人高下。固為失策。縱爾饒半。落在第二。故曰握籌猶屬後。輸贏一著先。諸人要識者。一著先的道理除非。打破大鐵網。踏翻倒垂蓮。殺活自由。方稱國手。點檢將來。衲僧本分極則。猶少一著在。如何是衲僧極則。未分黑白妙難施。文彩纔彰一局棋。畫斷中間十九路。方能坐享太平基。臨終沐浴。說偈而逝。茶毗隻履不壞。至今供奉。塢于清源山。

湖州高峯淨名菴雪子淨禪師。上堂。舉正靜和尚指芍藥花。問行者不作紅色會。不作白色會。你作何色會。曰紅底紅得好。白底白得好。正曰。汝猶被色轉。曰除却紅白。請和尚別道。正曰紅底紅白底白。師頷曰。不作紅不作白。除却兩般休漏泄。杜宇聲聲叫落暉。春風狼藉枝頭血。

江州廬山東林興龍寺山鐸真在禪師。別字筠菴。姓李。桑落人。生而良知。不樂舉子業。以先廕襲為郎將。因將犯法斬之。師心凜然。即謁匡廬東林薙髮。因閱高峰錄。疑拖死屍句。徧參諸方。究其行解相應。聞介老人有古人風。特造其室。一見如有夙契。遂折節焉。明問。不是心不是佛不是物。是個甚麼。師曰露。明曰。昨日有人與麼道三十棒趁出了也。師曰。要打便打說甚昨日。隨聲便

掌。明約住曰。者瞎驢亂作那。師擬進語。明便打。師復擬進語。明又打。師豁然契證。

天鐸源頌曰。行到山窮水盡處。鵬搏獅迅太弛張。却將三尺龍泉劍。捏作還魂導魄香。

印宗奇頌曰。歷徧千峯與萬峯。白雲深處見孺踪。翻身直上最高頂。激電驅雷縱遠鴻。

石門雲頌曰。碎出金鸞五色髓。冲開碧落萬重杉。祇因客不龍門宿。霹靂飛騰送遠帆。

次早入室。明曰。昨日公案未圓。師打露柱一掌曰。又要重說偈言。明曰。怎奈公案何聲未絕。師震威一喝。明亦喝。師又喝。明曰。三喝四喝。後又作麼生。師連喝。兩喝。明曰。識此一喝恩大難酌。師禮三拜。明深肯。遂出源流付之。

印宗奇頌曰。驀地恰逢沽酒店。你杯我盞破窮愁。相携深入桃花塢。那管人間春復秋。

金明旭頌曰。海天空濶泛輕舟。逞盡風流不肯休。驚起蒼梧枝上鷺。直冲雲際過滄洲。

石門雲頌曰。壞垣破屋無今古。四壁通同渾不遮。倏爾西風撼桂子。簷前驚起數聲鴉。

康熙甲辰春。歸住東林。乙巳秋。遷楚蘄華桂。己酉移西陵之碧雲四眾川赴商確。佛祖公案。無不悅服。

上堂。及盡去也。地幹天旋。龍吟霧起。虎嘯風生。正當恁麼時。尋常做手脚底。以沙門一隻眼。印定森羅萬象。便能口吸西江。身藏北斗。將三寸龜毛。攪斷黃河。一葉栗蓬。劈開華藏。頭頭現。法法彰。牛溲馬溲。耀古輝今。塵塵說。剎剎談。白牯狸奴。吼雷掣電。故先德曰。入理深談。以無功而會旨。又曰。明明古路。不屬玄微。一念普觀。廓然空寂。興化汾陽。及我鴛湖諸祖。得此一著。提王庫刀。用殺活機。克振濟北家聲。揭示人天正眼。山僧今日。亦以此著。不惜賊私和盤托出。敢將雲門餅趙州茶雪峯毬。拋向當陽搆得底。大好受用。倘有出格高流。更烹露地牛。割蒼梧鳳。剖明月珠。以千聖不傳。向上一著。破破的相待。何故鐵牛踏破玄關竅。野老謳歌樂太平。

辛亥九月十五日。以微疾示眾。有記取明年今日日之語。一眾駭異。時有僧出問。和尚尊意如何。師曰。三百八十四王子。又七月初旬。謂徒眾曰。吾欲歸里。宜速備之。眾以為常往。遂買驢一頭。以代步。師顧而咲曰。吾行非驢所堪。自此諄諄誡眾修潔。九月初八日。入城辭眾。檀越并諸山耆宿至。十一歸山。十二陞座開導。其略曰。吾身後。不許舉哀開孝效世俗所為及化錢等事。不許造塔。須將靈骨。拋乘江河。利生不得故違。十五日辰刻。沐浴焚

香。端坐書偈而逝。闍維起骨得其精。白齒亦不壞。數珠分心如故。黃安道俗。頂禮泣下。如喪考妣。師生天啟。辛酉十一月十九日。世壽五十二。僧臘二十八。

太倉藕菴竹菴真衍禪師。偶閱圓覺經。菩薩發問。今者四大各離妄身。當在何處。遂撫几長嘆。人生不明個事。徒為僧相。於本分中。無所益也。於是徧參。一日聞板聲。忽然有省。造金明。參介和尚。執待逾年。隱于婁東。因疾退隱東關。康熙丁巳七月十七日寅時。索筆書偈曰。生平孤子。杜門守拙。吾道雖涼。仗後昆烈。喝一喝。擲筆而逝。塔于金墅鎮蓮花寺右。

圓印尼參。師曰。世尊拈花。迦葉微咲。且道。咲個甚麼。印一喝。師曰。者一喝落在甚麼處。印曰。不妨疑著。師豎拂子曰。者個響。印曰。不得妄通消息。師曰。適來山僧道甚麼。印曰。前言何在。師曰。山僧年邁。印曰。年邁即得。便禮拜。

嘉興府三壩景德寺妙雲真雄禪師。姓徐。金華武義人。父仲芳。官登州都司。誕師署中。及襁褓。每見佛僧。輒生欽悅。九歲喪母。時世運多艱。芳歎曰。大丈夫不能定亂。莫若入空門趣佛乘。乃棄官從華嚴。自化糴染。師亦依芳祝髮。禮靈隱具德受戒。領竹篋話。參究靡懈。偶至北高峯。篤疑忘。返擡眸見月。心境廓然自爾。疑團頓釋。且抵寮。眾咎違規。師怡然笑曰。若不登高望。怎知滄海寬。德歷。舉公案詰之。無不了了。遂謁木陳祖印費隱箬菴浮石玉林牧雲一初諸老。機鋒不讓無可。師意嘗聞。介和尚門風高峻。道重諸方。即造金明。明問。雲封獅窟。向背無門。汝從何入。師曰。從門入者。不是家珍。明曰。汝是行脚僧。為什向驢胎馬腹裏作活計。師曰。今日親見和尚。明曰。你看老僧眉毛。落了幾莖。師曰生也。明便打。師曰。不入洪波裏。怎見弄潮人。明曰。你見何道理恁麼道。師拂袖便出。尋命茶。明拈菓曰。者是醍醐。是毒藥。師曰。舌頭在和尚口裏。明曰。你作麼生會。師便喝。明置菓師前曰。試吞吐看。師作禮曰。謝和尚茶。明即令參堂。遂安維那。次遷監院。王子元旦。明上堂。拈拂子召眾曰。世尊說法四十九。老僧開堂二十五。靈山拈出一枝花。金明豎起一柄拂。且道。是同是別。師出眾禮拜曰。且喜老漢今日瞥地。明豎拂曰。只者個。豎窮三際。橫徧十方。且道。承誰恩力。師曰。粉骨碎身未足酬。明打一拂子。師禮拜了依位立。明即著從上源流。并法偈付之。

康熙癸亥出世。臨清州大悲寺。上堂。師喝一喝曰。若論第一義諦。諸佛列祖口挂壁。上雖則官不容針。新長老也。只得傍開一線。拈拄杖卓一卓曰。莫有不顧性命底。出來與拄杖子相見。僧問。毗盧頂上草生青。金剛脚下死蛇橫。即且置玉殿荅封。意旨如

何。師曰。白雲籠碧樹。誰識聖堯顏。曰天時地利。四眾咸和。慶祝一句。又作麼生。師曰。山河天子壽。世界法王身。曰蠡湖滴乳傳芳永。舊店重開法化新。師曰。也要大家出隻手。曰一句渾超諸有象。千載黃河今又清。師曰。好個消息。曰學人禮拜有分。師打曰。且莫詐。明頭問。撥草瞻風。瓦礫生光。如何是大悲境。師曰。雲眠斷碣鳥宿迦。頭曰。人傑地靈。素緇駢集。如何是境中人。師曰。眼生眉下。耳搭腮邊。曰人境已蒙師指示。正令全提事若何。師劈脊便打。僧曰。作家宗師。天然猶在。師曰。同道方知。乃曰。剎竿豎起。古店重鋪。打開寶藏。運出家珍。撒向諸人面前。一任取足。與麼會得。猶較些子。不與麼會。拄杖子別滋一路。驀卓一下曰。碎波旬窟宅。展佛祖家聲。須憑者個握金剛王劍。懸肘後靈符。要是其人。山僧今日。承諸檀大命。義不容辭。斬莽披榛。鑿開生佛面目。墾土掘石。露出本地風光。頓教寒灰發燄。枯木生春。石獅哮吼驚起。青山頭卓朔。木馬嘶風。踏斷黃河水倒流。莫有向者裏。著得一隻眼底麼。良久卓杖云。手握金鞭問。歸客夜深。誰共御垓行。復舉介菴和尚。住金明上堂。破禪堂。灰頭土面。破佛殿。驢額馬腮。破山門。擎拳持杵。破佛閣。待月眠雲。破鐘樓。知音者少。令一隊破衲僧居此。以破破不破。破破不破。不破不破底。運用無窮。直教七通八達。若是超宗異目。山僧只得另眼相看。將破破底相待。眾中有斫不開劈。不破底麼出來。金明與你。破破去也。師曰。運壺中日月。用格外鉗錘。號令人天。權衡佛祖。不無者老漢。扶豎臨濟綱宗要。且未在。山



僧當時若在。將坐具展開。畫此相。捲作一團。拋向背後。展兩子云。諾看他如何合煞。諸人恁麼會得。然燈佛與你同參。卓拄杖云。換骨洗腸重整頓。通身是眼更須參。辛未夏。嘉禾眾紳士。請住三埭龍淵。上堂。揮拂子曰。垂鈎四海。祇釣鯨鯢。據座披衣。為求知識。驀豎拂曰。過去已過去。未來尚未來。今日正當。山僧說法。直須以大圓覺為伽藍。安住平等一如法。說令現前。緇素亦如法得解。然後同聲相應。同氣相和。悉使魔外絕跡。生佛普該。入一微塵。現無邊身相坐。毫端內。轉大法輪。山河大地。明暗色空。情與無情。總在個裏。頭出頭沒。喝一喝曰。天上有星皆拱北。人間無水不潮東。僧問。如何是不動尊。師曰。卯生日。戌生月。

其右法頌曰。銀缸倒漢大浸稽。天晴開海日夢覺。心懸可惜孤雁一聲。聲休驚他獨宿眠。

處林光頌曰。樽桑將曉陽烏動。晚翠千峯玉兔生。淨洗銀河渾一事。滿天碧落散瑤晶。

晦岳旭頌曰。金烏急玉兔速。東復西如轉軸。赫奕。難擬。清光可掬。飛上若木兮。喚醒人間春夢。踏碎珊瑚兮。影搖千江水。綠晷運推移。念四門宮宮。春到三十六。

天乳哺頌曰。一對菱花[這-言+(虎-儿+几)]互彰。佳人晝夜巧梳粧。人間天上無相似。傾國傾城世莫雙。

天癡善頌曰。鴛鴦繡出頗稱奇。一個東飛一個西。縱使同眠只獨宿。金針從不把君知。

天鞏鬢頌曰。不待火而熱。不待水而涼。朝夕不停機。洞然括八荒。智者應無味。迷流徒自喪。借陰惟大禹。片片皆文章。

僧問。如何是三類化身。師曰。闍黎會殺人麼。曰我王庫內。無如是刀。師打曰。不是我同流□。僧問。如何是不退地。師曰。官憑文書。私憑契約□。僧問。如何是祖師西來意。師曰。戶外風敲竹。曰明甚麼邊事。師曰。庭前蝶舞花。曰學人不會。師曰。滿園桃李綻。風送落莓苔。僧無對。師便打。

師在金明時。一初和尚至明。命師領眾。出迎。初問。范蠡湖海月光天。你為什被斷貫索絆倒。師曰。被和尚帶累。初舉杖曰。識得者個麼。師奪得擲于地。初曰。者無禮漢。教我師兄打你去。師曰。不得倚勢欺人。便與一掌。初擬取棒。師便行。初見明。曰者漢惱亂人不少。明曰。師弟莫著賊耶。初曰。煩師兄替我出場氣。明顧師。師作禮云。老老和尚。請坐就奉茶來。抽身便出。初顧明相與大笑曰。俊哉衲子。

僧問。色身敗壞即不問。如何是堅固法身。師曰。八臂那吒撲帝鐘。曰請師明示。師曰。石人推倒五須彌。

建寧府浦城友可山鐵容玄禪師。別字寄翁。上堂。三十餘年獨穴居。堦寒不禁草縈裾。禪心已作三冬雪。一任他生作馬驢。為甚如此。坐久腰痛。

上堂。眾纔集。師便下座。知事把住問。和尚因什。不示一言。便下座。師曰。早晨喫了。兩碗冷粥。肚裏有些不停。當少待團去來。為汝等說眾罔措。師便歸方丈。

上堂。半窗圖畫梅花月。莫作等閒看一枕。波濤松樹風。不可糊亂聽。大眾要知此事。大煞漏逗。

上堂。山僧昨日。赴個村齋。咬著一粒黑光沙。直到今朝。牙痛不止。不能與諸兄弟說黃道白。便下座。

僧辭。師問。甚處去。曰有住處即來向和尚道。師曰。你是持戒人。為什不守清規。曰和尚莫以罪罪人好。師曰。我不以罪罪你。古人道。喫粥了洗鉢去。意作麼生。曰昨夜夢裏。有人問此話。恰值某愛睡。不曾答他。師休去□。僧問。如何是妙體。師曰。坑坎堆阜。瓦礫荊棘。如何是妙用。師曰。敲空作響。擊木無聲。

鎮江府甘露寺逾祖覺禪師。姓張。楊州人。從南京清涼劍門剃落。歷參諸老。無不嘉歎。晚謁金明。明問。諸方參得底。拈向一邊。道得也打。道不得也打。師便喝。明曰。除却者喝更道看。師曰。特來親近和尚。明拈拂打曰。是賞是罰。師禮拜。明又打。師豁然悟入。乃曰。將此身心奉塵刹。明度拂子。師接得。打傍僧云。是則名為報佛恩。明曰。子當珍重。

和碩額附石將軍。元旦請上堂。僧問。凍雲乍展。千山露化。日高昇。宇宙清。如何是新年頭佛法。師曰。春風纔一陣。何處不花開。曰今日安南將軍。請師陞座。祝延一句。又作麼生。師曰。百年三萬六千日。惟有今年最吉祥。云法界恩光普。乾坤色轉新。如何是甘露境。師曰。金輪調御三千界。如何是甘露人。師曰。玉曆鴻宣萬國春。云恁麼則法化弘敷。四眾均沾去也。師曰。裂破闍黎舌頭。乃卓拄杖曰。水銀落地。個個皆圓。古鏡臨臺。塵塵煥彩。春風纔度。萬物咸新。一人有慶。兆民賴之。立地成佛將軍。殺人不眨眼。殺人不眨眼將軍。立地成佛。如珠走盤盤走珠。驀豎拄杖曰。天生玉葉金枝秀。奕奕芬芳不計年。

康熙己巳。住京都開化寺。壬申孟夏。示疾。跏趺說偈而逝。塋于甘露寺右龍。世壽六十一。僧臘□□□。語錄若干卷。行世。

北京牧園企賢廣清禪師。山陰金氏子。世業儒。幼而敏慧。偶遊梵刹。志樂出塵。從雲門剃度。依三宜孟習教。參林野於天童。林問。世尊良久。外道因何悟去。師曰。知音不在頻頻舉。林打曰。還知者一棒落處麼。師曰。苦瓠連根苦。甜瓜徹蒂甜。林曰。牛過窻櫺。為什尾巴過不得。師曰。和尚今日却被某甲捉敗。林曰。者掠虜漢。師拂袖便出。最後謁金明。明問。大事未明。如喪考妣且置。因什大事已明。亦如喪考妣。師曰。愁人莫向愁人說。明曰。你向什麼處用心。師曰。泥裏何必洗土塊。明伸一足曰。我脚何似驢脚。師禮拜曰。不因夜來雁。怎見海門秋。明打一拂子。印以偈曰。教網重重透。禪源脉脈通。更明心法法。努力振綱宗。

上堂。僧問。法揚帝闕。道闡蠡湖。向上提持。作麼生道。師曰。一棒一條痕。曰華頂風規。隨處建立。祖師心印。如何指示。師曰。火爐飛出鐵烏龜。曰大機大用。正令當行。過量人來。將何接待。師便打。僧一喝。師連棒打退。迺曰。五十餘年牧一牛。登山涉水未曾休。於今高挂鞭繩也。掉尾擎頭性已柔。只是隨分納些些。山悠悠更水悠悠。說甚拈花微笑。斷臂安心。那效慈明貼榜僧堂。洞山掇退菓桌。者隊老古錐。無風興浪。播揚家醜。自不丈夫。牧園者裏。把定封疆。更不畫蛇添足。爾等眉生眼上。耳搭腮邊。又來者裏。覓甚麼椀。卓拄杖云。各請歸堂喫茶。

康熙庚申孟春。師示疾。至四月十二日。門人圓淨。領眾詣方丈。求垂示。師曰。山僧素來。不涉迷悟。痢疾三月。累得通身骨露。若人如是會得。管取超佛越祖。復謂眾云。古人道。法身病。色身即是法身。色身病。法身即是色身。今蒙大眾問我病源。山僧徧觀法界。覓病根起處。了不可得。故曰。病人膏肓。神醫拱手。復說偈大喝一聲。便吉祥而寂。世壽六十二。僧臘四十一。

興化竺山吼菴證禪師。示眾。舉僧問首山。如何是學人親切處。山曰。五九盡日又逢春。曰畢竟事如何。山曰。冬到寒食一百五。師頌曰。春暖平川鶯語清。笙歌從此悅行人。反嗟策馬擁寒者。孤負東君用意深。

平湖青蓮寺夢菴覺禪師。別字一味。嘉興范氏子。禮金明披緇。命掌記室有年。深入丈室。後住青蓮。參扣無虛日。示眾。舉世尊於自恣日。因文殊三處過夏。迦葉欲白椎擯出。纔拈椎。乃見百千萬億文殊。盡其神力。椎不能舉。世尊遂問。汝擬擯那個文殊。迦葉無對。師曰。文殊三處度夏。擾亂清規。迦葉白椎欲擯。驚羣動眾。世尊問處因循。使人廝鬪。若是正令而行。三人喫棒有分。何故。青蓮門下。

西陵報恩松岫源禪師。上堂。舉龐居士。語未竟。王公華出問。既是已成的佛。用選作麼。師曰。拖犁拽耙。

太平素巖智禪師。麻城人。上堂。彩雲影裏神仙現。手把紅羅扇遮面。急須著眼看仙人。莫看仙人手中扇。舉扇云。者個是扇子。且道。仙人在甚麼處。擲扇躬身云。者個是仙人。扇子在甚麼處。汝等諸人。向者裏著得一隻眼。不妨水邊林下任性逍遙。倘或未然。咬定牙關。拚命做去。自然水到渠成。

舉洞山麻三斤話。頌曰。如何是佛三斤麻。搓根繩子縛烟霞。等閒識得鈎頭意。笑殺東村王大媽。著有金剛決疑。行世。

玄暉性禪師。

建寧普明雲菴真量禪師。甌寧謝氏子。上堂。麻三斤。乾矢橛。且置一邊。德山棒。臨濟喝。放過一著。諸人還知獅子爪牙。獐龍頭角麼。脫身一色坐遺影。不落同風顯大功。

小參。饑來喫飯。困來打眠。衲僧門下。不費鑽研。祇如古德道。五臺山上雲蒸飯。佛殿堦前狗尿天。是明什麼邊事。向道莫行山下路。果聞猿叫斷腸聲。

秀州蓮花可度尼。淮安田氏季子也。父官以指揮。坐□而歿。尼年七歲。見父屍。感嘆曰。人生如此何益。便有出塵志。但不自由。四十往扣三宜禪師于梵受。復謁介菴和尚于金明。遂求落髮。明再三弗許。尼即憂憤。嘔血盈盆。明憫其誠。乃為剃染。命看萬法歸

一話。寢食都忘。不朞年而氣幾絕。一日見明。明問。一歸何處。尼訴所以。明曰本。自現成用。許多氣力作麼。尼覺心意平貼。尼呈偈曰。脫體風流意莫窮。堂堂獨露主人公。朝來換水焚香課。盡在尋常日用中。明可之。

[橘-矛+佳]李明心佛音尼。姓葉。濮鎮人。幼喪母。延僧誦經。見地獄畫相。即心動。不茹葷。矢志出家。父為締姻。尼死誓不從。遂投庵落髮。苦行數載。禮金明圓具。明命看父母未生前話。刻究久之。一日登樓。踏板作聲有省。乃呈明。明愈加煅煉。至育從今識得娠生面自是出羣一丈夫之句。尼一日在羅廣文家補毳。羅問。如何是日用得力句。尼以針作筍勢。適歲暮。羅問。汝將甚麼度歲。尼豎拳。羅曰。還別有麼。尼曰。來朝向居士道。甲寅菊月既望。沐浴端坐。說偈而化。

廣文羅開麟居士。號空諸。[橘-矛+佳]李人。幼歲讀書。便能琢磨孔顏落處。故受用不與人同。一日隨父衡陽公。過敬畏菴。值石車禪師上堂。不信有宗門事。乃忽之。順治丙戌間。父母繼歿。險阻備常。內兄施約菴。每於失意中啟發。謁東塔林野禪師。次參無熱首座及費隱禪師。費展兩手云。會麼。士茫然。費云。當面錯過。士於此信入。戊子參金明介和尚。深造井臼。一晚落堂。舉香板。命眾下語。士近前奪香板曰。和尚把柄。已在弟子手裡。介顧眾曰。這一期祇得個俗漢。士擲香板。介肯之。士著。有華嚴疏鈔金剛摸像家門拈頌共若干卷。行世。

別駕項謙居士。號茨菴。襄毅公七世孫。大金吾俊卿子也。未致仕時。參博山來余集生。皆有機語。及解綬。與古南門天界盛等。為方外交。最後謁介和尚於金明。因緣甚契。乃呈偈曰。聊聞舉著便承當。好肉無端已剗瘡。著眼機先看端的。頂門誰不帶扶桑。介印可。士嘗舉郁山主過橋喫撲公案曰。眾兄弟。一眼觀天。兩脚踏地。且道。明珠在甚麼處。良久云。春在草頭上。王孫幾箇知。有究心錄。行世。

陸煥居士。號調實。秀水人。幼失怙恃。無干於世。喜遊叢席。與知識盤桓不忍捨。順治丁酉。造金明。明命看萬法歸一。經三載。偶閱三頓棒話。如貧得寶。述偈呈明。明曰。此是意識所作。猶在半途。未是到家消息。士服膺。庚子再參。明指座上古瓶。士作頌。甚恰明意。一日有僧。乞錢。士如數封定曰。道得即與。僧曰。我年老矣。士曰。四大有老。這箇豈有老耶。僧似手點胸。士曰。試拈出看。僧進前。士便掌。

文學陸燾居士。字玄度。性恬淡。嘗閱竺典。猶如夙肄。乃謁明菴天童平陽二隱諸宿。有機語。刻載行錄。壬辰參金明。明問。曾見知識否。士曰。六七位。明曰。那一位得意。士曰。若得意即不來

也。明笑曰。莫瞞老僧。士請開示。明曰。此事不從外得。要明心地須看話頭。士唯唯而退。一日因行折足。頓了厥旨。偈曰。十字街頭親磕著。一回白汗頂門通。石人扶起呵呵笑。伸脚原來縮脚中。呈明。明深肯。

文學朱彝憲居士。字欽臣。因鼎革。有出世志。而未果。辛卯間。患血症。乃謁金明請益。參究法要。明曰。居士看。一念未生以前。這病根。從甚處得來。如此頻頻看去。亦莫嫌鬧取寂。亦莫厭凡求聖。昔蘇黃得力處。不越此也。士如教命。病果愈。一夜擡頭。見月光皎潔。乃悟入。連述數偈。其略曰。五色雲開萬象清。一輪心月徹天明。虛空落地無消息。世界何勞用一塵。呈明。明曰。汝骨氣猛利。志性果敢。可名真毅焉。

明經李潛。字蛟門。好浮屠學。嘗繙內典。年二十二。遇膚淺禪師。示不思善不思惡。那個是本來面目之話。參之。往謁櫻寧斯瑞二公。機語甚契。丙午與空諸羅子盤桓。遂造金明。參介和尚。適鐘鳴。介問。鐘鳴耶。耳鳴耶。士曰。一串穿却。介喝曰。還穿得者箇麼。士禮拜曰。恩大難酬。茶次。介曰。百丈野狐話。你作麼生會。士乃覆却茶杯。介曰。只如不落不昧。又作麼生。士以茶杯。仰上而立。介曰。除却者些伎倆。試道一句看。士便喝。介曰。亂喝作麼。士曰。和尚莫作恠。介便打。士禮拜。一日侍次。介問。臺山婆子。趙明。如何勘破。士曰。趙老舌頭無骨。介頷之。即示偈曰。趙州銜口疾走。婆子減竈添兵。太平日定輸贏。勳勞到處標青史。撒手長安莫問程。遂命名真弘。

文學許振聲居士。字無聲。自幼敬信三寶。最喜楞嚴莊老等書。聞介和尚道風。即歸信。領話頭精勤。體究累年。一日入室請益。介舉扇一拍。士豁然。有投機偈。介可之。囑令操履。然務實而不務虛。辛酉孟冬。感微恙。臨終說偈曰。我名振聲。聲從何來。法名真馨。馨今何往。人道我佛法中人。直是冤枉。曾讀孔孟幾行書。且喜也不入者黨。阿呵呵。亭午天空月朗朗。遂悠然脫去。

(滴乳曰。真字一輩。按金明進祖親筆聯芳所錄。近有數席。妄稱進祖法嗣。雲詳攷語錄諸書。該無實據。未便收入集內)。

## 永正元禪師法嗣

秀水報本冲默真開禪師。湖廣人。參永正。問甚處來。師曰新城。正曰。未發足以前。好與一頓。師以坐具一拂。正便打。師少頃呈頌。正接了更索。師曰。和尚將謂別有那。正深肯。示眾。舉石霜參汾陽知臨濟道出常情因緣。師頌曰。倒腹傾腸舉似人。其如不薦屈難伸。一朝捉敗非輕處。眼蓋乾坤氣宇新。

東溪退菴斷愚真智禪師。嘉興人。參永正。問靈雲道。自從一見桃花後。直至如今更不疑。因什玄沙却道未徹在。正曰。直不藏曲。師曰。未審徹底人。如何受用。正曰。饑則喫飯。倦即打眠。師禮拜。執侍二十載。

示眾。舉香巖上樹因緣。師頌曰。一等全提向上機。無錐地漢做來奇。當場不畏傍觀眼。別有威聲動四維。康熙乙卯。住永正。丁巳季秋二十日。命搥鼓集眾。師豎拳曰。生死事大。無常迅速。各各努力。莫作等閒。復曰。生平懶開口。別眾無他語。端坐斂雙眸。逢人莫錯舉。且道。畢竟如何。喝一喝遂寂。塏于方丈。

耿惟真藏禪師。參永正。正問。諸佛未出世。人人鼻孔撩天。出世後。因甚杳無消息。師曰。坐斷天下舌頭。正曰未在。師即呈頌曰。塗毒聲前未解聞。藏鋒袖裏得堪爭。當陽突出無巴鼻。打失摩醯正眼睛。正目之。至晚落堂。拈師頌問。者是有巴鼻底。作麼是無巴鼻底意旨。師便喝。正曰。還別有麼。師曰。有即有。不堪舉似。正曰。因甚不堪舉似。師曰。恐嚇殺天下人。正拈拂子便打。師禮拜。正又打。

法兩行洪禪師。參永正。正問。何處來。師曰崇得。正曰。曾親近阿誰。師曰。天童報恩福巖。正曰。更見何人。師曰。兩眼對。正豎拳曰。向者裏道句看。師曰。道破即不堪。正曰未在。師曰。和尚要重說偈曰那。正便打。師曰。恩大難酬。正又打。師禮拜。後再參。正問。風雨淋漓。遠涉不易。脚跟下曾打溼也未。師震聲一喝。正曰。猶帶泥水在。師曰。只為和尚老婆心切。正便打。師禮拜。正可之。

寓庸禪師。參永正。依止數載。一日正問。子一向在此。如何行履。師曰。著衣喫飯。正曰。此外更有事麼。師曰。有則辜負和尚。正曰。若道無。亦辜負老僧。師珍重禮三拜。正便打。

永正通濟上座。再參。正舉拂子云。諸佛未出世。祖師不西來。還有者個消息麼。師便喝。正曰。祇如諸佛出世。祖師西來。又且如何。師曰。眾生度盡。正曰。座主見解。師曰。和尚又如何。正便喝。師豁然。曰謝師慈悲。便禮拜。正便打。

杲如證菴主。再參永正。問向在什處躲跟。主曰。從來不覆藏。正曰。如何是你不覆藏底。主曰。山青水綠。雀噪鴉鳴。正曰。莫是舊時面目麼。主曰。溪山雖異。雲月是同。正曰。未在更道。主便喝。正打一如意云。向者裏道一句看。主禮拜。正然之。

徑石滴乳集卷之五(終)

---

## [CBETA 贊助資訊](#)

[.https://www.cbeta.org/donation/index.php](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

## [前往捐款](#)

---

## 信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

---

## 劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

---

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

---

## 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".

---